

EKALESIA FAAPOTOPOTOGA KERISIANO SAMOA
Matagaluega o A'oa'oga Kerisiano
TUSI AOGA ASO SA

VASEGA MATUTUA FAAPITOA &
AUTALAVOU LAITI 2016

FAASOLOGA MATAUPU

MANATU AOAO: **O LE ATUA A'OA'O MA LAVEA'I**

FEPUARI

- 14 **(Aso Sa Tupulaga)** O le poto e lelei ai (Wisdom is good).
 Faataoto 3:1-12
- 21 Faia le tagata ia foliga i le Atua (Human being created in the
 image of God). **Kenese 1:26-28**
- 28 Valaau i le suafa o le Alii (Calling in the name of the Lord).
 Kenese 12:6-9

MATI

- 6 Ia aoao ma ola ai (Learn and live out) **Mataio 19:16-22**
- 13 Saili e maua ai (Seek and will find) **Mataio 7:7-12**
- 20 **(Aso Sa Laupama)** Ua puapuagatia Iesu (Jesus suffers). **Mataio**
 27:27-44
- 27 **(Aso Sa Toetu)** Ua soifua mai Iesu nai le oti (Jesus rises from
 the dead). **Mataio 28:1-10**

APERILA

- 3 Faamaoni i le tauto (Live the vow). **Faamasino 11:29-35**
- 10 Ia auauna faamaoni (Be faithful). **Luka 16:1- 9**
- 17 Lototele ma lotomau (Be strong and persistent). **Tanielu 6:1-17**
- 24 Faamoemoe i le Atua (Depend on God). **Iosua 24:14-25**

ME

- 1 Ave se ulua'i fua mo le Atua (Give a first fruit for the Lord). **Kenese 4:1-7**
- 8 (**Aso Sa Tinā**) Tina agalelei (A loving mother). **1Samuelu 1:24-28**
- 15 **Aso Sa Fono Tele/Aso Sa Penetekoso**
- 22 Ia faapaia le Aso Sa (Sanctify the day of the Lord). **Esoto 20:8-11**
- 29 Ia alofa i lou tuaoi (Love your neighbour). **Luka 10:29-37**

IUNI

- 5 Ia alofa i lou nuu (Love your people). **Neemia 4:1-6**
- 12 Filifilia a o faatauva'a (Chosen while little) **Faamasino 6:11-18**
- 19 Tuu 'ese le tagata amio leaga **faapalagi ???**
- IKorinito 5:9-13**
- 26 Mata'u i le Atua i le malosi (Obey the Lord in your youth). **Failauga 12:1-7**

IULAI

- 3 Saunia le laoa'i (Table served). **Salamo 23**
- 10 Alofa moni (True love) **Le Pese a Solomona 1:5-7**
- 17 Alofa le faatuāoia (Love without boundaries). **Luka 15:3-7**
- 24 Ta'ita'i le Atua i le malaga (God leads the way). **Esoto 16:4-8**
- 31 'Aua le muimui a o malaga (Don't murmur on the way). **Esoto 16:11-26**

AOKUSO

- 7 'Aua le popole (Don't worry). **Mataio 6:25-34**
- 14 **Aso Sa Tamā** – Alofa i lou tamā (Love your father). **Ioane 10:17-18**
- 21 O le tamā o le au faatuatua (The father of faith). **Kenese 12:4-7**
- 28 Ia āva i tagata paia (Respect the men of God). **Efeso 6:1-3**

SETEMA

- 4 **Aso Sa Talalelei** – Talia le Talalelei (Accept the Good News). **Roma 16:17-20**

- 11 Filifilia e Iesu (Chosen by Jesus). **Mareko 1:16-20**
18 Faamalōlō e Iesu ma'i (Jesus heals the sick). **Luka 14:1-6**
25 Taitai mai le mamoe ua se (Bring back the lost sheep). **Luka 15:3-7**

OKETOPA

- 2 Tapenaga Lotu Tamaiti
9 Aso Sa Lotu Tamaiti
16 Malologa Lotu Tamaiti
23 O fanau o le meaalofo mai le Atua (Children - the gift from God). **Salamo 127:3-5**
30 O ā'oga a le Atua mo fanau (God's school for the children).
Luka 2:41-52

NOVEMA

- 6 O le taulaga ma le Atua (The offering and God). **Mika 6:6-8**
13 O le loto fuatiaifo (The free will). **IIKorinito 9**
20 O le tulafono ma le alofa (The law and love). **Luka 10:25-37**
27 Aso Sa Ateveni/Afio A'e – Mamalu o le Atua (The glory of God). **Mareko 9:2-8**

TESEMA

- 4 O foliga o le Alo o le Atua (The image of the Son of God).
Filipi 2:5-7
11 O meaalofo a le 'au Makoi (The gifts of the wise men).
Mataio 2:9-11
18, 25 Malologa Kirisimasi

.....

ASO SA: 14 FEPUARI, 2016

MATAUPU: O LE POTO E LELEI AI (Wisdom is good).

SINI: Ia aoao le vasega ina ia malamalama – o le poto e lelei ai, o le ola lava lea ia Keriso o lē ua tuuina mai e le Atua e fai ma ō tatou poto

TUSI FAITAU: Faataoto 3:1-12

FESOASOANI MO FAIAOGA

O le Tusi Faitau

O (ff.1-12) ua faaulutalaina, o aoaoga mo le amio tataui i le va ma le Atua. O ff.1-4 o lo o faamamafa ai le tāua o le faalogi i le tulafono ma poloaiga a le Alii, ma ia teuina i papa o le loto. O ff.5-12 o fautuaga mo le atalii ua vaevaeina i vaega e fa (4). (i). Ia faatuatua i le Alii ma le loto atoa ae ‘aia le faalagolago i lona lava atamai (ff.5-6); (ii). ‘Aia le faafiapoto, ia mata’u i le Alii; ia alo ese i le leaga (ff.7-8); (iii). Ia āva i le Alii i lona oa ma le faapolopolo o ana mea uma e tutupu; (iv). ‘Aia le faatauvaa ia te ia le a’oā’iga a le Alii.

Faataoto ma le poto

O le uiga o le upu faataoto i le gagana Eperu, ‘ia pule’ (to rule). O le poto ma lona uiga – o le ala sili ona lelei e taitaiina ai le tagata. E tulaga tamaitai le upu poto i le gagana Eperu. O lo o aumai e Faataoto le poto pei o se tagata o lo o tautala ma aoao atu le poto, ma o ia foi o le poto. Ua faatusa e Faataoto lē o lo o aoao atu le poto i le tamā i lona atalii, o le faiaoga i le tamaitiiti ā’oga, po o le Alii foi i lona nuu o Isaraelu.

Faamamafa a Faataoto

Ia pulea e le poto, le tulafono ma poloaiga a le Alii ua teu i le loto le tagata atoa i le olaga o aso uma.

Fesootaiga ma le satauro

O le satauro o Keriso ua lelei ai le tagata agasala ma le Atua e ala i le loto salamō ma le faatuatua i lona suafa. O le poto sa a’oa’o e Faataoto i le Feagaiga Tuai ua fa’aalia iō tatou ola, auā ua pulea e Keriso o tatou olaga. Ua fai Keriso ma o latou poto e taitaiina i tatou, ma iloaitino ai iō tatou olaga lona soifua paia. O lona alofa sasa’a atu lea ia ola le isi tagata, faapea fua o le Agaga ua fa’aalia iō tatou olaga.

GALUEGA FAATINO: Suesuega a Vaega i Fesili

Vaega I - ff. 1-4; Vaega II – ff. 5-12

Fesili mo le Vaega I – ff.1-4

1. O ā vaega tāua e lua o le aoaoga a le tamā i lona atalii, ia tausia i lona loto?

Tali: O lana tulafono ma ana poloaiga

2. O le ā le tauai pe a tausī e le atalii le tulafono ma poloaiga a le tamā?

Tali: E faaopoopoina ai aso e tele ma tausaga e ola ai atoa ma le manuia

3. O le ā le tauai pe afai e fa’aalia i le ola o le atalii le alofa ma le faamaoni?

Tali: E maua ai e le atalii le alofa ma le manuia lelei i luma o le Alii atoa ma tagata

4. O le ā le uiga o le fuaitau, ‘ia asoa ai i lou ua; ia e tusi ai i le papa o lou loto’?

Tali: Ia manatua pea ‘aua lava ne i galo i le mafaufau le aoaoga – o le tulafono ma poloaiga a le Atua

Fesili mo le Vaega II – ff.5-12

1. O le ā le fautuaga a le tamā i lona atalii i f.5 & f.6?

Tali: ‘Aua le faalagolago i le atamai, ‘a ia manatua le Alii ma lana tulafono ma ana poloaiga e faatonuina ona ala uma

2. O le ā le fautuaga a le tamā i ff.7-8?

Tali: Ia tumau i le mata’u i le Alii e le faafiapoto ai ma inoino ai i le leaga.

3. O le ā le aoaoga a le tamā i lona atalii e uiga i le oa i ff.9-10?

Tali: Ia ava i le Alii le atalii i se oa ua ia maua, faapea le faapolopolo o ana mea uma e tutupu, auā e faaopoopoina ai mea e tele mo ia

4. I ff. 11-12, o lo o faamanatu ai e le tamā i lona atalii le tāua o le aoaiga a le Alii. O le ā se faamanatu mo le atalii o le a’oā’iga a le Alii?

Tali: Ia ‘aua nei faatauvaai i le atalii i so o se taimi le aoaoga a le Alii. Pe afai foi e aoa’i mai le Alii, o lona uiga e i ai le mea ua sese ma faatamala ai le atalii e ao ona faasao ma faalelei, ma o le faailoga lena o le alofa faatamā o le Atua i ona tagata filifilia

PESE: Ieova e, silasila (Pese & Viiga EFKS).

AOAOGA

1. Fai Keriso ma ō tatou poto e lelei ai mea uma tatou te fai, ma viia ai lona suafa.

.....

ASO SA: FEPUARI 21, 2016

MATAUPU: FAIA LE TAGATA IA FOLIGA I LE ATUA
(Human being created in the image of God).

SINI: Ia aoao le vasega ina ia malamalama – na faia i tatou e le Atua ia tatou foliga ia te ia i la tatou amio lelei i le itu faaleagaga.

TUSI FAITAU: Kenese 1:26-28

FESOASOANI MO FAIAOGA

O le Tusi Faitau – o lo o faamatala ai e Kenese le faia e le Atua o le tagata i le aso ono, ina ua mae’a ona ia faia o mea uma o le foafoaga ma le lalolagi i aso muamua e lima.

Ua molimau Kenese, o le Atua lava na faapogai i le faia ai o le tagata. Ma o lo o fetalai le Atua i nisi ia latou faia le tagata i lo latou faatusa. I le f.27, e lē o nisi na faia ma le Atua le tagata, a o ia lava e toatasi. E fesootai ma le tala a le Tusi Paia i le Feagaiga Fou i le Atua e toatasi ae tolu ona peresona ua fa’aali mai ai i ona tagata. O le Atua le Tamā, ma le Alo ma le Agaga Paia. O lona uiga na fetalai le Atua ia te ia lava.

O le tagata ua faia e le Atua e tolu vaega tāua ua faailoa mai e Kenese. (i). Na faia e le Atua i lona faatusa; (ii). Na faia ia foliga i le Atua; (iii). Ia pule i mea na faia e le Atua i lona siosiomaga.

O le faatusa o le Atua ua ia faia ai le tagata, e fesootai ma le fausaga o le tagata ua faia ai e le Atua. O le tino, o le mafaufau, ma le agaga. E ese la le tagata mai mea ola uma na faia e le Atua. Auā o meaola e ui ina ola i le ola pei o le tagata, ae ese lona fausaga i le tulaga e leai sona agaga. O le ‘agaga’ o le fesootaiga lea o le tagata ma le Atua. O lona tino e ui ina o le eleele e toe foi atu i le eleele, ae o lo o nofo ai lona agaga e alu atu i le Atua. O le faatusa la o le Atua i le tagata o le agaga o le tagata. E iloa faapefea o lo o ola le agaga ma foliga i le Atua le tagata? E iloa i le ola faalogo ma le usitai i le Atua na faia o ia. O le faatinoga o lea tulaga, ia iloaitino i lona tiute ua finagalo ai le Atua - Ia pule i mea ua faia e le Atua mo lona ola lelei. Ia pule faapefea? Ia pule ma le alofa. Ia pule ma tausi mea uma mo le manuia o tagata uma, ae le mo se lelei toatasi ma le manatu faapito.

O le satauro o Keriso – ua aveesea ai i tatou mai le pule a le agasala ma satani sa tatou lē foliga ai i le Atua. O lona toetu ua taitaiina ai i tatou e lona mana ma lona alofa tunoa ia foliga ia Keriso ma ola ai.

GALUEGA FAATINO: Fesili e tali

1. E faapefea ona tatou iloa ua tatou foliga i le Atua?

Tali: Ina ua lelei la tatou amio i le itu faaleagaga

2. O le ā le tiute o le tagata na finagalo ai le Atua?

Tali: Ia pule i mea na faia e le Atua i lona siosiomaga

3. O le ā le uiga o le faatusa o le Atua i le tagata?

Tali: E lē o le Atua le tagata, ae foliga i le Atua ma nonofo pea ma le Atua, pe a faalogo ma usitai i le Atua.

4. Aisea ua faia ai le tagata o le tane ma le fafine?

Tali: I le f.18 o le mataupu e lua o Kenese, o lo o tā'ua ai o le fafine o le fesoasoani lea o le tane. E ui ina toalua, ae tino e tasi lava i la'ua.

PESE: Ia fai ma sulu e mumu (Pese 380, Pese & Viiga EFKS).

AOAOGA

1. Ia tatou foliga i le Atua i la tatou amio ua lelei i le itu faaleagaga
2. Ia pule ma le alofa i mea ua faia e le Atua ma isi tagata, ae le o le pule ma le faasauā.

.....

ASO SA: 28 FEPUARI, 2016

MATAUPU: VALAAU I LE SUAFA O LE ALII (Calling in the name of the Lord).

SINI: Ia aoao le vasega ina ia malamalama, o le valaau i le suafa o le Alii pei o Aperamo, e afua mai ina ua talitonu ma ua faatuatua i le Atua le tagata.

TUSI FAITAU: Kenese 12:6-9

FESOASOANI MO FAIAOGA

O le Tusi Faitau ua faamatala ai e Kenese le taunuu o Aperamo i laueleele o Kanana. Sa i ai i Kanana le nuu e igoa ia Sekema e tu i le fanua e tā'ua o le aluna o Morē. Sa i ai foi tagata ua tā'ua o sã Kananā i ia ona po. Ua faamatala e Kenese le fa'aali o le Alii ia Aperamo i le aluna o Morē. Ua fetalai foi le Alii ia Aperamo, na te foaiina lea nuu mo lana fanau. Ua faia foi e Aperamo le fata faitaulaga i le Alii i lea mea; sa fa'aali foi le Alii ia te ia.

O Aperamo sa ō ese mai ma lona aiga ai Uro i Kaletaia, o le 'ā ō i Kanana, peitai ua latou oo atu ma lona tamā ma lo latou aiga i Karana, ma ua nonofo ai (Kenese 11: 26-32). O le nuu la o Karana sa fetalai ai le Alii ia Aperamo, ina ia ia tuua, ae alu atu faatasi ma lona aiga uma i se nuu e faasino atu e le Alii e fai mona. Sa usitai Aperamo i le Alii ma alu e tusa ona fetalai ai le Alii ia te ia. Ua alu Aperamo ma lona iloa – o le Alii na te faasino atu le nuu. Ua ia faalogo foi i faamanuiaga a le Alii mo ia.

O le matua o Aperamo (75 tausaga), ma lona usita'i i le Alii, ua ta'u mai ai le talitonu o Aperamo, e i ai le isi malosililili na te faia mea ofoofogia mo le tagata, ma pule i mea uma ma tagata uma. E tele nuu iloga ua nonofo ai, o lona uiga o se nuu silisili o le 'ā faasino atu e le Alii e fai mona. O Aperamo foi o le tamā sili i lona aiga – a o lea o le 'ā fai ma tamā o nuu e tele.

Peitai ua lē o se isi nuu e ese mai nuu uma, a o Kanana. O le nuu i taimi o tupu na foa'i uma e le Alii le tele o lona laueleele e nonofo ai lona nuu filifilia o Isaraelu na tupuga mai ia Aperamo. O le nuu foi o lona faatusa o le Kanana fou faaleagaga i le malo o le Atua.

O ai la se 'ā le fia vivii i le Alii – o lea ua mautinoa i le loto isi mea silisili o le a faia e le Alii e lē oo i ai le malosililili o le tagata. O ai se 'ā le fia valaau i le Alii ua mautinoa i le loto o le Atua Moni lea ua fetalai ma faalogo i ai i lona siufofoga. E tele atua o nuu ma ō latou faatusa sa vaai i ai, ae mamate e lē faapei o le Atua ua fetalai e lē vaaia, ae ua faalogo Aperamo i lona siufofoga, ma lona silisiliese.

Sa faia e nuu ese fata faitaulaga iō latou atua mamate, a o lea ua manatu Aperamo, o le mea lea e talafeagai tonu ma le Alii le Atua Moni ua fetalai. Ua ia faia le fata fai taulaga, ma ua ia valaau atu i le suafa o le

Alii. Ua fetalai le Atua Moni i mea silisili na te faia mo le tagata e faalogo ma usitai ia te ia. Ua tali atu Aperamo i le ala sa’o ma tonu e faafeagai ai le tagata ma le Alii. Ua faataunuu e le Alii lana folafolaga ia Aperamo, ae tali atu Aperamo i le ala e faailoa atu ai i le Alii lona talitonu ma lona faatuatua ia te ia.

O le satauro o Keriso, o le taulaga osia ia togiola ai le tagata agasala. O lona toetu ma le auina mai o le Agaga Paia o le Alii na valaauina Aperamo, ua mafai ai ona tatou faalogo ma usitai i le Alii le Atua Moni, e ala i le loto ua salamō faamaoni ma ua faatuatua i le suafa o le Alii. Ua tatou iloa ai foi, e lautele ma loloto fuafuaga paia a le Alii mo i tatou, pe a tatou faalogo ma usitai ia te ia. Tatou te fiu foi e saili i lenei olaga se Atua na te faia ni mea silisili iō tatou olaga ma olioli ai. Ae ua na o le Alii lava o ia o le Atua Moni e toatasi.

GALUEGA FAATINO: Fesili ma Tali

1. O le ā le uiga o le igoa Aperamo?

Tali: O le tamā sili

2. Na faapefea ona fai Kanana mo Israelu le fanau a Aperamo, ae o lo o nonofo ai sa Kanana?

Tali: O le Alii le Atua e toatasi e ala i lona malosilisili ese

3. O le ā se uiga faamataupu silisili o le faia e Aperamo o le fata faitaulaga?

Tali: O le ala lea e fesagai ai le tagata ua talitonu ma faatuatua i le Atua – e faailoa atu ai le loto faafetai ma le loto talitonu i le Alii ma ana folafolaga faaola mo le tagata agasala.

4. O le ā le fata faitaulaga na faia e le Alii le Atua Moni – ina ia fai mo i tatou le Kanana Fou le ola e faavavau e ala i le loto salamō ma le faatuatua i lona suafa?

Tali: O le satauro o Keriso na maliu tiga ai auā o ia ua finagalo le Atua e fai ma taulaga ma togiola mo ā tatou agasala

PESE: Ina vivii i tatou nei (Pese 2, Pese & Viiga EFKS).

AOAOGA

1. Ia faalogo ma usitai i le Alii i aso uma

2. O le Alii na te faia vavega iō tatou olaga pe a uma lo tatou malosi
 3. E i ai mea silisili e faia e le Alii iō tatou olaga pe a tatou talitonu ma faatuatua ia te ia.
 4. ‘A fetalai le Alii ia talia loa ma faia e manuia ai lou olaga
-

ASO SA: 6 MATI, 2016

MATAUPU: IA A’OA’O MA OLAI (Learn and live out).

SINI: Ia aoao le vasega ina ia malamalama, e tāua ia Iesu le iloa ma aoao o ana poloaiga ma ia faatino ma ola ai.

TUSI FAITAU: Mataio 19:16-22

FESOASOANI MO FAIAOGA

O le Tusi Faitau o lo o faamamafa ai le tāua o le aoao o le tulafono ma poloaiga a le Atua e ona tagata ma ola ai. Auā ‘a lē olaina ma faatino mai i le ola le uiga o poloaiga ma le tulafono, e leai se aogā e a’oa’o ai ma iloa ai.

Ua faamatala e Mataio le tasi tagata e tele lava ana mea sa alu ma fesili ia Iesu – po o le ā se mea na te faia na te maua ai le ola faavavau. Sa tali Iesu, ia tausi i poloaiga a le Atua pe a fia oo i le ola. Sa ta’u i ai e Iesu tulafono po o poloaiga i le va o le tagata ma le isi tagata. Ma sa ia tali ia Iesu ua ia tausia uma ia poloaiga. Peitai e i ai se mea o toe na te lei faia? Ona aoao lea e Iesu o ia, pe afai e mana’o ia atoatoa ona lelei o lana amio, ia ia alu ma faatau atu ana mea, ma fesoasoani ai iē matitiva, ona ia te ia lea o le faulaigaoa i le lagi, ona faatoa sau ai lea ma mulimuli ia te ia. Peitai ua faalogi o ia, ma ua alu ese ma le tiga auā o le mauoa o ia.

E tāua le oa ma le tele o mea. E tāua foi le aoao o le tulafono ma poloaiga a le Atua. Ae o le mea sili ona tāua, ia iloa le uiga faatino o poloaiga a le Atua, ma ia faia.

O le valaau e fai ma soo o Iesu, e ò faatasi le iloa ma faatinoga ma le mulimuli ia Iesu i taimi uma. Aisea e tāua ai? Auā foi e tu mamao loa ma le Alii - fai loa ma soo e iloa ma malamalama i poloaiga a le Atua ma le uiga faatino o ia poloaiga i le olaga faasoo, ae ua musu e ola ai ma faatino. O lo tatou mulimuli pea ia Iesu e tele lona tāua. O le faailoga ua taitai i tatou e le Alii ma lona Agaga. O i tatou foi o soo mulimuli ma ola ai i faasinomaga uma o le fai ma soo o Iesu.

O Iesu na ia aoao poloaiga ma le tulafono a le Atua ma ola ai. I lona satauro sa ia faailoa mai ai i le tagata agasala le alofa lavea'i o le Atua o le uiga faatino lea o le tulafono ma poloaiga a le Atua mo ona tagata ma le lalolagi uma. O lona toetu, ua taitai ai pea le Keriso aoao atu ma ola ai iō tatou olaga i mea tatou te fai. Pe mauoa pe mativa ae oī tatou o soo ua aoao poloaiga a le Alii ma ola ai i aso uma, ma i'u ai i le viiga o le Atua le Tamā.

GALUEGA FAATINO: Fesili & Tali

1. O le ā le uiga o le fesili, “..Se ā se mea lelei ou te faia ou te maua ai le ola faavavau?

Tali: E lē o mautinoa e lē na fesili le mea na te faia e maua ai le ola faavavau, ma o se mea lelei e ese mai le tausia o tulafono

2. Sa tali Iesu i le taulealea mauoa, ia ia tausii i poloaiga pe afai e fia oo i le ola. Ae fai atu ia Iesu, ua ia tausii uma i ia poloaiga, ae pe i ai se mea o toe na te lē i faia? O le fesili, o le ā se mea o fai ma faafitauli i le nei tagata na fesili ia Iesu?

Tali: Mo tatou le aufaitau Tusi Paia, o lo o tatou lagona le tagata i totonu o lē na fesili. O lo o ia lagona le lē paleni o le tele o ana mea, ma lona tausii i tulafono i lona lava siosiomaga, ua lē fa'aalia ai le uiga faatino o le tulafono ma poloaiga a le Atua – o le alofa lavea'i i le tagata puapuagatia.

3. O le ā se tulafono po o poloaiga na ta'u e Iesu i le mauoa, e te lagona i lou tagata i totonu e masani ona 'e solia?

Tali: O le gaioi, pepelo, ava i matua?

4. Pe a tumu ō tatou loto i le tele o le oa ua maua, a o oe o le soo o Iesu - o le ā le fesoasoani a Iesu i lea mea?

Tali: Ia alofa i isi e ala i le oa o le amioletonu ina ia i ai se avanoa o le oa sili i le lagi mo i tatou, ma ia mulimuli loa ia Iesu ma le lē masalosalo.

5. O le ā le ituaiga tagata e i ai lē na fesili ia Iesu?

Tali: O le tagata ola manumanu, manatu faapito, lē alofa ma valea

PESE: Alofa i lou tuaoi a o ‘ē malaga

AOAOGA

1. Ia iloa tulafono ma poloaiga a le Atua ma ola ai
2. ‘Aua le tu mamao ma Iesu auā e faaoleole ma ola masalosalo ai
3. Ia faatino i lou va ma le isi tagata tulafono ma poloaiga a le Atua

.....

ASO SA: 13 MATI, 2016

MATAUPU: SAILI E MAUA AI (Seek and will find).

SINI: Ia aoao le vasega ina ia malamalama – o le manuia o ō latou olaga o lo o taatia i le ola saili ma le lē faalogologo tiga i faasinomaga uma e manuia ai le lumanai pei o le mata’u i le Alii, ma lototele e fai ā latou mea ā’oga.

TUSI FAITAU: Mataio 7:7-12

FESOASOANI MO FAIAOGA

O le Tusi Faitau o lo o faamatala ai e Mataio le tasi lenei o vaega tāua o le lauga a Iesu i le mauga – o lē ole atu ma lē tali mai. O se tasi o uiga loloto o le tulafono ma le au perofeta. O le ā lea uiga loloto? O le tali atu i le alofa ma le agalelei i lē ole mai ma manaomia se fesoasoani. O le faatāua ma le faamamafa o lo o taatia i lē ole atu. Ia faailoa atu le manaomia moni o le fesoasoani. Pei ona fa’aaoga ai e Iesu le upu ‘ole’,

‘saili’, ‘tuitui’. Auā ‘a ole atu e maua e ia; ‘a saili foi e iloa e ia; ‘a tuitui foi e toina foi ia te ia. O le faailoga lea o le manaomia moni o le fesoasoani, ma le faamoemoe ma faalagolago i le isi.

Mo soo o Iesu, o le ā le mea tatou te ole ai i le Atua, na te silafia lava le mea lelei mo i tatou. O le lapataiga foi mo soo o Iesu ma tagata uma i le uiga masani o le tagata o le alofa faapito. Seiloga o le tagata e alofa i ai pei o fanau e lē toe faatali, ae ‘a ole mai se isi tagata ona pepelo lea ma fai i ai e leai se mea. E lē faapena le Alii, e faatalitali foi le Alii mo le tagata e leaga ina ia suia ma faatuatua i le Atua. Ia tatou faia i isi pei foi ona tatou manana’o e fai mai e isi ia i tatou.

I le satauro o Keriso ma lona toetu ua tatou iloa ai le tāua o le saili i le Atua mo lo tatou faaolaina e ala i le loto salamō ma le faatuatua. Ua tatou iloa ai foi – oi tatou o ni tagata vaivai ma lē mafaia se mea, tatou te ole ma saili ma tuitui ai pea i aso uma ia Keriso ma lona mana ma lona alofa tunoa tatou te ola ai ma tutumau ai i le faatuatua i le Atua. Tatou te mafai ai foi ona faailoa atu iō tatou ola le alofa ma le agalelei o le Atua ma Keriso e tali atu ai i le ala sili ona lelei mo nisi e ole mai ia i tatou mo se fesoasoani.

GALUEGA FAATINO: Fesili & Tali

1. O ā upu tāua a Iesu e iloa ai lo tatou manaomia moni o le fesoasoani?

Tali: Ole e foaiina ma maua, saili e maua ma iloa ai, tuitui e toina ai

2. O le ā le fesoasoani a Iesu mo i tatou ona soo i ē ole mai ia i tatou?

Tali: Ia alofa ma agalelei atu i le ala sili ona lelei e tusa ma le mana’o

3. E talafeagai pe a tali atu iē ole mai i le tuufaafeagai o lona mana’o pei o le areto ae sui i le maa, o le ia ae sui i le gata?

Tali: E lē talafeagai auā e lē o le tali lea tatou te avatu ia tatou fanau tusa pe leaga ā latou amio.

4. O ai tagata ua tā’ua o tagata e leaga i le Tusi Faitau?

Tali: O tagata e lē agalelei ma alolofa i tagata ese o lo o manaomia se fesoasoani

5. O le ā le fesoasoani a Iesu i le va nonofo ai o ona soo?

Tali: E lē na o le manao ia fai mai le lelei e isi ia i tatou, ae ia tatou faia foi i isi tagata.

PESE: Faauta x2 (Behold x 2) (Pese Aoga Aso Sa & Autalavou).

AOAOGA

1. Alofa ma agalelei iē ole mai mo se fesoasoani
 2. ‘Aua le manatu faapito
 3. Ole ma saili ma tuitui i le Alii i aso uma i le tatalo
 4. O le tagata faatuatua o le tagata e faalagolago i le mana ma le alofa tunoa o Keriso.
-

ASO SA: (Aso Sa Laupama) 20 MATI, 2016

MATAUPU: UA PUAPUAGATIA IESU (Jesus suffers).

SINI: Ia aoao le vasega ina ia malamalama - o sauaga uma na faia ia Iesu, o le faailoga lea o le pule a le agasala ma le tiapolo i le olaga ma tagata uma. Ma ua puapuagatia ai Iesu ina ia faasaoloto mai i tatou e ala i le loto salamō ma le faatuatua i lona suafa.

TUSI FAITAU: Mataio 27: 27-44

FESOASOANI MO FAIAOGA

O le Tusi Faitau ua faamatala ai e Mataio mea leaga uma na faia e tagata o nuu ese ua tuuina atu i ai e taitai o le lotu Iutaia Iesu ina ia faamasinoina ma faasatauroina. O nei tagata o nuu ese o sui ia o le malo o Roma sa pulea le lalolagi i lea vaitau. E pei la o Pilato le kovana o le malo o Roma sa vaaia Palesitina i lea vaitau ua tā’ua e Mataio o le alii pule. O le ‘au uma ua tā’ua o fitafita ia a Roma ua faapotopoto e faatino le i’uga o le faamasinoina o Iesu e le alii pule po o Pilato.

Na amata mai i le suia o ofu o Iesu i le ofu mumu, auā e manatu nei tagata o Iesu o le tupu o tagata Iutaia pei ona ia tali ai i le fesili a Pilato (ff.11). Ua latou faaee foi i le ao po o le ulu o Iesu le pale ua fai i le laau tuitui ma ua latou tuu le ū i lona aao taumatau. O le ū o le faailoga o le sauā ma le sasa o le a faia ia Iesu. Ua mae’a lea ona latou tootuli ai lea i luma o Iesu ma faatauemu ia te ia, ua faapea, ‘Talofa, le tupu o tagata Iutaia!’. Ua latou feanu foi ma latou ta i le ao o Iesu. Ona latou tatala ese lea o le ofu mumu, ae toe faaofu ia te ia i ona lava ofu, ma ua taitai atu ia te ia ia faasatauroina.

Ua latou ō atu agai i Kolokota ma ua latou iloa le tagata ua igoa ia Simona le Kurene. Ua tauanau e fitafita o ia ia amoina le satauro o Iesu. O lona uiga ua tiga ma mafatia Iesu i le sasa ma le pale tuitui i lona ao. Ua taunuu Iesu i Kolokota, ona latou avatu lea ia te ia o le uaina ua fefiloi ma le laau oona ia fesoasoani i tiga o le Alii, ae na teena e Iesu. Ua latou faasatauro ia Iesu, ma ua latou tufatufa i ona ofu e ala i le vili. Ua latou faasatauro faatasi Iesu ma tagata faomea e toalua. O ē foi na ui ane, ua latou faifai ma lialia’i ō latou ulu ia Iesu a o tautau mai i le satauro (ff.39-40). Ua faapena foi i le au ositaulaga sili ma le au tusiupu ma toaina o le nuu (ff.41-42). Ua faapena foi ma tagata faomea na faasatauroina faatasi ma Iesu.

O lona uiga, e leai se vaega o le sosaiete o tagata pei - o le lotu, o le malo, o le tagata lautele, ma le tagata solitulafono, e le i aafia i le faasatauroina o Iesu. O lona uiga, e agasala, ma amioleaga, ma solitulafono tagata uma. E pei o la Paulo, na alofa mai le Atua a o agasala pea i tatou.

O puapuaga la o Iesu o puapuaga ma tiga o le alofa faaola o le Atua mo ona tagata ma le lalolagi uma. Auā o Iesu o le taulaga ma le togiola mo le faamagaloina o agasala e ala i le loto salamō ma le faatuatua i lona suafa.

O ē la ua fai ma soo o Iesu, ua ō latou tauave ia maosiosia ma faailoga o Iesu lo latou Matai, e ala i le loto maulalo ma le agamalu ma le usitai i le Atua, a o faifai ma tauemu ma faasauā mai le lalolagi ia i latou. O lo tatou manuia o lo o taatia i le fai ma auauna puapuagatia pei foi ona tiga ma puapuagatia Iesu ina ia tatou manuia.

GALUEGA FAATINO

1. O ai e faasino i ai le alii pule i le tala?
Tali: O Pilato le kovana o le malo o Roma i Iuta
2. O le ā le uiga o le ofu mumu ma le ifo o fitafita ia Iesu?
Tali: Auā o Iesu o le tupu o tagata Iutaia
3. O le ā le manatu o fitafita i le fuaitau lea, ‘Talofa, le tupu o tagata Iutaia?
Tali: O upu tauemu i le tupu ua faasalaina ia oti
4. O ai nisi na pei o fitafita na latou faia mea leaga ia Iesu?
Tali: O ē na ui ane e matamata, o taitai o le lotu Iutaia, ma tagata faomea na faasatauro faatasi ma Iesu.
5. Aisea na teena ai e Iesu le vai oona na avane e fitafita ia te ia?
Tali: O lona faasatauroina ma tiga uma ua oo atu ia te ia e fa’aatoatoa i le oti i le satauro, auā o lona ola paia e leai se agasala o le taulaga ma le togiola ia faamagaloina ai agasala a tagata uma e ala i le salamō ma le faatuatua i lona suafa.

PESE: Le toto paia o lo tatou Alii (Pese 35, Pese & Viiga EFKS).

AOAOGA

1. Na puapuagatia Iesu ina ia faaolaina i tatou
2. Na alofa mai Iesu a o agasala pea i tatou uma
3. ‘Aua le ola tauemu ma faasauā i tagata o le Alii

.....

ASO SA: (Aso Sa Toetu) 27 MATI, 2016

MATAUPU: UA SOIFUA MAI IESU NAI LE OTI
(Jesus rises from the dead).

SINI: Ia aoao le vasega ina ia malamalama, o le toetu o Iesu - o le atoaga lea o le faaolataga a le Atua mo le tagata agasala, ina ia fa’aatoatoaina e le mana o le Atua ma

lona alofa tunoa le faatuatua o ē ua talia Iesu Keriso e ala
i le loto salamō ma le faatuatua i lona suafa

TUSI FAITAU: Mataio 28:1-10

FESOASOANI MO FAIAOGA

Ua faamatala e Mataio le toetu mai o Iesu nai le oti i le uluai aso o le vaisapati o le Aso Sa lea po o le aso valu. Ua molimau foi Mataio i fafine e toalua o Maria le Makatala, ma le isi Maria e lē o tā’ua sona nuu. O le taimi na ō ai nei fafine o le tafa o ata po o le vaveao. O le taimi foi na tō pe na lūlū ai le mafuie tele, ona o le agelu a le Alii na alu ifo mai le lagi ma alu atu ma fuli ese le maa, ma tietie ai i luga o le maa. O le tino mai o le agelu a le Alii e pei o le uila ma ua sinasina ona ofu e pei o le kiona. I lea taimi sa i ai leoleo po o fitafita o lo o leoleoina le tuugamau o Iesu. O le latou vaaia o le mea ua tupu, ua tetemū ai, o lona uiga ua matuā fememeai ma fefefe ua liua ai i latou pei o tagata oti. O lona uiga e matuā matautia ma uiga ese le mea ua tupu i lea taimi e tupu ai le fefe ma le mata’u o le tagata. Peitai sa fai atu le agelu i fafine e ‘aia le matata’u auā ua ia iloa o lo o la saili ia Iesu na faasatauroina.

Ua faailoa foi e le agelu i fafine e le o i ai Iesu i le tuugamau, auā ua toetu mai o ia pei ona ia fetalai ai ia i latou. Ia la’ua ō atu foi e matamata i le mea na tuu ai o ia i totonu o le tuugamau. Ua faatonu foi e le agelu a le Alii nei fafine ina ia ō atu loa e ta’u atu i soo o Iesu ua toe tu mai o ia nai ē ua oti. E muamua atu foi o ia ia i latou i Kalilaia ma latou iloa ai o ia i lea mea.

Ua vave ō ‘ese fafine nai le tuugamau ma le fefe ma le fiafia tele; ua taufetuli foi e ta’u atu le tala ua la maua i soo o Iesu. Peitai ua fetalai’i Iesu ma i laua ae la te lei oo atu i soo o Iesu. Ua fetalai atu Iesu, “Si o’u alofa”. Ua la ō atu ma fetagofi i aao o Iesu, ma ifo atu ia te ia. Ua fetalai atu Iesu ia i la’ua, ‘aia la te matata’u, ‘a ia ō atu ma ta’u atu i ona uso po o ona soo, ina ia latou ō atu i Kalilaia, latou te iloa atu ai o ia.

O le soifua po o le toetu mai o Iesu nai ē ua oti – o le talalelei lea mo ona soo uma ma le Ekalesia. Ua atoatoa le faaolataga a le Atua i le toetu o Iesu. Ua togiola ā tatou agasala i lona maliu i le satauro, ma ua tatou maua le mana e fa’aatoatoaina ai lo tatou faatuatua e ala i lona toetu. Pe

a fa'aatoatoaina la e le mana ma le alofa tunoa o Keriso lo tatou faatuatua, ona fai lea o le toetu o Keriso mo i tatou.

O le talalelei la o le toetu, o le talalelei o le faafouina o soo o Iesu, ma lo latou faapaleina i le mamalu toetu o lo latou Alii Faaola i lona malo e faavavau. O le toetu o Iesu na aumaia le faamoemoe i loto o soo o Iesu, ae liua ai tagata lē faatuatua faapei o tagata oti i le mamalu silisili ese o le toetu o Iesu.

GALUEGA FAATINO: Fesili & Tali

1. O le ā le aso na toetu ai Iesu, ma o le a le ta'u o lea aso i le kalena?

Tali: O le uluai aso o le vaisapati po o le aso muamua o le vaiaso o le aso valu foi lea, ma o le Aso Sa lea i nei aso.

2. O le ā le sapati ua tā'ua e ese mai le Aso Sa po o le aso na toetu ai Iesu?

Tali: O le aso fitu lea po o le aso lea na malōlō ai le Atua mai aso e ono na ia faia ai le foafoaga, o se aso foi ua fai ma tulafono a le Atua pei ona i ai i tulafono e sefulu

3. Aisea ua lē liua ai fafine na ō i le tuugamau o Iesu faapei o tagata oti, ae ua na o leoleo tuugamau?

Tali: Auā oi la'ua o soo o Iesu o lo o saili ia Iesu na faasatauroina

4. O le ā le tāua o Kalilaia i le toetu o Iesu?

Tali: O Kalilaia na amata ai le galuega faaola a Iesu e ala i le papatisoga a Ioane; na filifilia ai ona soo; na mua'i fetalai ma feiloa'i ai Iesu ma ona soo; lea foi o le a ia toe fetalai ma faamavae ai ma ona soo, ma afio a'e ai i le lagi.

PESE: Pese 51, Pese & Viiga EFKS

AOAOGA

1. Ua tatou maua le mana ma le alofa tunoa ina ua toetu Iesu na maliu i le satauro mo ā tatou agasala
2. E lē ola pea se tagata lē faatuatua pe a fa'aali mai le mamalu o le Atua
3. Ia taitai e Iesu Toetu lo tatou faatuatua ma tumau ai

4. ‘Aua le sailia i tuugamau Iesu auā ua toetu o ia
 5. E le gata i le tuugamau le alofa o le Atua
-

ASO SA: 3 APERILA, 2016

MATAUPU: FAAMAONI I LE TAUTO (Live the vow).

SINI: Ia aoao le vasega ina ia malamalama, i le tāua o le faamaoni i le tauto e faia i luma o le Atua ma tagata, aua o le faailoga o le faasilisili i le manatu ma le faalagolago tasi o le Alii

TUSI FAITAU: Faamasino 11:29-35

FESOASOANI MO FAIAOGA

O le Tusi Faitau, o lo o faamatala ai e le Tusitala o le Tusi o Faamasino le Faamasino o Iefata. O ia o le tasi o Faamasino na tofia e le Atua e taitai i lona nuu o Isaraelu ina ua mavae atu Iosua. O le taimi o Faamasino o le taimi ua taunuu ma nonofo Isaraelu i laueleele o Kanana. O le taimi la o le faamasino o Iefata na sii taua ane ai le nuu o Amoni ia Isaraelu. Ua latou manatu, na fāoa e Isaraelu i lona alu a’e nai Aikupito o latou laueleele. Sa ave i ai e Iefata le sāvali i le tupu o Amoni e le i agaleaga Isaraelu ia i latou, ae le i talia e le tupu o Amoni (ff.12-28).

Ona o le tulaga ua lē maalofoa le sii taua mai o Amoni ia Isaraelu, ona oo lea ia Iefata o le Agaga o le Alii. O lona uiga, o le fouvale o se nuu ia Isaraelu, o le fouvale lava lea i le Alii le Atua. Ua afua mai le Alii, ma taitai e le Alii ona Faamasino i lea vaitau i mea latou te faia. O le oo o le Agaga o le Alii ia Iefata ua afua ai ona tula’i Iefata ma sauni e tau ma Amoni. Ae aisea ua faia ai e Iefata le tauto i le Alii pe a tuuina mai e le Alii Amoni i ona lima? Pe ua masalosalo ea i le auai o le Alii ma le taitaiga a le Alii?

O le tauto a Iefata – e fai mo le Alii se tasi e ulufafo mai i lona fale pe a foi atu ma le manuia nai le fanauga a Amoni, pe na te fai ai se taulaga

mu. I le tulaga o sē ‘e ulufafo mai i lona fale e fai mo le Alii pe na te fai ai se taulaga mu, o lona uiga o le tauto a Iefata e lē o le masalosalo, a o le faatinoga o le tali atu i le Alii o le faailoga o le faasilisili o le Alii i le loto ma le mafaufau, ma le tataui i le Alii le Atua o le viiga ma le faafetai auā o ia e toatasi ma lona malosia ma lona alofa tunoa ua tau ai Isaraelu ma ona fili ma manumalo ai.

I le tala na tula’i Iefata ma alu e tau ma Amoni, ma ua tuuina atu e le Alii Amoni i lima o Iefata. O le fasi e matuā tele lava, ma ua faatolaloina ai le fanauga a Amoni. Ua alu Iefata i lona fale ‘a ua faafetaia’i o ia e lona afafine ma topa ma siva. E toatasi lava o ia na o le pau lea o lona tofi mai le Alii. Ua vaai ma iloa e Iefata lona afafine e toatasi, ma ua ia saei ona ofu. Ua ia fai atu, ‘Auē! Lo’u afafine e, ua e matuā faatigaina a’u’. Ua ia ta’u atu i lona afafine lona tauto i le Alii, e lē mafai ona ia faafai mai.

Ua aoao mai lenei tala i le mea silisili ona pele ma taugata ma tāua iō tatou loto o le mea tataui foi lea e ofo mo le Alii e ala i taulaga. E ui ina tiga peitai, ua faagaogao i tatou ae ofo atu lea mea sili mo le Atua. O le mea foi e tauto ai e tataui lava ona faamaoni i ai. Ia faasilisili pea le Alii iō tatou loto ae le oi tatou auā o ia ua tatou manumalo ai ai le fili ma ana mailei.

I le satauro o Keriso, ua fa’aalia ai le faamaoni o le Atua i le mea sa na tauto ai ia Aperaamo, o so lau fanau e manuia ai nuu uma o le lalolagi. O le Atalii Pele e Toatasi o le Atua ua auina mai o le taulaga ma le togioia ia faaolaina i tatou ai le fili ma ana mailei le tiapolo ma le agasala ma ona tuinanau leaga.

O lona toetu ua tatou saoloto ai e ala i le loto salamō ma le faatuatua i le suafa o Iesu Keriso. Ma ua fai ai ō tatou ola ma tauto – o le taulaga ola e paia ma malie i le Alii. Ua tatou faamoemoe tasi ai i le mana ma le alofa tunoa o Keriso o ia e toatasi o lo tatou Alii ma lo tatou Atua ua tatou manumalō ai, ma tatou te manumalō ai pea seia oo i le iuga.

GALUEGA FAATINO: Fesili & Tali

1. O le ā le uiga o le fuaitau, “Ua oo ia Iefata le Agaga o le Alii”?

Tali: O lo o taitaiina e le Agaga o le Alii Iefata lana Faamasino i mea na te fai.

2. Aisea ua faia ai e Iefata le tauto pei ona ia faia?

Tali: Ia faasilisiliina pea le Alii i lona loto ma lona manatu atoa, auā o ia e toatasi e tau mo Isaraelu ma manumalo ai Isaraelu.

3. O le ā le fuaitau i le f.32 e iloa ai o le Alii e toatasi e manumalo ai Isaraelu?

Tali: ‘... ua tuuina atu foi i latou e le Alii i ona lima..’

4. O le ā le uiga o le fuaitau, o lona afafine e toatasi?

Tali: O le pele ma sili lona tāua i le manatu ma le loto.

5. Aisea ua tiga ai Iefata i lona afafine?

Tali: Auā o le a ofo atu o ia e toatasi mo le Atua

PESE: Tautuana le Alii le Faaola (Pese & Viiga EFKS).

AOAOGA

1. Ia faamaoni i tauto e faia i luma o le Alii
2. Ia fai le ola ma tauto tatou te ofo atu ai ō tatou ola o le taulaga ola e paia ma malie i luma o le Alii
3. E tāua tauto o le faailoga o lo tatou faasilisili o le Alii
4. O Iesu Keriso o le Atalii Pele e Toatasi o le Atua na fai ma taulaga ia togiola ai i tatou.
5. Ave le mea sili ona lelei ma pele i le manatu, mo le Atua

.....

ASO SA: **10 APERILA, 2016**

MATAUPU: **IA AUAUNA FAAMAONI** (Be faithful).

SINI: Ia aoao le vasega ina ia malamalama – o le auauna ma le faamaoni i tiute ua tofia ai, o le

faailoga o lo tatou alolofa moni i lē na filifilia i tatou faapei o le Ekalesia ia Keriso.

TUSI FAITAU: Luka 16:1-9

FESOASOANI MO FAIAOGA

O le Tusi Faitau o le faataoto a Iesu i le tagata mauoa ma lana auauna e pule i ana mea. Ua molia e le mauoa lana auauna e pule i lona faamaumau o ana mea. Ua ia valaau atu ia te ia ina ia faamatala mai le mea ua tupu, ma e le toe faia o ia ma auauna e pule. Ona manatu lea o lenei auauna i se mea na te faia e tua i ai, auā e le mafai ona ia eli pe galue i le fanua, e mā foi e aisi. Ua ia amiami i tagata taitoatasi na aitalafu i mea a lona alii po o le mauoa ina ia faia i ai le auala ua ia iloa e alofagia ai o ia e o latou aiga, pe a tuueseina o ia i le faiva o le auauna e pule. Ua fesili atu o ia i lē na muamua pe fia ana na aitalafu i lona alii. Ua ia tali mai, o kalone o suauu e afe. Ua ia fai atu ia te ia, ia tago i lana tusi ma tusi e lima selau. Ua sau foi le tasi ma fai mai o taga saito e selau na ia aitalafu. Ua ia fai atu foi, ia tago i lana tusi ma tusi e valu sefulu.

O le mea ua faia e lenei auauna lē faamaoni pe amioletonu, o se auala e mafai ai ona alofagia o ia e aiga o tagata na aitalafu i mea a lona alii. Auā foi e lē o tagata na aitalafu e leaga, a o ia lava i lona faamaumau o mea a lona alii. O lona uiga, ua ia fa’aaoga oa a le mauoa po o lona alii mo lona lava lelei toatasi, ma le faamalieina o lona mana’o i se ala lē tonu. Peitai ua iloa e le alii po o le mauoa le mea ua faia e lana auauna e pule, ona vivii atu lea o ia ia te ia. Ua ia faapea, ‘auā ua na togafiti poto; auā e sili le poto o tagata o le olaga nei, i lo latou tupulaga, i lo tagata o le malamalama.

Ona aoao lea o Iesu i ona soo, Ou te fai atu foi ia te outou, o le oa o le amioletonu ia outou fai ai uō ma outou, ina ia latou talia mai outou i fale faavavau, pe a oo ina lē toe aogā ia mea’.

Ua aoao mai lenei tala i le tāua o le poto ua maua, ma ia fa’aaoga tonu lea poto i le faatinoina lelei o galuega ua tofia ai. Ia lē faamaumauina ai aseta mo le lelei ma le manuia lautele i le fai o le tulaga ua tofia ai ma ala e le faamaoni ai. E faapena le auauna e pule i mea a le mauoa, ana le

iloa o le a tuueseina o ia, e lē fa’aaoga lelei lona mafaufau i le oa o le amioletonu na avatu e le mauoa e tausi ma fai ni auala pei o le aitalafu e fesoasoani ai i nisi tagata.

Tele tagata ua faia ala faapiopio mo le lelei toatasi galo ai le lelei o tagata e toatele. I le aoaoga a Iesu - o le oa o le amioletonu o le tā’uga lea o le oa a le mauoa i le faataoto. O lona uiga so o se oa lava i lenei lalolagi e tā’ua o le oa o le amioletonu. Auā foi e tele togafiti e faia ai e oo lava i le soona faamaumau i le lelei toatasi ma le lē faamaoni. O le aoaoga la a Iesu, ia tatou alolofa ma agalelei atu i nisi o manaomia le fesoasoani e ala i le oa o le amioletonu. Auā ‘a oo ina lē toe aogā ia mea pe a oo mai le iuga o le ola e ala i le oti, po o le faamasinoga mulimuli foi i le lumana’i, e talia mai i tatou i fale faavavau po o le ola e faavavau.

I le satauro o Keriso, ma lona toetu, ua tatou maua ai le mafaufau sa ia Keriso Iesu – o le auauna ma le faamaoni e ala i le loto salamō, ma le faatuatua i lona suafa. Ua mafai ai foi ona tatou alolofa ma agalelei fua atu i nisi i le oa o le amioletonu tusa pe le oi tatou o ni mauoa ma tele ni ā tatou oa.

GALUEGA FAATINO: Fesili ma Tali

1. Aisea na tuueseina ai e le mauoa le auauna e pule i ana mea?

Tali: Ua ia lē faamaoni e ala i lona faamaumau o ana mea

2. O le ā le ala na faia e le auauna e pule ina ia maua ai sona lavea’i?

Tali: Ia faamagalo e lē totogia nisi o mea a lona alii na aitalafu e tagata.

3. O le ā se aoaoga o lo o i le afe kalone suauu na aitalafu ae faamagalo le lima selau, ma le selau taga saito ae faamagalo le lua sefulu?

Tali: O le tele o lo tatou aitalafu o le faailoga o lo tatou alofa tele atu, ma o le tele foi lea o lo tatou faamagaloina.

4. Aisea ua vivii atu ai le alii po o le mauoa i lana auauna e pule?

Tali: Ona o lana togafiti poto e mafai ai ona maua sona lavea'i pe a tuuina ese o ia e ala i lona faamagalo o ana mea na aitalafu e tagata.

5. O le ā le aoaoga a Iesu i lenei faataoto mo ona soo?

Tali: E tāua le oa o le amioletonu pe a tatou alolofa ma agalelei ai i nisi o fia maua se fesoasoani.

PESE: Pese 183, Tautuana le Alii le Faaola (Pese & Viiga EFKS).

AOAOGA

1. Ia faamaoni i feau ma tiute ua tofia ai
 2. Ia ola alofa atu e ala i le faamagalo o aitalafu a tagata ia i tatou
 3. Fa'aaoga le oa o le amioletonu e alofa ma agalelei ai i nisi tagata
-

ASO SA: 17 APERILA, 2016

MATAUPU: **LOTOTELE MA LOTOMAU** (Be strong and persistent).

SINI: Ia aoao le vasega ina ia malamalama, o le lototele ma le lotomau i le mata'u ma le faatuatua i le Atua, e laveaiina ai i latou mai le pule a le oti ma le tiapolo i le olaga

TUSI FAITAU: (Mo le Faiaoga: Tanielu 6:1-17); (Mo le Vasega: Tanielu 6:18-24).

FESOASOANI MO FAIAOGA

I le Tusi Faitau o lo o faamatala ai e le Tusitala le lototele ma le lotomau o Tanielu le perofeta a le Atua. Na afua ona ua faia le vavao a Metai ma Peresia le nuu o lo o pulea tagata o le Atua ina ua mavae atu le malo o Papelonía sa faatafeaina tagata o le Alii. Ua mafua lenei vavao ona o alii silisili sa tofia e le tupu faatasi ma Tanielu. Ua la saili

se mea e faasala ai ia Tanielu, auā ua sili Tanielu ia i lā'ua alii silisili ma alii sili uma ina ua tele lona atamai, ma sa manatu foi le tupu ia tofia o ia ia pule i le malo uma. Ua iloa foi e nei alii le leai o se mea e leaga ai Tanielu i tulafono a lona Atua po o le Alii. Ua latou ō ai i le tupu ma fai atu i le tupu ia faia se vavao ma ia faamauina e le tupu. O le vavao e fesootea ma le ola tatalo ma faatoga a Tanielu i le Alii. O le vavao la, ai se tasi e faatoga atu se mea mai se tasi atua, po o se tagata, ae ia tau lava o le tupu e faatoga i ai i pō e tolugafulu, ia lafoina o ia i le lua o leona. Ua finagalo foi i ai le tupu e ui e le o lona finagalo lea. Ua faamauina foi le vavao ma tusi le tusi a le tupu o Tariu ua le talaina faapei o tulafono a Metai ma Peresia.

O lenei vavao ua sunu'i tonu lava i faavae ma aiaiga o le ola faatuatua o Tanielu i le Atua o ia o le Atua moni ua manuia ma silisili ai Tanielu i ia nuu ese. Auā foi e le mafai lava e Tanielu ona tuu lona tiute i le Atua o le mafuta atu ia te ia i le tatalo i po e tolugafulu pe tolu sefulu. Ua tofotofoina foi Tanielu i le togafiti ua faia pe tumau ma loto tele e uu mau lona faatuatua i le Atua. Ae sa tumau ma lototele pea Tanielu. O le taimi lava na tusia ai le tusi ma faamauina e le tupu, na alu ai Tanielu i lona fale ma tatalo ma faatoga i le Atua e tai fo'i faatolu i aso ona tootuli i ona tulivae, ma tatalo, ma faafetai i luma o lona Atua, faapei ona masani ai o ia. Ua lolofi ane foi o alii sili ma alii sa faufau e faalani se mea e molia ai Tanielu ma maua o ia o lo o tatalo, ma faatoga atu i luma o le Atua. Ua ō latou o atu foi ma ta'u atu i le tupu le mea ua faia e Tanielu. Ua faalogo i ai le tupu, ona tiga ai lea o lona finagalo. Ua tiga i lona alofa ia Tanielu ae ua le mafai i le faamanatu pea e ona tagata o tulafono a Metai ma Peresia e le talaina lava se vavao, po o se tulafono ua faamauina e le tupu. Ua faia lava ia Tanielu le i'uga o le vavao ua ia solia. Ua lafoina Tanielu i le lua o leona. Ua fai atu foi le tupu ia Tanielu, o lona Atua ua ia auaina i ai e le aunoa, o ia lava na te lavea'i ia te ia. Ua aumai foi le mama ma tuu i le gutu o le lua, ma faamaufaaailoga i le mama a le tupu atoa ma mama a alii sa ia te ia, ina ne'i liua le pule ia Tanielu. I le iuga o le tala sa faasaoina e le Alii Tanielu ona o lona faatuatua, o lona uiga o lona lototele ma lotomau i lona faatuatua i le Atua. Ua taitaiina mai foi tagata sa molia Tanielu, ma ua laoina ma o latou aiga i le lua o leona ma faaumatia ai i latou e leona.

I le satauro o Keriso ua faaolaina ai i tatou nai le pule a le oti ona o le ola agasala, faapea togafiti a le tiapolo ia molia ma fasiotia i tatou e ala i le loto salamō ma le faatuatua i lona suafa. O lona toetu ua tatou maua ai lona Agaga ma lona alofa tunoa tatou te malolosi ma lototele ma lotomau ai pea seia oo i le iuga. Ia tatou savavali pea i le tulafono i le faatuatua ma tumau ai tatou te faapea ai pei o la Paulo, ‘o lo’u ola ua ia Keriso lea, a o lo’u oti o lo’u manuia lea’.

GALUEGA FAATINO: Fesili ma Tali i le Tusi Faitau

1. Aisea ua le taumafa ai le tupu ma lē moe?

Tali: Ona o lona alofa ia Tanielu lana alii sili ua lafo i le lua o leona

2. O le ā le uiga o le leo faamama’i na alaga ai le tupu ia Tanielu i le lua?

Tali: O le alaga ma le faamoemoe peiseai e lē o afaina Tanielu o lo o ola pea.

3. Aisea ma o le a le mea taua ua lavea’i ai e le Atua Tanielu?

Tali: Ua leai sana amio sese i luma o le Atua, ua faapena foi ona leai sana amio sese i lona fai ma alii sili a le tupu

4. O le ā le mea e aveina a’e ai i tatou nai le lua po o le faatusa o le oti ma le tuugamau?

Tali: O le faatuatua i le suafa o Iesu Keriso le Alo o le Atua na faatuatua i ai Tanielu

5. O le ā le tau i o le tagata faufau leaga i tagata o le Alii?

Tali: E faasalaina ma tauia i latou i mea leaga sa latou faia i isi

6. O ai le faataitaiga i le Tusi Paia o le tagata faufau leaga i isi tagata?

Tali: O Saulo ia Tavita ma taitai o le lotu Iutaia ia Iesu

PESE: Galue ia seia uma ai (Pese 177, Pese & Viiga EFKS).

AOAOGA

1. Ia tumau i le faatuatua e maua ai pea le lototele ma le lotomau
2. ‘Aua le fefe i tagata ‘a ia fefe ma mata’u i le Atua
3. E le mafaia e le ata o le oti ona faaumatia tagata o le Alii

.....

ASO SA: 24 APERILA, 2016

MATAUPU: FAAMOEMOE I LE ATUA (Depend on God).

SINI: Ia aoao le vasega ina ia malamalama – o le faamoemoe i le Atua ia fa’aalia i le tagata atoa ua auauna i le Alii ma le loto sa’o ma le faamaoni

TUSI FAITAU: Iosua 24:14-25

FESOASOANI MO FAIAOGA

O le Tusi Faitau ua faamanatu ai e Iosua ia Isaraelu le natura o lona valaauina e le Atua, faapea le faataunuuina o lea valaauina e tusa ma le finagalo o le Atua. Ia o latou faamoemoe tasi i le Atua e ala lea, (i). Ia mata’u i le Atua ma auauna ia te ia ma le loto sa’o ma le faamaoni. (ii). Ia tuueseina atua na auauna i ai o latou tamā a o le i o mai i Kanana. Pe afai la e leaga ia i latou le auauna i le Alii, ia filifili i latou po o atua na auauna i ai o latou tamā a o le i sopoia le Ioritana, po o atua o sa Amori e ona le nuu ua latou nonofo ai. A o ia ma lona aiga, latou te auauna i le Alii le Atua.

Ua faamanatu atu e Iosua ia Isaraelu le mataupu o lo o taatia ai lona lumanai manuia tainane le uiga tonu o lona fai ma nuu o le Atua. O i latou e ala atu ai le olataga a le Alii i le lalolagi uma. Ua faalogo le nuu ma ua latou lagona le tāua o le mea ua faamanatu mai e Iosua lo latou taitai.

Ua tali mai le nuu latou te le tuua lava le Alii ae auauna i atua ese. Auā o le Alii lava e toatasi na ia faasaoloto i latou ma o latou tamā nai Aikupito o le mea sa nofo pologa ai. O le Alii foi na faia vavega po o faailoga tetele ma na leoleo ia i latou ai le ala uma na o mai ai i le vao. Na ia tulia foi iō latou luma o nuu uma na ui mai ai Isaraelu. Ua faapena

foi ma sa Amori e ona le laueleele ua nonofo ai. Ma latou te auauna lava i le Alii lo latou Atua.

Ua tali atu Iosua ia Isaraelu - latou te le mafai ona auauna i le Alii, aua o le Atua paia o ia; o le Atua fuā foi o ia; na te le faamagaloina ā latou solitulafono ma ā latou agasala. ‘A ō latou tuua le Alii ma auauna i atua ese, ona liliu mai lea o ia ma faatiga ia i latou ma faaumatia i latou, a o ia na mua’i agalelei ia i latou.

Ua tali mai le nuu ia Iosua, e leai; latou te auauna lava i le Alii. Ua faalogo Iosua ma ua ia fai atu i le nuu o le Atua, o molimau lava i latou ia i latou e tusa ma upu ua ō latou fai mai ai. Ua tali mai le nuu ua lelei o molimau lava i latou.

Ona fai atu lea o Iosua o mea e amata ai ona faamamalu le faamoemoe tasi o Isaraelu i le Alii. (i). Ia tuu ese ia o atua ese o lo o ia i latou, ma ia ua’i ō latou loto i le Alii le Atua o Isaraelu. Ua tali mai le nuu, latou te auauna i le Alii lo latou Atua; latou te faalogo foi i lona siufofoga. Ua osia e Iosua i lea aso o le feagaiga ma le nuu, ua faia foi mo i latou le tulafono ma le faamasinoga i Sekema.

I le satauro o Keriso ua osia ai la tatou feagaiga ma le Alii le Atua na faamanatu e Iosua ia Isaraelu anamua ia faamoemoe tasi i ai, e ala i le toto paia o Iesu Keriso. O lona maliu i le satauro ma lona toetu ua faamamaina ai atua faapaupau ma mamate na tatou auauna i ai anamua e ala i le loto salamō ma le faatuatua i lona suafa.

‘A le fa’aalia fua e tatau ma le salamō faapea le faatuatua iō tatou olaga – e lē oi tatou o ni tagata e faatuatua i le Alii. Tatou te le o faalagolago ma faamoemoe i le Alii. E lē o le ta’u o le kerisiano ae ifo i tupua o le lalolagi ua tumu ai le loto, ma ua le faalogo ai i le Atua. Pe a tatou le auauna i le Alii ma faalogo i lona siufofoga, e i ai faigata e aafia ai le ola auā o atua mamate ua tumu ai ō tatou loto e patino i le fai o le agasala, ma le faamalie o le manao ma tuinanau leaga.

GALUEGA FAATINO: Fesili & Tali

1. O ā ni mea na faailoa e Iosua ia Isaraelu e iloa ai ua faamoemoe tasi Isaraelu i le Alii lo latou Atua?

Tali: Ia auauna i le Alii ma le loto sa’o ma le faamaoni, ma ia fai ō

latou ola ma molimau ua na o le Alii lava ua latou auauna, ma faalogo i ai.

2. O ā mafuaaga na ta'u ane e le nuu ia Iosua o le tāua o le auauna i le Alii e toatasi?

Tali: O le Alii na faasaoloto i latou ma o latou tama nai Aikupito sa nofo pologa ai; na ia faia iō latou luma o faailoga tetele; na ia leoleo ia i latou nai le ala uma na latou ui mai ai; ua tulia foi e le Alii o sa Amori e ona le eleele ua nonofo ai nei.

3. O le ā le uiga o upu a Iosua i le ff.19-20?

Tali: O le ola faaoleole ma le ola tofotofo e se tasi o le Alii e liliu mai ai le Alii ma faatiga ia i latou, ma faaumatia i latou aua o le Atua paia o ia e le tutusa ma atua mamate o nuu tuaoi ma le lalolagi.

4. O le ā le uiga o upu a Iosua i le f.22?

Tali: Ia fai le ola ma molimau i lo latou ola auauna ma faalogo i le Alii

PESE: Le masalosalo ia tia'i ai (Pese 224, Pese & Viiga EFKS).

AOAOGA

1. Faailoa mai i le ola loto sa'o ma faamaoni le moni o le ola faamoemoe i le Alii
2. 'A le auauna i le Alii o lona uiga o lo o auauna i atua mamate
3. Vaai ane nei e fai oe ma ou manao ma tuinanau ma atua mamate e te auauna i ai ma faalogo i ai
4. Ua tele le faaumatia o tagata i le atua i le manava

.....

ASO SA: 1 ME, 2016

MATAUPU: AVE SE ULUA'I FUA MO LE ATUA (Give a first fruit for the Lord).

SINI: Ia aoao le vasega ina ia malamalama – o le uluai fua o le faailoga o le muamua ma le faasilisili o le Atua iō tatou olaga e oo lava ia tatou tatulaga e ave mo le Alii e ala i lana Ekalesia

TUSI FAITAU: Kenese 4:1-7

FESOASOANI MO FAIAOGA

O le Tusi Faitau o lo o faamatala ai e Kenese le taua o le taulaga e faia i le ulua’i fua o le lafu po o le fanua foi. O le tala o lo o faamatala ai le uluai aiga na faia e le Atua i le amataga. O Atamu ma Eva ma le la fanau tama o Kaino le ulumatua ma Apelu le uii. O tama e eseese a la galuega, o Kaino o le fai faatoaga a o Apelu o le fai lafu manu. O le fuaitau, ‘ua oo ina atoa o aso’ – o lona uiga, ua oo i le taimi o le seleselega e tatau ai ona ofo atu le taulaga faafetai i le Atua mo le iuga o taleni sa galulue ai. Ua faia foi e nei tama o le taulaga. Ua avatu e Kaino o le fua o le fanua o le taulaga i le Alii, a o Apelu ua ia avatu le ulua’i fua o lana lafu manu o ē pepeti ai lava.

O le fesili, o le ā le eseese a taulaga a nei tama? O le tali, o Apelu o le ulua’i fua a o Kaino e lē o se ulua’i fua. O lona uiga, e le o avea e Kaino le mea sili ona lelei i lona manatu mai lana faatoaga mo le Alii. O le mea sili ona lelei pei ona faia e Apelu – o le uluai fua o le faatoaga pei o ulua’i tama a lana lafu o e pepeti ai lava. E afua mai le loto le fai mea sili mo le Alii e le gata i fua o o tatou lima, a o le ola foi ma taleni ia fai ma taulaga ola mo le Alii e ala i le amio lelei ma le faamaoni.

I le satauro o Keriso ma lona toetu ua fausia ai e le Alii se loto fou ma se loto talitonu io tatou tagata e ala i le galuega lilo a lona Agaga Paia. Ma ua fua mai ai iō tatou olaga fua e tatau ma le salamō faapea galuega o le faatuatua. Ua mafai ai ona tatou fai taulaga amata mai iō tatou ola ua fai ma taulaga ola, ma ua iloaitino ia tatou taulaga ua ofoina mo le Alii faapei ona fai e Apelu.

GALUEGA FAATINO: Fesili & Tali

1. Aisea ua ave ai e Apelu le ulua’i tama a lana lafu mo le Alii?

Tali: Auā o le taulaga sa’o lea mo le Atua aua e le avea i le Alii se mea lona lua pe tolu foi a o le mea muamua e silisili ona lelei

2. O le ā le uiga o le taulaga a Kaino na fai mo le Atua?

Tali: E le o se taulaga lelei auā e le o faasilisili le Atua i le loto, o le faailoga foi o le manatu mama i taulaga i le Atua auā e le o se ulua’i fua.

3. Aisea ua ita ai Kaino ia Apelu ina ua le silasila le Alii i lana taulaga?

Tali: E faapena le uiga o le tagata fai mea leaga ma amio leaga e oo lava i le lotoleaga ma le loto mataua i tagata fai mea lelei ma amio lelei

4. O le ā le tāua o le fai o le amio lelei i luma o le Atua ma isi?

Tali: Tatou te maua ai le fiafia ma tatou iloa ai le tāua o le mata’u i le Atua ma faatuatua ia te ia.

PESE: Pese 158, Pese & Viiga EFKS

AOAOGA

1. Faasilisili le Atua iō tatou loto ma ia faailoa mai ia tatou taulaga
2. E le fai taulaga lelei se tagata amio leaga
3. O Iesu o le ulua’i fua ma le faapolopolo o le Alo Pele e toatasi o le Atua na faia ai le taulaga togiola mo ā tatou agasala

.....

ASO SA: 8 ME, 2016

MATAUPU: Aso Sa Tinā: **TINĀ AGALELEI** (A loving mother).

SINI: Ia aoao le vasega ina ia malamalama, o le ola agalelei atu e afua mai le Atua e ala i faamanuiaga ua foai mai e le Alii ia i tatou

TUSI FAITAU: 1Samuelu 1:24-28

FESOASOANI MO FAIAOGA

O le Tusi Faitau ua faamatala ai le tina o Hana ma lona agalelei i le Atua ma lana galuega. Ua ia ofo atu lana tama o Samuelu i le Alii i aso uma o lona ola. O se tama na foa'i mai e le Alii mo ia e tusa ma lona mana'o ma lana tauto i le Atua. Ua te'a le tama ma le susu ona la o a'e lea ma ia e momoli o ia i le Atua. O le taimi o lo o faamautu i Sailo le fale o le Alii po o le fale fetafa'i o lo o nofo ai le faitaulaga o Eli. Ua le gata ina momoli le tama o Samuelu ia fai lona ola atoa e auauna ai i le Alii pei ona tauto ai Hana i le Alii, a o meaalofa foi ua ofoina faatasi atu ma le tama. E le gata o meaalofa e tusa ma tu ma aga faaletapuaiga, ae ua fa'aalia ai le fai mea sili ma le mea lelei i le manatu ma le loto e ofo mo le Atua ma lana galuega. Ua ave e Hana povi po'a taanoa e tolu, o le efa e tasi o falaoa, ma le fagu pa'u o uaina. Ua latou fasi foi le tasi povi e momoli ma avatu ai le tama ia Eli le faitaulaga, ma faailoa atu ai ia Eli le uiga o le aumaiga o Samuelu ia Eli le faitaulaga i le fale o le Alii.

Ua aoao mai lenei tala i le tāua o le ola agalelei mo le Alii ma lana galuega. Ua tatou iloa foi i lenei tala o le Alii lava e afua mai ai le ola agalelei. Ua ia agalelei ia Hana e tusa ma lona mana'o ma lana tauto, ua faapena ai foi Hana ona ia agalelei i le Atua e ala i lana galuega. Ana le foi e le Alii le tama ia Hana, semanu e le fa'aalia galuega agalelei a Hana mo le Alii ma ana auauna. E fia totoina lea fua o le Agaga o le Atua io tatou loto ma mafaufau. Ae e le mafai ona tatou agalelei atu pe a le afua mai le Atua. Afua faapefea? I le satauro o Keriso ua togiola ai a tatou agasala ma lo tatou ola agaleaga. O lona toetu ua tatou maua ai lona Agaga ua fanaufouina o tatou loto ma tupu ai lo tatou salamō ma le faatuatua i lona suafa. Ua afua ai ona tatou fai mea sili ma ave le mea sili ona lelei iō tatou manatu mo le Atua.

GALUEGA FAATINO: Fesili & Tali

1. O le a le taimi na ave ai Samuelu i le Alii?

Tali: Ina ua te'a o ia ma le susu

2. O a mea na ave e Hana e momoli ai Samuelu i le Alii faapea Eli le faitaulaga?

Tali: O povi po’a taanoa e tolu, o le efa e tasi o falaoa, ma le fagu pa’u o uaina. Ua fasi foi le tasi povi e momoli atu ai o ia ia Eli le faitaulaga.

3. Aisea ua faia ai e Hana lenei foa’i mo le Alii?

Tali: Auā ua agalelei le Alii ia te ia ma foa’i mai le tama sa ia faatoga ai ia te ia.

4. O le ā le umi o le a nofo ai Samuelu i le fale o le Alii ma auauna ia te ia?

Tali: O aso uma e ola ai o ia

PESE: Ave lou ola ia aogā (pese 157, Pese & Viiga EFKS).

AOAOGA

1. Salamō ina ia fa’aalia le agalelei o Iesu iō tatou olaga
2. ‘A talia meaalofa ua agalelei mai ai le Alii, o le faamanatu foi lea mo i tatou ina ia tatou tali atu i le loto faafetai faatasi ma taulaga e agalelei ai i le galuega a le Atua
3. Ola agalelei faapei o o le tina o Hana ae ‘aua le ola agaleaga

.....

ASO SA: 22 ME, 2016

MATAUPU: IA FAAPAIA LE ASO SA (Sanctify the Day of the Lord)

SINI: Ia aoao le vasega ina ia malamalama i le tāua ma le uiga loloto o le tulafono i le sapati, ma lona fesootaiga ma le Aso Sa na toetu ai Iesu le Alii o le sapati.

TUSI FAITAU: Esoto 20:8-11

FESOASOANI MO FAIAOGA

Ua faamatala e Esoto i le Tusi Faitau le tulafono a le Alii i le sapati. E fesootai lea tulafono i le sapati ma le tala a Kenese i le aso na faauma ai e le Alii lana galuega. “Ua faauma e le Atua i le aso fitu lana galuega na faia e ia; ona malolo ai lea o ia i le aso fitu i lana galuega uma na faia e ia. Ona faamanuia atu lea e le Atua i le aso fitu, ma na faasaina ai.” E tolu mea tāua ua tā’ua e Kenese. (i). O le aso lea na malolo ai le Atua mai aso e ono na ia foafoa ai le foafoaga aoao. (ii). O le aso ua faamanuia i ai le Atua. (iii). O le aso ua faasaina e le Atua. O le isi mea tāua i lenei aso e ese mai ai i aso e ono, e leai sona afiafi ma sona taeao. O lona uiga, o le malologa ua faia e le Atua e leai sona taimi. O lona uiga o le malologa e fesootai ma lona ola i le faavavau. E fesootai ma ia – o le Atua o le vavau ma le faavavau. O lona lea malologa e fai foi mo le tagata na ia faia.

O le toe faamanatu o lenei tulafono ia Israelu i taimi o tupu, ua faailoa mai ai le soli sapati ma le le faapaiaina o le sapati e tagata o le Alii i lea vaiata. Pe a faamamalu foi le sapati, e faamamalu i le vaaiga i fafo ae le faapena i le loto. Auā e faapefea ona faapaia le sapati ae ifo i tupua ma tapuai i atua ese; e le agalelei i le sapati i le tagata mativa ma le tagata ma’i; e mulilua ma faitaaga, e fasioti tagata ma lē ava i matua? Ae ā pe a lava galuega e saili ai le ola lelei i le tino i aso e ono, ae tuu le aso sapati o le aso fitu lea e mafaufau ai i le Alii? Ia malolo ai ma tapuai ai i le Atua. Ia fai lea aso ma aso e toe faitau ai le tulafono ma poloaiga a le Atua. Ia faapotopoto ai le nuu uma ma talotalo ma fai ai taulaga i le Atua.

O le uiga o le upu ‘sapati’ o le mapu. O lona uiga ia mapu ai le tagata mai le tiga o aso e ono sa galue ai, faapea tiga uma o lona olaga atoa. Ae ā le tiga ma le lē maalofia o le tiga o le oti e gata ai uma tiga? E fesootai uma lava tiga ma le mataupu i le sapati ma lona uiga o le mapu. O la Paulo, afai tatou te faatigaina faatasi ma le Alii, tatou te faamanuiaina faatasi foi ma ia.

O le mataupu i le sapati sa fesiligia ai e taitai o le lotu Iutaia Iesu i lona faamalolo o ma’i i le sapati ma ona soo ua ō latou tau saito i le sapati ma aai ai ina ua fia aai. Sa tali Iesu o ia o le Alii o le sapati. E le i faia le tagata mo le sapati, a o le sapati na faia mo le tagata. O lona uiga o le faamoemoe o le sapati o le mapusaga ma le malologa e faavavau e tusa

ma le ola i le faavavau o le Atua, ua faamaite mai e Iesu i ana faamalologa ma le tau ai e ona soo o au o saito i le sapati ma aai ai.

O le atoatoa o le uiga ma le aogā o le sapati o se tasi o tulafono o tulafono e sefulu a le Alii mo ona tagata filifilia – na faataunuuina ia Iesu Keriso. Na ia fetalai, e lei sau e tatala le tulafono ma le au perofeta, ‘a ia faataunuuina. Na ia maliu tiga ai i le satauro ma tanumia i le tuugamau a o le i oo i le taimi amata o le sapati. Na malolo ai lona tino paia i le tuugamau i taimi o le sapati seia mavae le sapati, ma toe tu mai i le uluai aso o le vaisapati. E oo lava i le taulaga togiola sa ia faia i lona soifua paia na te le i solia ai le tulafono i le sapati. Auā o ia o le Alii o le sapati. Ma ua ia avatu lea faamanuiaga faavavau o le sapati mo i latou uma o ē salāmō i agasala ma talia o ia e fai mo latou Alii ma Faaola e ala i le faatuatua i lona suafa.

Ae ā la le Aso Sa? E fesootai lava ma le sapati auā o le aso lea na toe tu ai Iesu nai le oti ma le tuugamau. O le uiga loloto o le sapati ua ia avatu mo tagata uma e ala i lona maliu ma lona toetu i le Aso Sa. Ma tatou te mapu atu i ona aao alofa i lona malologa ma le mapusaga e faavavau, pe a tatou faatuatua faamaoni ia te ia. O le Aso Sa po o le aso valu foi e atoa i ai aso e lima sefulu, na ia auina ifo ai le Agaga Paia e papatisoina ona tagata ma amata mai ai le mafutaga a ona tagata po o le Ekalesia o lona tino i le lalolagi. Ua mafai ea e le lalolagi i nei aso ona aveese le Aso Sa? E leai e ui e le o faapaiaina i loto o le toatele o tagata, ae ua malolo ai le tele o galuega. O le sapati la ma lona uiga ma lona tāua ia mapu atu le tagata i le Alii i lona malologa e faavavau – ua faataunuuina ia Iesu Keriso i lona maliu ma lona toetu. ‘A tatou le salamo ma faatuatua i lona suafa, tatou te mafai ona mapu atu i lona mapusaga e faavavau.

GALUEGA FAATINO: Fesili & Tali

1. E lona fia le tulafono i le sapati i tulafono e sefulu a le Alii mo ona tagata filifilia?

Tali: E lona fa

2. Aisea e tatau ai ona faapaia ma faamamalu le sapati?

Tali: Auā o le aso na malolo ai le Alii mai ana galuega. E le o se aso e fai ai ni galuega. O ā mea e fai i isi aso?

3. O ā mea tāua e lua ua iloa ai le fesoota'i o le sapati ma le paia ma le ola i le faavavau o le Alii?

Tali: O le aso ua faapaiaina ma faamanuia i ai le Alii

4. O le ā le aso ua fai mo tatou sapati, ma aisea?

Tali: O le aso valu po o le ulua'i aso o le vaisapati o le aso foi lea na toetu ai le Alii o Iesu nai le oti ma le tuugamau, ma afio ifo ai le Agaga Paia ua tā'ua o le aso penetekoso.

5. O le ā le lautele o le faapaiaina o le sapati ma aisea?

Tali: E aofia ai mea uma o lo o i le siosiomaga o lou aiga. O matua ma fanau ma auauna, o manu ma le tagata ese o lo o mau i lou aiga

PESE: Le malologa e lelei (Pese 207, Pese & Viiga EFKS).

AOAOGA

1. Ia faapaia ma famamalu le Aso Sa
2. E le o se aso tafao ma inu ai ava oona le Aso Sa
3. E te mapu atu i le faavavau o le ola o lo o soifua ai le Alii pe a tatou faapaia ma faamamalu le Aso Sa

.....

ASO SA: 29 ME, 2016

MATAUPU: IA ALOFA I LOU TUAOI (Love your neighbour).

SINI: Ia aoao le vasega ina ia malamalama, o lou tuaoi o so o se tagata o lo o manaomia le fesoasoani.

TUSI FAITAU: Luka 10:29-37

FESOASOANI MO FAIAOGA

Ua faamatala e Luka le uiga loloto o le fesili, 'O ai lou tuaoi?'. E lē o natia i fatu alavai le tali. O lo o manino lava i le tulafono ma le au perofeta pei ona iloa i le tali a le aoao tulafono ia Iesu (f.27). O tuaoi

tāua ia o le tagata. O le tagata atoa ia alofa ai i le Atua, ma le alofa o lo o ia alofa ai ia te ia, ia faia i le isi tagata. O le fesili lea na fesili ai le tasi aoao tulafono ia Iesu. O se tagata ua ia aoao ma iloa le tulafono. Ae foliga mai i lana fesili, o lo o ia fia iloa po o ai tonu lona tuaoi, po o le tuaoi o le tagata Iutaia.

I le faataoto sa faamatala e Iesu, o lo o faatatau i lenei aoao tulafono pei ona faamatala ai e Iesu le ositaulaga ma le sa Levi i le faataoto, o tagata e aoao ma iloa lelei le tulafono. O le tuaoi i le faataoto a Iesu, o le tagata na alu malaga ae fasia e tagata fao mea ma ua tali oti. O le auala lava e tasi o lo o malaga ai le ositaulaga, sa Levi, faapea le tagata Samaria o le tagata ese. O lona uiga, o le tuaoi o le ositaulaga, sa Levi, ma le Samaria, o le tagata ua fasia e tagata fao mea. O le tali la o le fesili a le aoao tulafono, ‘O lē na alofa atu ia te ia’. Ua iloa e le aoao tulafono le tali o lana fesili ina ua faamatala e Iesu le faataoto.

O ai lou tuaoi? I le tala - o le tagata ua ‘e iloa o lo o ia manaomia se fesoasoani pei o le tagata sa fasia ma manu’a i le ala.

I le satauro o Keriso, ma lona toetu, ua suia ai le ola manatu faapito ma le ola agaleaga i le ola agalelei faapei o Iesu le Alii ma le Faaola.

GALUEGA FAATINO: Fesili & Tali

1. O ai lou tuaoi i lou manatu?

Tali: O so o se tagata o lo o manaomia le fesoasoani

2. O le ā le mamao o le alofa i le tuaoi?

Tali: E lē faatuaioia o lona uiga so o se taimi ma so o se nofoaga, e oo lava i lanu ma gagana malo ma atunuu.

3. O le ā le ituaiga alofa na alofa ai le tagata Samaria i le tagata na fasia?

Tali: O le alofa o lo o ia alofa ai ia te ia lava

4. O ai tagata i le faataoto a Iesu e faapei o le aoao tulafono?

Tali: O le ositaulaga ma le sa Levi

5. O le ā le aoaoga a Iesu i le aoao tulafono?

Tali: Ina alu ia ma ia e faapea ona fai

PESE: Alofa i lou tuaoi a o ‘e malaga

AOAOGA

1. Alofa i lou tuaoi faapei o Iesu
 2. ‘Aua le alofa faapito ma ola manumanu
 3. Ia aoao ma iloa tulafono ma ia ola ai
 4. Faatino lou alofa i le Atua e le vaaia i lou alofa i le tagata o lo manaomia le fesoasoani
-

ASO SA: 5 IUNI, 2016

MATAUPU: IA ALOFA I LOU NUU (Love your people)

SINI: Ia aoao le vasega ina ia malamalama i le tāua o le faaolaola o faavae faaleagaga i tagata o le nuu, ina ia toe fuata’i ma faasagatonu ai lo latou faapaiaina ma le faaolaina e le alofa tunoa o le Atua

TUSI FAITAU: Neemia 4:1-6

FESOASOANI MO FAIAOGA

O le Tusi Faitau o lo o faamatala ai le toe fausiaina o pa o le aai i Ierusalem sa taulamua ai le faitaulaga o Neemia. E le faigofie le galuega ona e fai o le toaitiiti o tagata o sa Iuta a o le faamata’u mai o tagata o latalata ane o tagata o nuu ese sa nonofo ai. E manaomia le pa ma ona faitotoa e pei ona i ai anamua. E le gata e puipuia mai ai le nuu mai le tagata leaga, a o le puipuia foi o le paia o sauniga pei ona i ai anamua, faapea le filemu manaomia a o toe faaolaola le ola faaleagaga o tagata o le Alii ua toe a’e mai la latou tafeaga.

Ma o le fausia la o le pa o le aai i Ierusalem e manaomia ai le alofa. E ui i le taufaamata’u mai o tagata o nuu ese (ff.1-3), ae o upu o le tatalo a Neemia i le Atua ua fa’aalia ai – le alofa faale Atua ua fusia ai loto ma agaga o tagata o le Alii, ma manuia ai le galuega tele. Fai mai upu o le tatalo a Neemia, ‘Ua matou atia le pa; ua fesootai foi le pa uma e oo i lona vaegalemu; auā sa loto lava le nuu i le galuega’.

O le aga'i atu o Iesu i le satauro sa matuā fa'aalia le ita, le ola tauemu, upu faifai, le sasa ma le ta 'a ona tagata faatasi ma tagata o nuu ese ona o le pule a le agasala ma le tiapolo iō latou olaga. Peitai ane e lei manumalo ia uiga faasauā ma faatiapolo i lona fai ma Atalii o le tagata e ofo atoa lona ola paia ia oti – ona o lona alofa i lona nuu ma le lalolagi ia faaolaina ma faasaolotoina. Auā o lona ola paia – o le taulaga ma le togiola mo agasala a ona tagata ma le lalolagi uma, pe a talia o ia i le loto salamō ma le faatuatua i lona suafa. O lona toetu, ua tatou maua ai lona Agaga tatou te tasi ai ma Keriso i lona alofa – e atia'e ai le pa ma se siosiomaga filemu e ola vivii ai tagata uma i le Atua ma ola ia faia lona finagalo paia iō latou olaga.

E le o se fia fai tuaoi, a o le tāua o le pa na atia'e e Neemia ma sa luta ua toe a'e, o le toe faaolaola o le ola faaleagaga o tagata o le Alii, ma lo latou faatuatua i le Atua. E manaomia le faatuatua galue, ma faaolaola ma tapu'e faavae faaleagaga ia iloa uma e tagata o le nuu ma fanau, ina ia inoino i le lalolagi ma ona mea faafiafia, ma mea o lo o tuinanau i ai le lalolagi.

A solo i lalo le pa o lou faatuatua, e lei lava se isi ala e toe atia'e ai, ua na o le loto salamō ma le faatuatua ua fua mai i galuega alofa.

GALUEGA FAATINO: Fesili & Tali

1. O ai tagata o nuu ese na faatauemu ma faamata'u ia Neemia ma sa luta?

Tali: O Sanepalata ma Tovia

2. O le ā se faailoga o le fusia i le alofa o loto o tagata o sa luta?

Tali: Ua latou atia le pa ma ua fesootai foi le pa uma

3. O le ā se vaivaiga o le tatalo a Neemia?

Tali: Ua ia le tatalo ia faamagalo atu e le Alii le leaga ua fai mai ia i latou

4. O le ā le uiga o le upu, ufiufitia ma le soloiesea?

Tali: Ia ufiufi le agaleaga ma faamama agasala, o lona uiga ia faamagaloina

PESE: Lo ta nuu moni (Pese 353, Pese & Viiga EFKS).

AOAOGA

1. Fai oe ma tagata e atia'e ma faaolaola le faatuatua ma le ola faaleagaga o lou nuu.
 2. 'Aua le ola tauemu i tagata o le Alii, auā e le manumalo se tagata leaga i tagata o le Alii
 3. A solo i lalo le pa o lou faatuatua, ia toe atia'e e ala i le loto salamō ma le faatuatua ua fua mai i galuega alofa
 4. Taumamao ma le tiapolo ma amioga faanuuese e oti ai le agaga
-

ASO SA: 12 IUNI, 2016

MATAUPU: FILIFILIA A O FAATAUVAA (Chosen while little).

SINI: Ia aoao le vasega ina ia malamalama, e filifilia i tatou e le Alii pe a ō tatou itiiti pe faatauvaa iō tatou manatu, o lona uiga o le ola loto maulalo ma ola faamoemoe i le Atua.

TUSI FAITAU: Faamasino 6:11-18

FESOASOANI MO FAIAOGA

Ua faamatala i le Tusi Faitau le filifilia ai e le Alii o Kitiona e fai ma faamasino i lona nuu. Na valaauina o ia a o ia sasa saito i le nofoaga e soli ai vine. O lona manatu ia lilo ai o ia nai Mitiana o lo o sauaina Isaraelu i lea vaitau. O le faailoga o lona saili o se ala e tausi ai lona aiga i lea vaitau ina ia mafai ona ola. E le gata i lea a o lona le mafaia o se mea, o lona uiga e manaomia se isi malosi e faamoemoe i ai. O lona filifilia la e le Alii, ua matuā talafeagai lelei ma lona tagata i totonu. O se tagata e manatu faatauvaa ia te ia, ma avanoa ai lona loto mo lona Atua. O le ala lea o le filifilia o ia e le Alii e fai ma faamasino e taitai lona nuu o Isaraelu.

O le olaga o Isaraelu i le vaitau o faamasino ina ua mavae atu Iosua, o se vaitau – ‘a solosolo lelei ma filemu le olaga ua le manatua le Atua, ‘a ua fai le amio leaga. Manatua o Isaraelu o le nuu filifilia o le Alii e ala mai ai lona alofa lavea’i ma faaola mo le lalolagi agasala. ‘A foliga la i le lalolagi, ma fiafia i mea a le lalolagi, e aoa’i e le Alii auā o lona nuu na ia faia o lona tofi mo le faaolaina o le lalolagi agasala.

Lea ua mavae atu le faamasino fafine o Tepora, ona fai ai lea e Isaraelu o le amio leaga i luma o le Alii. Ona tuuina atu lea o ia e le Alii i lima o Mitiana i tausaga e fitu. O le faamoemoe o le Alii, ina ia matuā lagona e Isaraelu le leaga o le ō ese ma le Alii lo latou Atua. Auā ua ō Isaraelu ma nonofo i ana i mauga, ‘a totō foi ō latou faatoaga e ō a’e Mitiana ma isi nuu ma aai ai. Ma ua lagona ai e Isaraelu le mata’utia o mea tiga ua oo ia i latou, ona latou alalaga ai lea i le Alii mo se lavea’i. Ua auina foi e le Alii le perofeta e toe faamanatu ia Isaraelu Aikupito ma fanua o nuu ese o lo o nonofo ai. O ai ua mafai ai? O le Alii lo latou Atua e toatasi ma lona alofa ia i latou.

Ua aoa’i le Alii i lona nuu, ua atoa foi tausaga e fitu o lo latou faasalaga, ma ua salamō. Ma ua filifilia ai e le Alii le tagata tonu pei o Kitiona e fai ma ona aao lavea’i mo ona tagata. O le tagata e tinoū ma ola atamai e ola i taimi faigata. E ola lafilafi ma galue o le faailoga o le tagata e manaomia e le Alii. Auā e fefe ma faaeteete nei maua o ia e le fili. O le natura o le tagata o lo o ia manaomia se isi malosili atu pei o le Alii lona Atua e faaola ma lavea’i ia te ia. O taimi o Kitiona o taimi o le ola masalosalo, ua ia manaomia se faailoga e faamaonia ai o le Alii lava ua valaau ia te ia. Ua ia avatu foi le taulaga e mautinoa ai, auā ua umi ona leai ni taulaga e ave i le Alii.

I le satauro o Keriso ma lona toetu ua tatou iloa ai – o lo tatou filifiliaina ma lo tatou faamamaina o lo o taatia i le talia o Iesu i le loto salamō ma le faatuatua i lona suafa. Pe afai foi ua tatou pologa i le pule a le agasala ma le tiapolo e ala i lo tatou fasioti tagata ma ola sauā, le fiafia i le fai o le amio leaga ma le agasala, ma pologa ai, e mafai ona lavea’i ma faamagalo i tatou pe a vave ona salamō ma faatuatua i le suafa o Iesu le Alii ma le Faaola.

I Samoa i nei aso ua matuā aliali mai le pule a le agasala ma le tiapolo e ala i le mau solitulafono matautia ua aliali mai. O le fasioti tagata, o le

pule i le ola, o le lima tete, o le sauaina o tina ma fanau, o le ola le pulea, o le amio leaga. Aisea ua faapea ai Samoa i nei aso? O fea o i ai le ekalesia, le pulega faamatai a nuu? Pe ua fai ea e le malo le faaleleia o le itu i fafo a o ai e faaleleia le itu i totonu le loto ma le agaga?

GALUEGA FAATINO: Fetufaā'iga i fesili oi lalo:

1. E FAAPEFEA ONA FILIFILIA I TATOU E LE ALII, MA O Ā NI TIUTE MA NI FOLIGA VAAIA O TAGATA UA FILIFILIA E LE ALII?
2. AISEĀ E FAASALA AI LE TAGATA E LE TULAFONO MA LE ATUA FOI?

PESE: Po ua e mau tofi (Pese 146, Pese & Viiga EFKS).

AOAOGA

1. E filifilia i tatou e le Atua pe a loto maulalo
2. Ia fai lo tatou filifilia e le Atua e laveai ai tagata ae le o le faasauā ma fasioti ai tagata.
3. E o'o mai le toasa o le Atua pe a tatou fai pea le leaga

.....

ASO SA: 19 IUNI, 2016

MATAUPU: TU'U ESE LE TAGATA AMIOLEAGA (Remove the wicked person)

SINI: Ia aoao le vasega ina ia malamalama i le tāua o le faautauta ma mataala i le tagata amio leaga oi le ekalesia, faapea foi ma tua o le ekalesia.

TUSI FAITAU: 1Korinito 5:9-13

FESOASOANI MO FAIAOGA

Ua faamatala e Paulo le tulaga (role) o le ekalesia i le feagai ai ma ona tagata. Mo tagata o le ekalesia, e ao ina iloa lelei o le ekalesia o le tino o

Keriso o le fale ua faatatauina ia te ia; e lē ilā ma lē pona ua uma ona faatauina e Keriso e ala i lona toto paia na maligi i lona satauro. O lona uiga, e leai se itutino o le ekalesia e tatau ona foi i tua i le olaga sa i ai. Auā o tagata ua taitaiina e Keriso ma lona Agaga. O tagata ua oti i aso uma i le tino ma ona tuinanau ma mana’o leaga.

Ae pe afai ua maua se tasi ua faia se agasala ma se amioleaga pei o le faitaaga, matapeapea, ifo i tupua, agatele, onā, pe fao mea, o le tiute o le ekalesia o le faamasino i tagata ua faapea. E le afaina tagata faapea e le ni tagata o le ekalesia. O tagata ua tā’ua o ē o lo o i tua. O tagata ia fai mai Paulo e faamasinoina e le Atua. Ma o tagata la ua faapea o le ekalesia pe a faamasinoina ma faamaonia ni amioga leaga ua latou faia, o le mea ia faia ia i latou o le faateaeeseina o lea tagata mai le ekalesia.

Aisea e tāua ai lea fuafuaga? Auā foi e pei lava o le upu, o le lago mate e tasi e leaga ai le uu atoa. E le gata i lea, pe a leai se leo o le ekalesia i lea tulaga, o le a pispisia le paia o le ekalesia, tainane foi foliga o le ekalesia o le a le faamaoni i ona tiute fai. E o’oo’o le leaga o lea tulaga pe a fefe le ekalesia e faatino. Auā foi e fefe loa le ekalesia i tagata faapea, o le a aliali mai foliga e le maalili pe vevela a o le faaleogalua. Ua na o le ta’u o le kerisiano, ae ua matuā mamao ese le Alii ma le loto. E oo foi i se tulaga e faapea ai e fai pea le leaga ae alu i le lotu. E oo foi i taulaga ma foai, ua na ona fai ma faataunuu ae le o se mea sili i le manatu ma le loto. Ua musuā foi e tapua’i ma tatalo; ua leai foi se alofa i le isi tagata.

I le satauro o Keriso na maliu tiga ai o ia ina ia matuā iloaitino e le tagata agasala lona faafanoina pe a lē tuu ese le tagata amio leaga e ala i le loto salamō ma le faatuatua i lona suafa. Mo le ekalesia la, ia matuā tuu ese ni tagata faapea o le ekalesia e le gata e aoa’i ai i latou, ae o se faamanatu tāua foi mo le ekalesia ina ia tumau i le ola faapaiaina ona o le alofa tunoa o le Atua ia Keriso Iesu.

GALUEGA FAATINO: Fetufaaiga i fesili

1. Aiseā e tatau ai ona tuu ‘ese le tagata amio leaga ma le ekalesia?
2. E faapefea le pagota ua sola ma le falepuipui e le o se tagata o le ekalesia, ae ua ia faia ni amioga mataga i papalagi tafafao mai

ma nisi tagata pei o fafine ma teine na fasiotia i le tausaga ua te'a, ma nisi na taumafai e faamalosi?

Tali e fesoasoani:

E tatau ona tuu ese le tagata amio leaga ma le ekalesia pe a faamaonia ina ia puipuia ai le paia o le ekalesia, ma aoa'i ai foi o ia. Mo le pagota ua faia ni amioga mataga i le itu pa vavai e le o se tagata o le ekalesia, e tatau ona puipuia ma mataala le lotoifale o aiga ma nuu, nofoaga faitele, ma faalauiloa ata o ia pagota ina ia iloa uma e tagata; ia fautuaina foi leoleo ma falepuipui ina ia faamaoni io latou tiute ia puipuia lelei ia tagata amio leaga.

PESE: Ia matuā faamalosi (Pese 175, Pese & Viiga EFKS).

AOAOGA

1. Ia tuu ese le tagata amio leaga ma le ekalesia
2. 'Aua le faapipii i tagata amio leaga
3. Ia molia i le tulafono le tagata amio leaga
4. 'Aua le savali i le filifiliga 'ā ē amio leaga, ia le tu foi i le ala o ē agasala

.....

ASO SA: 26 IUNI, 2016

MATAUPU: MATA'U I LE ATUA I LE MALOSI (Obey the Lord in your youth)

SINI: Ia aoao le vasega ina ia malamalama, o le manatua o le Alii i aso o le malosi ma maua ai le ola e tāua tele mo le taimi e matua ai ma oti ai.

TUSI FAITAU: Failauga 12:1-7

FESOASOANI MO FAIAOGA

O le Tusi Faitau ua faamatala ai le tāua o le mata'u i le Alii a o maua le malosi. O lona uiga o taimi o le talavou. O le mea tāua ua faamanatu mai e Failauga i talavou, ia mata'u i le Alii na faia o ia i taimi o le malosi. Aisea e tāua ai lea tulaga mo talavou? Auā foi o le taimi tonu lea e aogā ai le malosi mo le Atua. Auā o le malosi o le tasi lea o vaega o le tulafono ua atoa i ai le tulafono ma le au perofeta. Ia alofa i le Atua i le loto atoa, manatu atoa, malosi atoa, agaga atoa, ia alofa foi i lou tuaoi pei o oe lava ia te oe. Lea la i le Tusi Faitau, ua faamanatu ai e Failauga i fanau ma talavou le fa'aoga o le taimi a o taule'ale'a mo le faia ai o le finagalo o le Atua.

Aisea e tāua ai lea tulaga mo le Failauga? Ua tā'ua e Failauga aso leaga, o lona uiga – o le fa'aoga o aso a o talavou mo le Atua, e lavea'i ai le tagata pe a oo mai aso leaga. O aso leaga o le taimi o le oo mai o le tagata matua. Po o taimi foi o le oo mai o puapuaga pei o ma'i ma mala ma sauaga, o le mativa ona o le maua luga o le tau o le soifuaga.

O le ā la le talalelei ina ia gauai loa fanau e ave ō latou ola mo le Atua? E leai lava se isi malosi e tusa ma le malosi o le Alii lo tatou Atua. Na te faia vavega ma faailoga iē alolofa ia te ia. Na te fasioti ma faaola o lona uiga e pule le Alii i le oti ma le ola. Pe a oo mai la aso leaga, ona tatou inoino lea i ai. Auā foi ua leai so tatou malosi ua gata e le oo i le malosi fai vavega ma mamana o le Atua. Ua na o tiga ma mafatiaga ma faanoanoaga ua leai se fiafia. Ae faapefea la ona faasaoina lo tatou ola nai le oti ma le tuugamau, sauaga ma faama'i leaga, le mativa ma le tiapolo? E faasaoina e le Alii e ala i lona alofa tunoa ma lona mana silisiliese, pe afai sa ave lo tatou malosi mo ia i taimi o lo tatou taule'ale'a. E ave faapefea? Ia faia le finagalo paia o le Alii io tatou olaga, e ala i le amio lelei, auauna i le Alii, pese i aufaipese, alu i le lotu, ma faamaoni i feau i le aiga, ma galuega ua galue ai.

I le tagata o Iesu le Alo o le Atua, sa fa'aalia ai i taimi o lona taulealea le ave atoa o lona malosi mo le finagalo o le Atua lona Tamā i le lagi. E oo foi i le taulaga ma le togiola na ia faia ia tatou ola nai le pule a le agasala ma le tiapolo - na faia lava i taimi o lona taulealea. Na aveeseina lona ola ona o ā tatou agasala ma solitulafono ma amio leaga, ae na toe maua mai auā na ave atoa lona ola atoa mo le faia ai o le

finagalo faaola o le Atua mo le lalolagi agasala, e ala i le loto salamō ma le faatuatua i lona suafa.

GALUEGA FAATINO: Fetufaaiga i le Fesili

Vaega I: O le ā le tāua o le manatua o le Alii i taimi o le taule’ale’a, a o le i oo mai aso leaga?

Vaega II: O le ā le fesootaiga o le foi atu o le tino po o le efuefu i le eleele, ae foi atu le agaga i le Atua, ma le tāua o le manatua o le Alii i aso o le malosi?

PESE: Tautuana le Alii le Faaola (Pese & Viiga EFKS).

AOAOGA

1. Ia ave le ola atoa mo le Atua ma lona finagalo
2. ‘Aua le faatuai nei poto ane ua leai se aogā ma se lavea’i
3. E le o se tagata le Atua e fai ai pea le leaga ae faamoemoe e faaola mai
4. O taimi o le malosi o taimi sili ia ona lelei e auauna ai i le Alii
5. Na maliu Iesu i le satauro ina ia tatou ola a o taule’ale’a lava o ia.

.....

ASO SA: 3 IULAI 2016.

MATAUPU: SAUNIA LE LA’O’AI (Table served).

SINI: Ia a’oa’o tamaiti ina ia malamalama i le galuega fa’aauauna lea e faatino e le tagata e ala i le tapenaina o se la’o’ai mo se taumafataga.

TUSI FAITAU: Salamo 23.

FESOASOANI MO FAIAOGA:

O le Salamo lauiloa lenei a Tavita ua iloa e so o se Kerisiano. O le Salamo ua fai ma tauloto a le toatele o ā tatou fanau. E matutua ane, ua lē o toe i ai se mea o faanefu ai i so o se fuaiupu o lenei Salamo.

O le Salamo o lo o aumai ai le ata o le leoleo mamoe. O se galuega e tele lava ina faatinoina e tagata ua fai ma auauna a tagata maumea, ia po o tagata foi e lelei le tamaoauga i lafu-manu.

E lua ni ituaiga auaunaga o lo o taumafai le fai-Salamo e faailoa mai. Muamua, o le galuega faaleoleo mamoe lelei, lea ua masani ai le faalogo. O se galuega e faia i se lotoā, po o se fanua e tusa ma le limasefulu eka, po o le sili atu foi. O lona uiga, e lē faigofie i le leoleo mamoe le va'aiga o lenei lafu, ona o le tele o lea lotoā. E tataua ona faamalieleina itu uma ina ia mautinoa le saogalemu ma le ola lelei o le lafu. Ia lelei le vao e aai ai, o le vai e feinu ai ma le puipuia lelei o mamoe mai le tele o manufai. O se auaunaga ia saunia lelei le loto o le tagata i itu uma, ma lona faamoemoe tasi i le Atua, e foa'i mai le malosi e faatino ai le galuega.

O le auaunaga lona lua, o le tagata e tapenaina se taumafataga. Ia saunia lelei le laulau i ona itu uma mo tagata o le a taumamafa ai. O ituaiga meaai e tapenaina, e talafeagai lelei ma le manao o tagata ma ia lava ma totoe. O ituaiga vaiinu ia lelei ma mama mo le auvalaaulia. Ia lava foi le silafia o lē o lo o tapenaina lea faamoemoe, i tagata o le a aai i lea la'o'ai.

E ui ina eseese faatinoga o nei auaunaga, a o lona aotelega, o le auauna faamaoni i ona tiute fai. O le saunia lelei o meaai ma vaiinu lelei, ua lē na o tagata taualoa, a ua faapena foi i tagata ua lē amanaiaina i le si'osi'omaga.

O le mea la ua mautinoa, o le Atua lava o lo o faatinoina nei galuega, e tusa ma le molimau a le fai-Salamo. O le ata o le lē tu'ulafoa'iina o le tagata ua lē taliaina i le si'osi'omaga. A o le natura taatele lea o le Atua e pei ona taumafai le fai-Salamo e momoli mai i lana Salamo lenei; o le alofa faamaoni o le Atua e tutusa ai tagata uma i lana silasila. Na te saunia mea lelei mo le tagata ua puapuagatia, ina ia maua se mafutaga fiafia ma amanaiaina i le mafuta faatasi ma isi uso a tagata.

O Iesu Keriso o ia o le leoleo mamoe lelei, ua ia saunia le laoi o lona alofa tunoa mo tagata uma e ala i lona maliu i le satauro ma lona toetu.

Ma e talia uma i tatou i lea laoa'i pe a salamō faamaoni ma faatuatua i lona suafa.

GALUEGA FAATINO: Taliga Fesili:

1. O le a lē tulaga o le fai-Salamo i lana salamo lenei?
Tali. O ia o se auauna a le Alii ua ia iloa le saunia e le Alii o mea lelei uma mo ia
2. O le ā se feau tāua o lo o taumafai le fai-Salamo e ta'u mai i o tatou talavou?
Tali. E silisili le lelei o le alofa tausi mai o le Alii iē matata'u ia te ia.
3. O ai e faatatau i ai le faaupuga lea? 'E te laulau mai mea'ai i luma o ē ita mai ia te au.'
Tali. O le Atua lava; lea na iloa i le afio mai o Iesu, ma talisua faatasi ma e agasala.

AOAOGA:

1. Aua ne'i faapito le tatou auaunaga, a ia tutusa i tagata uma.
2. E lē tu'ulafoa'iina e le Atua ona tagata
3. O le Atua e faamaoni lona alofa iā i tatou.
4. O Iesu le leoleo mamoe lelei mo lana Ekalesia

.....

ASO SA: 10 IULAI, 2016

MATAUPU: ALOFA MONI (True love).

SINI: Ia a'oa'o le vasega ina ia malamalama i le uiga moni o le alofa moni.

TUSI FAITAU: Pese a Solomona 1: 5- 7

FESOASOANI MO FAIAOGA:

O le pese sili lea i pese e 1005 na tusia e Solomona le atalii o Tavita. O Solomona na soso'o ane i lona tamā. O Solomona i lona taimi i lana nofoaiga, e 40 tausaga na avea ai o ia ma tupu ia Isaraelu. O se nofoaiga na logologoā i lona tula'i mai, ona o ana faaiuga atamai na ia ta'ita'ina ai le nuu o le Atua. O lona alofa moni lea i le Atua, na ia taumafai ai i nuu tuao'i, e toso mai i le li'o o tagata e talitonu ma faatuatua i le Atua. O le ala lea o le tele o tama'ita'i sa fai ma ana ava e 700, ma lana autau nonofo e 300. O tamaita'i mai lea malo ma lea malo; o se auala atamai ina ia mafai ai ona faailoaina le Atua o Isaraelu i nuu ese. O le ala lea o le fatuina faapea o upu o lenei pese, ona o le tulaga na i ai le tupu o Solomona a o ia ta'ita'ia le nuu.

O upu o le pese, o lo o aumai ai lagona o le alofa moni i lē e sili i ai lona alofa. E ui i le tele o nei mau tama'ita'i, a o upu o le pese o lo o aumai ai lē ua sili ona moni ma faamaoni lona alofa i ai. O le alofa moni, o le alofa e mafanafana ai mafutaga. O lo o fa'aata mai ai le alofa moni o le Atua i lona nuu filifila o Isaraelu. E ui i le tele o nuu ma atunu'u o le lalolagi, a ua sili ona pele Isaraelu i le Alii, auā o Ia lava na filifilia Isaraelu e fai ma ona nuu.

O le mea moni, o le Atua lava ia e moni lona alofa. E tumau i taimi uma ma aso uma e faavavau. O le ala lea o le lagiina o pese, ona o lagona ua lē mafai ona taofiofi i le fia saafi ona o lea alofa. Peita'i ua lē tutusa le faamaoni o le alofa mai o le Atua, ma le tali atu o lona nuu. Ua i ai taimi e alofa pepelo ai le tagata i le Atua, a o le Atua lava ia, e tumau pea lona alofa e faavavau. O upu la o le pese a le fatu pese, o lo o aumaia ai le ata atoa o le alofa moni i se mafutaga e fusia faatasi i le alofa faale-Atua.

O le feau la o le pese a le fatu pese; Ia moni le alofa o tatou le fanau i le Atua. O fua o lea alofa, o lo o faatinoina i o tatou matua, ma so o se tagata, e pei ona faamanatu mai e le tulafono e 5. E faapena ia i tatou, ina ia o tatou manatua pea le alofa moni o le Atua ia i tatou e ala iā Iesu Keriso lona Alo pele e toatasi, na maliu ma toetu manumalo mai le oti

ma le tuugamau, ona o lona alofa moni iā i tatou ia faaolaina mai le pule a le agasala ma le oti e ala i le loto salamō ma le faatuatua i lona suafa.

GALUEGA FAATINO: Taliga Fesili:

1. O le a tonu o lo o faatatau i ai le alofa moni o lo o aumaia i le agaga o le pese.

Tali: O le alofa moni o lo o faatatau i le filifiliga na mua'i fai e le tagata; e pei ona faia e le Atua iā Isaraelu.

2. O le a se taua o lea alofa i le va feso'ota'i ma isi tagata?

Tali: O le alofa e fefaasoa'i, ina ia maua ai le alofa faale-Atua, e lē faapito i se tagata, ae mo tagata uma.

3. O le a le ata o lo o taumafai le tusitala e momoli mai i lenei pese.

Tali: O le alofa o le Atua i lona nuu o Isaraelu, na le'i faaluaina lava i se isi, ae na tumau lava e oo i le faavavau.

AOAOGA:

1. Ia moni le alofa o o tatou talavou i le Atua e pei ona alofa mai ia i tatou e le aunoa.

2. Ia lē femoumoua'i le alofa, a ia tumau e oo i le faavavau.

3. Ia avea le alofa o le Atua ia i tatou, e fai ma uu manogi i aso uma o lo tatou ola.

.....

ASO SA: 17 IULAI 2016

MATAUPU: ALOFA LE FAATUĀ'OIA. (Love without boundaries).

SINI: Ia a'oa'o tamaiti ina ia malamalama i le uiga moni o le upu 'alofa,' e tusa ma le alofa e lē ma faatusalia o le Atua i le tagata, lea na lē tu'ua ai lona atalii pele na o le toatasi, e faia le togiola mo le tagata agasala.

TUSI FAITAU: Luka 15: 3- 7

FESOASOANI MO FAIAOGA:

O le mataupu o lenei Aso Sa o le Alofa lē Faatuaioia; O se a’oa’oga a le alii sei aveesea ai le manatu faapito o lo o i le au Faresaio ma le au Tusiupu. Ua iloa e i latou o lo o aai faatasi le alii ma tagata agasala, ona muimui ai lea o i latou.

So o se mafaufauga ma manatunatuga le lelei e tupu ane i le loto o le tagata, e silafia uma lava e le alii o Iesu. O le ala lea o le fetalai o Iesu i lana faataoto lenei. Ua fetalai Iesu i le lafu e selau mamoe, pe a leiloa le mamoe e tasi, pe lē tu’ua ea e le leoleo mamoe le iva gafulu ma le iva mamoe o totoe i le vao, ae alu ma saili i le ua leiloa. Fetalai Iesu, a maua le mamoe na leiloa, e faafuata ma le olioli. Ua ia faapotopoto mai i ana uo ma e tuaoi ma ia, ua o latou olioli faatasi ma fiafia ina ua ia toe maua lana mamoe na leiloa.

O le galuega lea na afio mai ai le Alii i le lalolagi, o le tausailia o ona tagata ua leiloa i le agasala. O mamoe, o tagata, o le mamoe na leiloa, o le tagata agasala. Le tagata ua matua leiloa lava lona ala na sau ai mai le Atua. Ua fetosoaina ma feta’iaina e le alii o le lalolagi. E pei o tatou i le lē usita’i, lē faalogo, faia o amio e lē tusa ma o tatou talavou, ua inosia ai tatou e tagata. Tagata ia ia o lo o aai faatasi ma Iesu. Le mafuaaga lea o le muimui o le au faresaio ma le au tusiupu. Auā o le isi lea vaivaiga o le tagata faafiaamionu, o le tusitusi lima ma va’ava’ai masei; ma ua iloa ai o isi ia mamoe o lo o leiloloa.

Tagata ia na afio mai ai le alii i le lalolagi, ina ia toe aumaia i le mafutaga ma le alii. A taliaina Iesu i le salamō, talitonu ma tumau ai, e aai fiafia ma le alii e pei ona fetalai ai Iesu i lenei faataoto.

O le ata lena o le fiafia tele o le a i ai le lagi, i se tagata e tusa pe toatasi ae ua lagonaina le salamō, ua faatauvaa ma ua talia e ia Iesu i lona loto; O le a sili le olioli o agelu o le lagi i lea toatasi, i lo o tagata amionu e toatele.

Le alofa lē faatuaioia lena o le Atua. Na te lē tuua ai le tagata ina ia nonofo pea ma le agasala. Na matua afio mai lava e saili mai le tagata ua leiloa, e mafuta ma talisua faatasi ma ia e oo i le faavavau. E ui lava

la ina leaga pea i tatou i lo tatou le usita'i ma faia pea amio mataga i lea aso ma lea aso, tatou te manatu e lilo i o tatou matua; a ia manatua, e lilo i le vaai a le tagata ae lē pogisa ai le vaai a le Alii. E i ai le ituaso tatou te lagonaina ai lo tatou faatauva'a, o le taimi tonu lena ua saili mai ai le alii, ina ia aveesea mai i tatou mai le agasala. O lona alofa tele na oo ai i le satauro, ina ia maua e tagata uma lea alofa, ma mafuta ai ma ia i le ola e faavavau pe a salamō faamaoni ma faatuatua i lona suafa.

GALUEGA FAATINO: Faatinoga o le tala sa faamatalaina.

E manaia foi pe a vaelua le vasega i ni vaega se lua mo le faatinoina o le tala sa faamatalaina.

VAEGA MUAMUA: Latou te faatinoina le tala e pei ona faamatalaina. (Faatino le taumafataga a Iesu ma tagata o lo o taua o tagata agasala, ma le oo ane o le au faresaio ma le au tusi upu ma muimui ia Iesu i le aai faatasi ma nei tagata agasala.

VAEGA LUA: Faatino le tala lea i sona vaaiga faanei ona po. (I se taumafataga o lo o faia i le fale o le faifeau. Na o le faifeau ma se aiga o le aulotu seasea o mai i le lotu, po o se aiga foi o le aulotu e faale-lelei le tamaoiga.) O le o ane o tamaiti po o nisi o aiga o le aulotu e avane toanai i le fale o le faifeau, ae iloa ai nei tagata o lo o faitoanai ma le faifeau. O a ni lagona ma ni upu a tagata i lea vaaiga.

AOAOGA:

1. 'Aua le inoino ma vaai maulalo i le isi uso a tagata.
2. Ia ō tatou lagonaina le saili mai o Iesu ia i tatou, i taimi faigata o lo tatou ola.
3. E alofa Iesu i tagata uma, ae sili i lē o mafatia i le agasala.

.....

ASO SA: 24 IULAI, 2016.

MATAUPU: TA'ITA'I LE ATUA I LE MALAGA
(God leads the way)

SINI: Ia aoao tamaiti ina ia malamalama, o ala uma o lo o tatou feoa'i ai i aso uma o lo tatou ola, o lo o tatou malaga faatasi ma le Atua. O Ia o lo o ta'ita'i malaga ia i tatou.

TUSI FAITAU: Esoto 16: 4- 8.

FESOASOANI MO FAIAOGA:

O le tala sa faitauina, o le o ese mai o Isaraelu mai Aikupito e agai atu i Kanana. O se malaga na le'i mafaufauina e tagata e i ai ni ona fitā ma ni faigata i le ala. Peita'i ona o le tagata e faigata ona faatino le ola faatuatua i mea e lē vaaia, na mafua ai ona tigaina ma puapuagatia. O le ola lē mautonu ma le lē talitonu, ma le musu e fetaia'i ma faigata, le isi lea faigata o lenei faigamalaga.

O le fetalaiga a le Atua iā Mose i le mataupu e 3; Ina ua Ia lagonaina le oi ma le pologa o lona nuu, lea na mafua ai ona o ese Isaraelu ma laueleele o Aikupito. O Mose ma Arona, o i laua ia na auala mai ai le finagalo o le Atua iā Isaraelu e tusa ma lo latou oi a o fai ma pologa a Aikupito. E lē o Mose la ma Arona, a o le Atua le mafuaaga o le o ese mai o Isaraelu ma le mea sa nofo pologa ai.

O le finagalo la o le Atua iā Mose ma Arona, ua fai ai i laua ma fofoga taumomoli o le Atua i tagata. O lona uiga la, o le Atua lava o le ta'ita'i malaga o Isaraelu. O le fa'aalia o le finagalo o le Atua, ina ia ola fiafia ma sa'oloto ona tagata. Peita'i, o lea ua uma le oi i le pologa sa i ai, a ua lagona le leo o le fia'a'ai, ua sau foi le vaivai, ua faalogoina le tatagase peisea'i ua oo mai le oti. Ua leai se faamoemoe i se isi mea e maua ai se meaai. O le ala lea ua faatusatusa ai aso a o i ai i Akupito ma le vao ua i ai nei; Ma ua foliga mai ai, e sili le ola pologa ae maona ma maua le mea e teu lelei ai pea oti, nai lo le oti fia'ai ma leai se mea e teu ai pea oti i le vao. Lagona ma mafaufauga ia, ma le i'u leo ua oo a'e i le Atua; lea ua fa'aalia ai le silisiliese ma le mamana o mea e faia e le Atua. E le ina ia faafo ai le tagata, a ia talitonu i le faatuatua faamaoni i le Atua e

ola ai. Semanu le Atua e le tauimasui; auā ana se atua o Aikupito, e fano uma le nuu i le vao i le fia'a'ai. A o lea ua fa'aalia le tumau pea o le alofa faata'ita'i malaga o le Atua i lona nuu. O le fuaiupu e valu fai mai; '..... a afiafi, e foa'iina mai ai e le Alii iā te outou o manu tou te aai ai, o le taeao foi e foa'i mai ai le mea e ai tou te maoona ai lava.' O lona uiga, o le malaga ua lava tapena i ona itu uma, ina ia faamalieina manaoga o le aumalaga. E le tigaina e tausaili se meaai. O lea lava ua uma ona saunia e le Alii le taumafataga o afiafi taitasi. Ma le falaoa po o le manai e maua fua i le taeao mo meaai o le aso. O ata vaaia ia o lo o ta'u atu e Mose iā Isaraelu, e tusa ma le malaga ua faia nei. O mea ua maua o lea aso ma lea aso, o le foa'i lea a le Atua mo i latou. O le mea la ia manatua ma iloa e Isaraelu, e le o Mose ma Arona le faapogai o le malaga, a o le Atua lava, o le Atua sili lea, ia tumau le ola talitonu ma faatuatua faamaoni ia te Ia, ona taunu'u manuia lea o le malaga, i laufanua ua ia finagalo i ai, e fai mo i latou e faavavau.

GALUEGA FAATINO: Taliga fesili:

1. O fea na maua ai taumafa mo le nuu a o alu le malaga?

Tali: Na foa'iina ifo e le Atua le falaoa mo le nuu i le taeao, ma manu mo taumafataga i le afiafi.

2. O le a le faatonuga mo le aoina o le falaoa i le taeao?

Tali: E ao na o mea e tatau ma le aso, ae lē o le soona ao ae lē uma ona ai.

3. O le muimui o le nuu iā Mose ma Arona, o le muimui lava lea ia ai?

Tali: Ua latou muimui lava lea i le Atua.

4. O fea lea e i ai le nuu o le Atua i le tala lea?

Tali: O lo o i le vao, i le o ese mai le nuu o Aikupito e agai atu i le nuu folafolaina e le Atua.

AOAOGA:

1. E i ai pea le Atua i taimi uma o le tatou malaga o lo o faia nei.

2. O le Atua o le ta'ita'i malaga sili lea, e manuia ai le tatou malaga faale-faatuatua.
3. E faateleina manuia pe a talitonu ma faatuatua faamaoni i le Atua ta'ita'i malaga.

.....

ASO SA: 31 IULAI 2016

MATAUPU: 'AUA LE MUIMUI A O MALAGA' (Don't murmur on the way).

SINI: Ia a'oa'o tamaiti ina ia malamalama i le isi lea uiga masani o le tagata soifua; o le taumuimui. E lē o se uiga lelei i le tagata faatuatua moni i le Atua.

TUSI FAITAU: Esoto: 16: 11- 26.

FESOASOANI MO FAIAOGA:

'Aua le muimui a o malaga. O le isi lea uiga masani o tagata ua masani ai, e pei foi ona taatele i nei ona po, o le muimui. O le faia lea o tala po o ni faamatalaga e momoli ai le lē fiafia i se mea sa faia, ua manatu le tagata ua le lelei.

E pei foi ona iloa i le tala lea sa faitauina, i le o ese mai o le nuu o le Atua mai laueleele o Aikupito. Le nuu sa pologa ma matua tigaina ai, ona o le puleaga faumalo, ina ua lauiloa Aikuputo i lona tamaoiga, o le malosi faafitafita ma le fia pulea aoao o le foafoaga paia a le Atua i na ona po. O le oi la o le pologa ma le tigaina o tagata Isaraelu, lea ua faafogaina e le Atua; le ala lea o le o ese mai lafanua o Aikupito. O le tali lea o le oi o tagata, lea ua tali mai le Atua i lona alofa; o le faatula'i ma o ese mai le pologa.

Peita'i, o lea foi ua tali mai le Atua e tusa ma le pologa sa i ai, a o lea ua alia'e ai ma le isi uiga lea o le tagata o le muimui; A e le'i faia fua e le Atua lea fuafuaga mo i latou. E ui o le feagaiga na faia e le Atua ma Aperamo, i le nuu e tafe ai le suasusu ma le meli e ola saoloto ai lana fanau, a o se avanoa lelei lea ina ia aveesea ai tagata Isaraelu mai Aikupito, ma tu'uina atu i lea nuu, e lē toe i ai se oi ma se pologa.

Sala la ina a muimui le nuu, auā e lē o iloa e Isaraelu le finagalo o le Atua ua uma ona faia ma Aperamo. Ae a vaai foi i se isi itu, o Mose ma Arona ta'ita'i malaga, ae lē o le Atua i le vaai a Isaraelu. A o le isi lea faigata i tagata, o le lē talitonu i le ta'ita'iga a Mose ma Arona. Ua uma meaai ma vaiinu i le ala, o fea i le vaai atu i nei ta'ita'i e ono maua ai ni meaai. E pogisa ia Isaraelu le Atua o o latou augatama lea e auala mai iā Mose ma Arona. E vaivai le vaai faale faatuatua. E le na o le iloa e mata ona faatuatua lea ma talitonu; a o le faatuatua i mea e lē vaaia e maua ai le mautinoa ma lē oo ai i le vaivaiga lea o le muimui.

Fai mai na foa'iina e le Atua manu mo tausamiga i afiafi o aso taitasi, ma le manai na faatoulu ifo mai le lagi pei se sauto'a mo le taeao e tali ai le mana'o o le nuu. O meaai e le'i masani ai a o i ai i Aikupito, a o lea ua fa'aalia le mamana ma le silisiliese o le Atua, i se auala e le'i masani ai le vaai i le soifuaga masani. Anusa la se lē talitonu i nei vaaiga e le'i vaai muamua i ai, ma se faatuatua ina a mate. Fua ia o le lē talitonu i galuega mamana a le Alii silisiliese, o le fai o le loto o le tagata lava ia. Ua lē faaputu na o le mea e ai e tatau ma le aso, a ua faaputu ona o le mana'o tele. Ua tupu ai le ilo ma ua elosia ai le nofoaga o lo o nonofo ai, ona ita ai lea o Mose ia te i latou.

Na tupu nei le muimui ona o le fia aai, lea ua maua mai, a o lea foi ua soona fai. Lea ua aapa mai le Atua e faamalie le muimui, e le tau ina faamalie i sina taimi, o taimi uma ma aso uma; ae tupu ona sola ia manuia, o le tagata lava ina a lē usita'i ma le tumau i le faatuatua faamaoni i le Atua.

GALUEGA FAATINO: (Taliga Fesili)

1. O ai na foa'iina le mea e ai mo le nuu o Isaraelu a o malaga?
Tali: O le Atua lava.

2. O a meaai na saunia e tali ai le fiaaai o tagata?

Tali: O le salu mo le taumafataga i le afiafi, ma le sau e totoina ifo mo le malu taeao.

3. O mea iti faalapotopoto, e laiti pei o le sauto'a i luga o le laueleele; O le a le a mea?

Tali: O le faamatalaina lea o le 'manai', po o le 'falaoa' mai le lagi.

AOAOGA:

1. O le faalagolago ma faatuatua faamaoni i le Atua e maua ai manuia e le motusia.

2. Ia tatou savavali punoua'i, ae lē o le finauvale.

3. 'Aua le popole i mea e tatau ma le aso, auā o le faasoa a le Atua ia i tatou i aso uma e le aunoa.

.....

ASO SA: 7 AOKUSO, 2016.

MATAUPU: 'AUA LE POPOLE. (Dont worry)

SINI: Ia a'oa'o le vasega ina ia malamalama, e lē o le finagalo o le Atua ia popole le tagata; a o le tausinioga ina ia maua le ola i le malo o le Atua e faavavau.

TUSI FAITAU: Mataio 6: 25- 34

FESOASOANI MO FAIAOGA:

O le popole o le isi lea natura masani o le tagata. E popole i mea ua naunau i ai le loto, ua lē afaina po o se itu lelei pe faale-lelei foi. E pei o matua i fanau i le tali mai e tusa ma le laua tausiga i le manuia po o le faalumaina.

Fai mai le manatu autu; ‘Aua le popole’. Ai e malamalama le tusi tala i le mau faama’i e mafua mai i le popole. O le ala lea o le fai mai ‘aua le popole i le ola, i mea e aai ai ma mea e inu ai po o tino i mea e oofu ai. Ua faatusa i manulele, e lē popole i se mea e tasi. Na te lē luluina se saito, pe galueaina le laueleele mo sana mea e ai, pe felelea’i foi e tau saili sona ofu mo lea aso ma lea aso. A e ola fiafia ma sa’oloto i so o se mea o le foafoaga. E lē popole i le mea e ai o le isi aso, po o se mea foi e moe ai. O mea lava o le foafoaga na faia e le Atua i le amataga, lea ua faia mo manulele e ola fiafia ma sa’oloto ai.

O le eseesea lea o le tagata ma manulele; e maua i le tagata le popole, ae lē maua i manulele. Peita’i o le popole, ua tele ai le mau ma’i ua faigata ona maua i ai se fofo; le ala lea o le fesili o le tusitala i le fuaiupu e 27, auā e lē mafai e le popole ona faaopoopoina se isi itula i le soifua o le tagata, ua na o le faapuupuua ai o le ola o le tagata, ina ua ia le maua le fiafia ma le ola saoloto e pei ona finagalo i ai le Alii e pei foi ona fa’aalia i le ola o le lautalotalo. E aogā meaai, vaiinu ma ofu i le soifuaga o le tagata. Ae mafua la ona popole le tagata i mea ia, ona ua le faamaoni le ola galue. Peita’i o le faasoa a le Atua i lea aso ma lea aso, ua uma ona faia mo le aso e tatau ai. Tatou te popole la o le a, o lea ua uma ona faia ma saunia e le Atua mea uma mo i tatou e pei ona ola fiafia ai o manulele. Pau le itu e tatau ona toe vaai lelei i ai, o le sailiga a le tagata i le malo o le Atua. Auā ua popole le tagata i mea o le tino, a ua galo le sailiga i le nofoaga mau i le ola e faavavau. Le malo o le Atua e lē maua ai se popole i se mea e tasi. Le malo lea ma lana amiotonu e tatau ona saili e le tagata ia maua, ona faaopoopoina ai lea o lona tamaoaiga. Le malo lea na afio mai Iesu Keriso e faailoa mai ia i tatou. A ua faigata ona maua e le tagata ona ua popole i le aso ma lona ai, ae lelei ona popole i le malo o le Atua ma lana amiotonu, ona maua lea o le fiafia e faavavau.

GALUEGA FAATINO: Fesili ma Tali:

1. Aisea e mafua ai ona popole le tagata?

Tali: E tele mafuaaga o le popole o le tagata. A o le aotelega lava ma le vaai i le itu e lilifa i ai le popolega o le tele o tagata i nei ona po; e popole i mea o le ola faaletino o le tagata.

2. O le a se toatugā e tupu mai pe a oo le tagata i le ova o le popole?

Tali: O le ma'i ma iu ai ina oo i se tulaga faaletonu.

3. O le a le fofo o le popole e pei ona taumafai le tusi tala e momoli mai mo i tatou?

Tali: O le saili muamua o le malo o le Atua, e faaopoopoina ai mea uma ia e popole ai le tagata.

AOAOGA:

1. E sili manuia e maua e le tagata e mua'i saili i le malo ma le amiotonu a le Atua.

2. 'Aua le popole i le aso ma lona ai; a ia popole i tatou i le sailiga o le malo o le Atua.

3. E lē tu'ulafoa'iina i tatou e le Atua i lana foa'i i aso taitasi.

.....

ASO SA: (Aso Sa o Tamā), 14 AOKUSO, 2016

MATAUPU: **ALOFA I LOU TAMĀ.** (Love your father)

SINI: Ia a'oa'o le vasega ina ia malamalama, o le alofa i tama, o le faamaoni i le faatinoga o faatonuga ua tuuina mai, tatou te faia ina ia tusa ma le finagalo o le Atua

TUSI FAITAU: Ioane 10: 17- 18.

FESOASOANI MO FAIAOGA:

O le mataupu lea sa faitauina, o le faataoto o lo o tau faamatalaina ai le faatinoga a le leoleo mamoe lelei. Le leoleo mamoe e malamalama ma iloa lelei ana mamoe. E iloa lelei foi o ia e ana mamoe. Na te le

tu'ulafoa'iina mamoe. O le mea e alu i ai, e mulimulita'i ai foi le lafu, auā ua iloa e mamoe lona leo.

O le faamalamalamaina e Iesu o lea faataoto, ua manino mai ai, o Iesu lava o le leoleo mamoe lelei. O Ia o le faitotoa o ana mamoe. Na te iloa lelei ana mamoe i le gasolo mai i totonu, ma mamoe e le o ni ana mamoe. O mamoe ese nei, ua faatusaina e Iesu i le augaoi. E leai lava se isi mea e sau ai, ua na ona sau e fasi ma faaumatia lana lafu. Peita'i, o mamoe tonu ia na afio mai ai Iesu i le lalolagi, sei fai i ai se galuega, ina ia avea ma mamoe o le lafu mamoe a le Alii. Ia iloa ona usita'i ma faalogo i le leo o le leoleo mamoe. Ia iloa le faitotoa e ulufafo ma toe sau ai i totonu o le lotoa. E fai mea fiafia ma ola faatasi ma isi mamoe o le lafu mamoe.

O lo o faapena foi ona vali mai ai le ata o le faatusatusaga o ituaiga leoleo mamoe. O le isi leoleo mamoe, o le auauna a lē e ana le lafu mamoe. E le popole lea leoleo mamoe auā e lē o sana lafu. E sola ese o ia mai le lafu pe a ia vaaia le lukō ua sau, ona faataapeapeina ai lea o mamoe e le lukō ina ua alu ese o ia. A o le leoleo mamoe lelei lava ia, na te tausia le lafu mamoe e pei o lana lava lafu mamoe. E ofoina lona ola mo ana mamoe, na te fasi mate i manu fe'ai latou te osofa'ia mamoe; e le afaina ia te ia pe maumau ai lona soifua, a ia saogalemu, ola fiafia ma ola sa'oloto uma mamoe. E ta'ita'iina mai e le leoleo mamoe lelei isi mamoe ese e lē o ni mamoe o lana lafu mamoe, e faalogo foi i latou i lona leo, ona avea lea ma lafu mamoe e tasi, ma le leoleo mamoe e tasi.

E mafua i se a ia vaaiga lelei i le faatinoga a le leoleo mamoe lelei?. Afai o Iesu o le leoleo mamoe lelei, ua Ia aumai se faata'ita'iga lelei mo tatou le fanau, i le faatinoina o ni faatonuga e aumaia e o tatou matua, e ao ona tatou faia i le agaga o le faamaoni lelei. Auā o Iesu, o le faataunu'uina o le finagalo o lona Tamā, ina ia tausia lelei lana lafu mamoe, ma sailia mai ma isi mamoe ua fesea'i solo, ona o le agasala. E le se fia fai mea lelei, po o se fia lelei o Iesu i lona Tamā, a o le ata moni lea o le tagata e alofa faamaoni i lona Tamā; e faalogo ma usita'i i le mana'oga o lona Tamā. E galue fiafia ma faia ona tiute ma le faamaoni, ina ia faamalieina le mana'oga ua aumaia. Tusa pe oti ai, a o le mea ua mautinoa, o le ola e foi atu i aao o le Alii.

O le alofa lea o Iesu i lona Tamā, lea foi na alofaina e lona Tamā, ma nofo tupu faatasi ma Ia i lona nofoalii mamalu i lona malo e faavavau.

GALUEGA FAATINO: Taliga Fesili:

1. O a ni auala tatou te faia e fa'aalia ai lo tatou alolofa i o tatou tamā?

Tali: O le faalogo ma usita'i, ma le faamaoni e faatino se feau na faatonuina ai i tatou, ina ia tusa ma lona mana'o.

2. O le a le finagalo o Iesu i le soifua auauna o le tagata ua ofoina atoatoa mo le Atua?

Tali: E tusa pe oti ai, a o le mea ua mautinoa, o le soifua ua ofoina mo le Atua ina ia toe maua mai.

AOAOGA:

1. Ia ofoina i le Atua o tatou ola e ala i mea lelei ua tatou faatinoina, e tusa ma lona finagalo.

2. O le tatou finau ma le faamaoni ia tatou meaaoga, o le tatou alolofa moni lea i o tatou matua.

3. Ia mafai e o tatou talavou ona fai ma faata'ita'iga lelei i isi talavou le alolofa i o latou tamā.

.....

ASO SA: 21 AOKUSO 2016.

MATAUPU: O LE TAMĀ O LE AU FAATUATUA
(The Father of Faith)

SINI: Ia a'oa'o le vasega ina ia malamalama i le faatuatua o Aperamo i le Atua, na maua ai manuia mo lana fanau.

TUSI FAITAU: Kenese 12: 4- 7

FESOASOANI MO FAIAOGA:

O ai le tamā o le au faatuatua? O le fesili o le tusi fesili mataupu silisili a le fanau. E leai se isi tali e ese mai le tali ua tatou masani ai, lea foi o lo o a’oa’oina ai tupulaga fai mai. O le tali; ‘O Aperamo.’ O le uluai tamā lea na ia mua’i faatinoina lea amio lelei i luma o le Atua, o le usita’i ma talitonu faamaoni i le Atua. E ui ina le’i mafai ona vaai tino i le ‘Tamā’, a o le faatinoina o lona ola usita’i i le Atua, na faia pei lava o lo o la faafesagai.

Ua fetalai le Alii iā Aperamo. “Ia tuua e oe lou nuu, ma tagata o lou nuu, ma le aiga o lou tamā, ae alu i se nuu ou te faasino atu ai iā te oe”. Fai mai le tala, ona alu ai lea o Aperamo e faapei ona fetalai mai o le Alii iā te ia. O le fitu sefulu ma le lima tausaga o Aperamo, lea na ia tu’u ai le nofoaga na ola ma aumau ai, ae faia le finagalo o le Atua.

Ai ana o se isi o tatou lea na fetalai i ai le Atua, ailoga e mafai ona alu; auā o le tuua o le nofoaga na ola ae ai ma aumau ai, aemaise ua lelei foi le tamaoaiga, a o ia foi o le alii o le aiga e faamoemoe i ai mea fai a lona tamā, i le ma le tofi o le alii o le aiga e pulea mea uma o le aiga pe a uma atu lona tamā. E matuā fesiligia ai le mafai ona alu; ae a tu’u foi i se isi itu; E alu i fea? E lē o manino mai i le fetalaiga a le Alii, le nuu o le a alu i ai Aperamo. A o lea lava ua tula’i ma alu e tusa ma le finagalo o le Alii. Ai o le ala lea na alu ai ma ave lana ava o Sarai ma Lota le atalii o lona uso, e faamafanafana i lona le mautonu i le nuu lea o le a alu i ai. Le nuu e le iloa pe faape’i lona tamaoaiga, a o a foi ni faafitauli o i ai; a o fea foi le nuu o le a faasino ane.

Fai mai ua alu le malaga, ua oso atu i Sekema i le aluna o More, sa i ai foi nisi o sa Kanana i ia ona po. Ua fa’aali le Atua iā Aperamo ma ua fetalai atu, ‘.....ou te foa’iina atu lenei lava nuu mo lau fanau’; ona faia lea e Aperamo o le fata faitaulaga i le Alii i lea mea.

Na fai mo Aperamo ma lana fanau lea laueleele ua oo mai lava i ona po nei. Le tau’i lea o le tagata usita’i ma faalogo i le Atua. Ua avea ma ulua’i tamā o le au-faatuatua. Auā o le faatuatua, o le talitonu lea i le Atua e lē vaaia e mata. A e talitonu faamaoni o lo o i ai manuia i le lumana’i, pe a usita’i ma faalogo i lona fetalai mai. O Aperamo o le tamā o le au-faatuatua; auā o lana faatinoga sa fai, o lo o a’oa’oina ai i

tatou e fia maua manuia mai le Atua, pe a fai o tatou talavou ma Aperamo i aso nei.

GALUEGA FAATINO: Taliga Fesili:

1. O le a le faatuatua?

Tali: O le talitonu ma faalagolago i mea e le vaaia.

2. E ese mai i le faatuatua, o le a se isi faamatalaina o Aperamo i le tala lea?

Tali: O le tamā e usita'i ma faalogo i le Atua.

3. O ai na o ma Aperamo?

Tali: Na ia ave foi o Sarai lana ava ma Lota le atalii o lona uso.

4. Na iloa e Aperamo le nuu o le a alu i ai?

Tali: Leai.

5. O ai le nuu na finagalo le Atua e alu i ai Aperamo?

Tali: O le nuu o Kanana.

AOAOGA:

1. Ia faaloga ma usita'i faapei o Aperamo.

2. O le Faatuatua, o le talitonu lava lea i le Atua i le loto ma le faamaoni.

3. O le faia o se mea ma le loto talitonu i le Atua, e iu i le manuia.

.....

ASO SA: 28 AOKUSO, 2016

MATAUPU: IA ĀVA I TAGATA PAIA (Respect the men of God)

SINI: Ia a'oa'o le vasega ina ia malamalama, o le 'ava' o se aga fa'aaloalo ua faia i se isi tagata; e pei foi ona faatinoina e fanau i matua.

TUSI FAITAU: Efeso 6: 1- 3

FESOASOANI MO FAIAOGA:

O Efeso e le tele ni faafitauli pe a fua iā Korinito le aai, e tumu i tagata eseese mai lea atunuu ma lea atunuu, ona o auala o fefaatauaiga; A o Efeso, e logologoā ona o le malumalu o le atua tamaita'i o Tiana. Le malumalu o fefaatauaiga o faatusa o mea e fau i lima o tagata, mai ma'a taua eseese, o lo o faamatagofie ai le faatusa o le atua tamaita'i. O se auala ua faia e faatosina ane ai tagata i totonu o lea malumalu, i nei mau vaaiga faatosina loto.

Peita'i o le lolofi ane o tagata i lea malumalu ona o le fia molimauiina o lea matagofie, ua fai ma ala e suia ai lagona o le tele o tagata, ona o le matagofie o lenei vaaiga. O nei la suiga i vaaiga ma lagona fou ua tutupu ane, ua galo ai iā Efeso le ola faa-Kerisiano o le tagata talitonu ma faatuatua faamaoni i le Atua. Ua le gata i le va o ulugalii, a ua faapena foi i fanau i le va ma matua, ma isi foi tagata. Ua leai se va tapuia, ua sola le 'ava' fai mai ai le tulafono e lima.

O le ala lea o le faamanatu o le tusitala iā Efeso, i le vaega mulimuli o lana tusi, le itu o fanau. O se auala ua manatu le tusi tala e mafai ona fo'ia ai le faafitauli lea pe a tapu'e ma faatonu lelei fanau. Auā o le mea ua mautinoa, ua afaina fanau i nei vaaiga. A o le aafiaga lea, o le solia ai e fanau le va tapuia ma matua, faapea le va fa'aaloalo ma isi tagata, o le a soloatoa le vaai i tagata uma, ma fai ai le sa'olotoga o le tagata lava ia. Fai mai le tusi tala; 'O outou le fanau, ia outou faalogo i o outou matua i le Alii, auā o le mea tonu lava lea.' O le manatu o le tusi tala, afai ua faaletonu matua i nei suiga, ma ua vaivai ai le la pito laau mo fanau; O lea ua faamanatu e le tusi tala, ia faalogo i le Talalelei. Ia manatua matua faaleagaga, o tagata paia ia o lo o alagaina pea le finagalo alofa o le Atua i le tagata. E lē o le tagata la e mafua ai ona usita'i ma alolofa i tatou i ai, a o le finagalo o le Atua ina ia mausali i le loto o le tagata, aua nei tosina le loto ma le vaai i suiga ua faia, ona o le matagofie o mea ua

faia i lima o le tagata. A o le matagofie sili e lē suia, ae tumau e oo i le faavavau, o le matagofie o le Alii lea e auala mai i nei tagata Paia.

O le ala lea o le faamanatu o le tulafono e lima, auā o le ulua'i tulafono lea e i ai ma lona tau; ina ia ola magafagafa le tagata i lona tausia ma faatino ia lē na o matua a ia faia foi i tagata paia. O le a manuia ai oe, ma ia e nofo tulu'i ai i luga o le laueleele.

GALUEGA FAATINO: Taliga Fesili:

1. O le tulafono e fia lea e faamanatu e le tusi tala i fanau a Efeso?

Tali: O le tulafono e lima.

2. O ai isi tagata ia e tatau ona i ai i totonu o le tulafono lea e tusa ma le manatu o le tusi tala?

Tali: O tagata Paia.

3. O le a le mea ua folafolaina i le tagata e ava i matua?

Tali: E maua le manuia ma nofo tulu'i ai i luga o le laueleele.

AOAOGA:

1. Ia ava i tagata paia e pei ona faia i matua; e nofo tulu'i ai i luga o le fogaeleele.

2. O le tagata manuia e le femoumoua'i lana vaai ma lona talitonu i le Atua.

3. E lē suia e le aulelei po o le feilafi ma le manaia o mea fau e tagata le matagofie o le Atua Soifua.

.....

ASO SA: **(Aso Sa Talalelei), 4 SETEMA 2016**

MATAUPU: TALIA LE TALA LELEI (Accept the Good News)

SINI: Ia a'oa'o le vasega ina ia malamalama o le taliaina o le Tala Lelei, o le taliaina lava lea o Iesu Keriso i lona lava loto.

TUSI FAITAU: Roma 16: 17- 20

FESOASOANI MO FAIAOGA:

E leai se isi tala e sili ona lelei, i lo le Tala Lelei iā Iesu Keriso. O le tala o le faaolataga mo tagata uma. E lē na o Iutaia, ae aofia ai ma tagata nuu ese ua talitonu, ma taofimau i lea tala e lelei, e feola ma soifua ai i aso uma.

A o i ai le Aposetolo i Korinito, ua ia faalogo i faafitauli i mea o lo o tutupu i tagata paia o le Talalelei, i le taumafai atu o tagata faatupu faalavelave, e titina le talitonuga o tagata Kerisiano iā Iesu Keriso. O le tusi la a le aposetolo, o lo o ave i tagata paia uma o lo o ola ma nonofo i Roma. O se tusi faamalosi au i le au-Kerisiano, ina ia matuā mata'itu tagata ia, o le a fai ma faafitauli ia i latou.

O le mataupu mulimuli la lea o le tusi a le Aposetolo i le au paia uma o lo o i Roma, o lo o momoli atu ai ona alofaaga ia i latou sa alolofa ma fesoasoani ane i lana galuega a o i ai o ia i Roma; Faatasi ai ma lana aoi i le au uso, ina ia mata'itu tala'iga sese e oo ane ia i latou e faatupu ai maseiga ma fevaevaea'iga, ma mea e tausui ai i le Tala Lelei. Auā e lē o mea ia sa a'oa'oina ai i latou i le Tala Lelei iā Iesu Keriso.

O le faamanatu a le Aposetolo i le au uso, ina ia maua'a pea lo latou faatuatua i mea ua iloa i lo tatou Alii o Iesu Keriso. 'Aua nei liliuese lo outou faatuatua, a ia liliuese outou mai nei tala'iga sese, auā e le auauna i latou i lo tatou Alii o Iesu Keriso, a o latou lava manava; ma latou faasese i loto o tagata ua lē manatu leaga, i lo latou faaneene ma faavi'ivi'i. A o uiga ia o tagata manatu faapito, tagata na'o ai; e manatu lava na o latou lava laualo, tusa pe le aai isi tagata, a ia maoona o latou laualo. Peita'i, o se ata e faatupu ai le ai'u ma le ita i isi tagata ma avea ai ma ala e ta'uleagaina ai ia tagata mai le mafaufau lelei sa i ai.

O se vaaiga le lelei lea i le mafaufau o le Aposetolo, auā o le a matuā afaina ai a'oa'oga o le Tala Lelei iā Iesu Keriso. Peita'i o le feau taugologolo a le Aposetolo, ina ia popoto outou i mea lelei, a ia valelea

i mea leaga. O lona uiga, aua nei avea le tau faamata'u mai o ia tagata e faatupu ai maseiga ma ala e aveesea ai lo outou talitonuga ua i ai i le talalelei; a ia matua tutumau lo outou ola faatuatua iā Iesu Keriso; auā e le pine ona solia o Satani i lalo o outou vae e le Atua e ona le manuia uma lava.

Ua i ai le pine faamau o le Tala Lelei i le tagata faatuatua, e ala i le maliu ma le toe tu manumalo mai o Iesu i le oti ma le tuugamau, ua maua ai le faaolataga mo tagata uma. O le Tala Lelei lea, o le a la se isi tala e sili i lea tala. Talia loa ma tumau ai, mautinoa le i ai o lo tatou avanoa i le malo o le Atua e faavavau.

GALUEGA FAATINO: (Taliga Fesili)

1. O ai tonu tagata ia o lo o ave i ai le faamamafa a le Aposetolo, ina ia latou taliaina le Tala Lelei?

Tali: O tagata faatupu fevaevaeiga ma mea e tausuai ai, ina ia mata'itu ma fai i ai se fesoasoani.

2. O le a le manatu o le tusi tala i mea e ao ona alo ese ai le tagata faatuatua?

Tali: Ia alo ese i mea e le'i a'oa'oina ai i latou; auā o mea leaga, o le lē usita'i ma le lē taliaina lea o le tala iā Iesu Keriso.

3. O le a le iuga o le tagata e faatupu fevaevaeiga i le manatu o Paulo?

Tali: O le a matua solia e vae o le au-Kerisiano.

4. 'Ou te aioi atu foi ia te outou le au uso e',..... O ai i le taimi nei e tataua ona aafia i le aioi a le Aposetolo?

Tali: O le au Kerisiano faatuatua uma, o lo o mafai ona faitau ma malamalama i ai i lenei tusi.

AOAOGA:

1. Ia tatou faailoa le Tala Lelei iā Iesu Keriso ia tatou amio fa'aalia i aso fai so'o.

2. ‘Aua le femoumoua’i lo tatou talitonuga ua mausali i le faaolataga iā Iesu Keriso.
 3. O le tumau i le ola faatuatua, o le faailoga o le tumau pea i le Talal Lelei iā Iesu Keriso.
-

ASO SA: 11 SETEMA, 2016

MATAUPU: FILIFILIA E IESU (Chosen by Jesus).

SINI: Ia a’oa’o le vasega ina ia malamalama, e filifilia e le Alii le tagata, ua ia silafiaina e talafeagai ma le galuega faasoo.

TUSI FAITAU: Mareko 1: 16- 20

FESOASOANI MO FAIAOGA:

O le filifila e Iesu o ona so’o, o le mea patino lava lea a le Alii. E matuā ese lava ma le filifilia o tagata faigaluega i se falefaigaluega. E faasalalau avanoa, aumai tusi talosaga ma tusi pasi, faatalatalanoaga, ona faatoa maua lea o tagata e agavaa mo lea galuega. Ua lē o toe sa’o tele lea faasologa i lenei vaitau. Ua tele lava ina maua e se tagata e tau aiga i ai, ia po o sana tama masani foi, tusa pe lē fetau i ai le tusi pasi ae tele sina mea mama e maua mai ai.

Peita’i o le filifiliga a le Alii i le tala sa tatou faitauina, e matuā nenefu ai lava le ata lea, i filifiliga e faia e le tagata. Fai mai le tala, ua savali ane Iesu i le vai e latalata ane i Kalilaia, ona silafia lea e Ia o Simona ma Aniterea lona uso, ua la lafo le upega i le vai; auā o tagata faifaiva i laua. O le mana’o o le Alii, ia la mulimuli atu ia te Ia, e a’oa’oina ai i laua i le la faiva o le faifaiva. Fai mai ua tuua le la upega, ma mulimuli atu iā Iesu.

Ua tuana’i te isi atu lea mea, ona silafia lea e Ia le fanau a Sepetaio, o Iakopo ma Ioane, o lo o fai masae o latou upega i luga o le vaa. Ua

valaau atu le Alii iā i laua, ma ua faapena foi ona tuua lo la tamā ma ana auauna, ae mulimuli atu iā Iesu.

E ese foi le faiga filifiliga a Iesu, auā e fai le filifiliga i le taimi tonu o lo o faatino ai le agavaa o le tagata. E tutusa faiva a nei auso'o e toalua, ae eseese vaega o faatinoga na filifilia ai e Iesu. O Simona ma Aniterea, na valaauina e Iesu o lo o lafo le la upega. O le faatinoga lea, a lelei, e matua tele lava ituaiga ia eseese e maua ma ai. E faapena le galuega faaso'o; o upega ia o le galuega, e galulue i le va o tagata e toatele, ina ia tele ni agaga e iloa ma talitonuina le oo mai o le malo o le Atua. O Iakopo ma Ioane, na valaau Iesu o lo o fonofono masae o le upega. O se galuega mo le toe faaleleia o le upega, ina ia 'aia nei maumau i'a o le faiva. O se vaaiga lea i le isi itu o le galuega faaso'o; o le tapu'eina o agaga o tagata a maumau i le tele o mau perofeta pepelo o le Tala Lelei. E tataua ona toe ave i ai se faamalosi, ina ia mautinoa, le mausali o le ola faatuatua faamaoni iā Iesu Keriso.

Le faigafaiva sa faatinoina i le gataifale, a o lea ua suia e Iesu i agaga o tagata. Lea o le a lafo le upega o le ola faaleagaga, e maua mai ai ni agaga mo le Alii. O le eseese lea o le filifiliga faale-tagata ma le filifiliga a le Alii. Fia maua ni talavou e faia ni filifiliga amiotonu e pei ona faia e Iesu. E filifili le tagata tonu o lana matafaioi lea. A faatino foi, e faatino i le mea e gata ai le mafai. Lea lava na iloa i le taimi o Iesu a o femulimulia'i ai ona so'o e toasefulu ma le toalua, o so'o sili ia ona latalata iā Iesu. O tama autu ia o le galuega. Lea foi na iloa i le aso o le afio ifo o le Agaga Paia, ina ua fai i latou ma ta'ita'i i le amataina o le galuega, ina ua tu'ua na o i latou e tala'iina le finagalo o le Atua. Filifiliga sa'o ia, na taunu'u i le lelei.

GALUEGA FAATINO: Taliga Fesili:

1. O ai ulua'i so'o na filifilia e Iesu?

Tali: O Simona ma Iona uso o Aniterea.

2. O ai le isi igoa e iloa ai Simona a o feoa'i ma le Alii?

Tali: O Peteru.

3. O fea na fai ai le filifiliga lea a le Alii?

Tali: I le vai o Kalilaia.

4. O tagata faifaiva, o tagata ia o le gataifale. Ua avea e Iesu e fai ma faifaiva i fea?

Tali: E fai ma faifaiva o le Tala Lelei.

AOAOGA:

1. E filifilia i tatou e Iesu mo lana Tala Lelei, ina ua tatou faamaoni i tiute ua valaauina ai i tatou.
2. E lē faaituau le filifiliga a le Alii pei o filifiliga e faia e tagata.
3. So o se tofi ma so o se tiute e filifilia ai i tatou e faatino, ia faia ma le faamaoni, auā o tofiga mai le Atua.

.....

ASO SA: 18 SETEMA, 2016

MATAUPU: FAAMALOLO E IESU MA'I (Jesus Heals the Sick)

SINI: Ia a'oa'o le vasega ina ia malamalama, o le mea tonu lea na afio mai ai Iesu i le lalolagi, o le faamaloloina o ma'i eseese o lo o maua ai le lalolagi o tagata.

TUSI FAITAU: Luka 14: 1- 6

FESOASOANI MO FAIAOGA

O Iesu, o le foma'i sili. O Ia o le foma'i o foma'i. O ma'i e lē mafai e foma'i o le falema'i, ma i latou o i ai tomai faataulasea, ua na o Iesu e maua ai le mapusaga. E lē faailogaina foi e Iesu ma'i e malolo iā te Ia. O lona lea faiva na afio mai ai i le lalolagi, ina ia malolo so o se tasi o mafatia i mafatiaga o le lalolagi nei. E le faapitoa foi e le Alii se aso o

ana faamalologa, a o le aso lava ma le taimi e oo ane ai le ma'i, o le taimi lava foi lea e faaolaina ai e Iesu.

O le i ai o le Alii i le fale o le tasi alii o le au Faresaio e taumafa ma ia i le sapati, na ia silafia ai le tasi tagata ua ma'i i le fula. Ona fetalai atu lea o Iesu i a'oa'o tulafono ma le au Faresaio, e tusa ma le tulafono o le sapati. Auā o i latou nei o lo o tau su'e se mea latou te molia ai Iesu i le faamasinoga. O le fesili la a le Alii i a'oa'o ma le au Faresaio, po o le a sa latou tali ane e tusa ma le mafatiaga o lo o i le tagata ma'i.

E lē o taua e le tusitala, po o le a sa latou tali ane, ae na ona taua, '.....na ona faalologo e tusa ma ana fetalaiga i lea aso'. Ona aapa ane lea o Iesu ma faamalolo ia te ia, ona tuu atu lea o ia e alu. Ona fa'auau lea o ana a'oa'oga faafaataoto ia i latou, po o le a sa latou tali ane, e tusa ma le tulafono o le sapati. Peita'i ane, ua leai lava se tali e tusa o nei a'oa'oga a le Alii. Ua fetalai Iesu, 'O so outou ua i ai se asini po o se povi, ua pau i le lua, e le sisi ae loa i luga i le aso sapati?' O se fetalaiga na iloa ai le vaivai o le auala na taumafai ai a'oa'o ma Faresaio e lamalama iā Iesu. E leai se isi o i latou na tali ane i le Alii. E malamalama i le tulafono ma lona fa'aogaina, ae ona o le auala na o ane ai ma mulimuli iā Iesu, lea ua maua ai e le Alii lo latou vaivai.

O le fetalaiga a Iesu, ua mautinoa ai, so o se tagata lava o mafatia ma puapuagatia, ma ua fia maua se fesoasoani i le aso sapati, e le tatau ona vaoia ona o le tulafono o le sapati, ae tatau ona faia i ai le galuega fesoasoani, ina ia ola, ae le o le faatali sei uma le sapati. E tatau ona faatino le fesoasoani i le taimi ua mana'omia ai, ae lē o le faatali ona o le tulafono, auē e le faaolaina e le tulafono se tagata.

O le eseeseega lena o le galue a le tagata ma le galuega na afio mai ai Iesu. O Iesu, e le tu'u taimi, e le galue foi ona o le tulafono, ae faatino i le alofa ma le taimi ua mana'omia ai le fesoasoani. O lana lea galuega na afio mai ai i le lalolagi, o le faamaloloina o ma'i eseese ua lē maua se vai fofu, ma gasegase o le mafaufau, o lo o saisaitia ma taotaomia ai le tele o tagata, ona o le tulafono, pei o ta'ita'i o le nuu o le Atua. Ua avea le tulafono ma ala ua taotaomia ai le galuega faatino a le alofa. Lea ua maua le fofu, ua maua le vailaau o lea foi mai o le mafaufau. Le uiga lea o le faataoto na fetalai ma aoao ai Iesu i le aso; e lē o le tulafono, a o le alofa. E pei ona ia afio mai ai i le lalolagi, ina ia faamuamua i le

alofa, ae lē o le tulafono. E le faapea ua le aoga le tulafono, a o le ola e sili atu i lo le tulafono.

GALUEGA FAATINO: Nai Su'esu'ega i le Tusi Paia.

Vae tolu le vasega: Vaega muamua, o le Tusi a Mataio.

Vaega Lua, o le Tusi a Mareko.

Vaega Tolu, o le Tusi a Ioane.

Ia fai ni sailiiliga a vaega taitasi i le eseesea o faamatalaga a tusi a le au fai Evagelia i faamalologa a Iesu na faia i le Aso Sa, e pei o le tala i le faamalologa lea o lo o faamatalaina e Luka.

Ia tofu le vaega ma le latou failautusi, e faamaumaua a latou suesuega, mo le taimi e faatino ai galuega a vaega taitasi.

AOAOGA:

1. E le faatulafonoina taimi o faamalologa a le Alii.
2. O Iesu o le fomai sili, e maua ai le mapusaga i so o se mafatiaga e leai sona fofo.
3. O faamalologa o lo o auala mai ai le alofa tunoa o le Alii i e o mafatia ma puapuagatia.

.....

ASO SA: 25 SETEMA, 2016

MATAUPU: TA'ITA'I MAI LE MAMOE UA SĒ (Bring back the lost sheep)

SINI: Ia a'oa'o le vasega ina ia malamalama, e le tuua i tatou e Iesu ina ia o tatou fesea'i i lenei lalolagi agasala.

TUSI FAITAU: Luka 15: 3- 7

FESOASOANI MO FAIAOGA:

O le tala lea sa faitauina, o le tala ua masani ai le faalogo. O se tala faafaataoto a le alii o Iesu, e tali ai le ma'ema'eā o a'oa'o o le tulafono ma le au Faresaio, ona o le vaaiga lea ua o latou vaaia i le aai faatasi ai o Iesu ma le tasi o le Faresaio; e manatu i latou o le tagata agasala. Peita'i o le muimui ma le iu leo le lagona ae silafia e le Alii, na Ia a'oa'o atu ai lea faataoto, sei faamalamalama ai le pogisa o Faresaio ma le au Tusiupu.

O le faataoto a le Alii i le lafu mamoe e selau. Ua leiloa le tasi; O le fesili a Iesu, pe lē tuua ea e ia le iva sefulu ma le iva, ae alu ma saili mai seia maua? O le ata o le galuega faatino a le leoleo mamoe. O lo o i le leoleo mamoe lana filifiliga tonu, i le alu ma le le alu e toe saili i le mamoe ua leiloa. A o le tali lea a le leoleo mamoe e alofa faamaoni i ana mamoe, na te lē tuua se mamoe e fano i le malaia; Le ala lea o le aai faatasi o le Alii ma le tagata agasala, auā o le mamoe lea na leiloa, ua ia tuua le iva sefulu ma le iva, ae matuā saili lava ia maua. Lea la ua maua; le filifiliga lelei lea a le leoleo mamoe lelei, na te lē tuua se mamoe e leiloa ma fano i le malaia. Le mamoe na leiloa lea ua toe ta'ita'iina mai e le Alii ina ia fiafia ma isi mamoe o le lafu.

O le lē fiafia o le au tusiupu ma le au faresaio i le vaaiga lea ua faia e Iesu, o le ata lea o le filifiliga a le leoleo mamoe e le popole i le lafu mamoe, auā e lē o sana lafu mamoe, o se auauna a le e ana le lafu mamoe. E le maua i le agaga o le galue faamaoni, e lē afaina ia te ia le lelei po o le lē lelei foi, e le popole pe a leiloa se mamoe, pau le mana'o o le faataunuu.

A o se vaaiga fiafia lea i le leoleo mamoe lelei, na te faapotopoto tagata o lona aiga ma ana uo ma ona tuaoi latou te olioli faatasi ina ua toe maua lana mamoe na leiloa. O le ata o le fiafia i le lagi, i le tagata e toatasi e salamō ma fia faia le finagalo o le Atua. O le a tele le olioli i le lagi ona o lea tagata e toatasi, ae itiiti i e amiotonu e toaivasefulu ma le toaiva e le tusa i ai le salamō. Auā o le salamō, e le maua i le tagata amiotonu, a o le tagata agasala ua lagonaina lona faatauva ma ua fulitua i le agasala na ola ai, o le a matua pepese ai agelu o le lagi.

Mamoe leiloloa ia na afio mai ai Iesu e toe ta'ita'ina mai i totonu o le lotoa mamoe a le Atua. A ua avea ma ala ua iloa ai, e le na o le pau ia o mamoe leiloloa. O lo o leiloloa foi ma i latou o lo o fai ma ta'ita'i o le nuu o le Atua. Le ala lea o le a'oa'o atu o Iesu i le faataoto lenei, se'i faalologo i ai mamoe uma o lo o leiloloa, ma ia o latou lagonaina, o lea ua afio mai o Ia e fai le talisuaga ma i latou. Ia o latou lagonaina le faatauva, ma talia le oo mai o le malo o le Atua ma lana faaolataga i le lalolagi.

GALUEGA FAATINO: Taliga Fesili:

1. O ai tonu ia o lo o faatatau i ai mamoe ua se e tusa ma le tala a Luka?

Tali: O lo o faatatau i tagata agasala.

2. O le a se vaaiga fiafia i le lagi i se tagata ua salamō?

Tali: O le a matua tele le fiafia i le tagata ua salamō ae itiiti i tagata amiotonu.

3. O isi mamoe leiloloa na iloa i le a'oa'oga lenei a Iesu?

Tali: O le au Tusiupu ma le au Faresaio lea na o latou muimui i le Alii.

4. O le a le auala e mafai ai ona toe avea i tatou ma mamoe o le lafu mamoe a le Alii?

Tali: O le salamō ma talia le oo mai o le malo o le Atua e ala iā Iesu Keriso.

A'OA'OGA:

1. O fea lava o tatou leiloloa ma taase ai ona o le malosia o le tuinanau, ua na o Iesu e maua ai lo tatou faaolataga.
2. Ua aapa mai le Alii e toe ta'ita'iina i tatou i le ala tonu tatou toe maua ai le ola e faavavau.
3. Ia avea o tatou talavou ma ta'iala o nisi uso o lo o leiloloa ona o le fili ma ana faaososoga.

.....

ASO SA: 23 OKETOPA 2016

MATAUPU: O FANAU O LE MEAALOFa MAI LE
ATUA (Children – the gift from God).

SINI: Ia malamalama fanau, o i latou o faamanuiaga mai le Atua mo ona tagata. Ia savavali fanau i ala o le Atua ona atoatoa lea o ia faamanuiaga ua aumai.

TUSI FAITAU: Salamo 127: 3-5

FESOASOANI MO FAIAOGA:

I le aotelega o tusitusiga nei ua faamauina i le Tusi o Salamo, o lo o tele ina fa’aaogaina le gagana faafa’atusa (metaphorical language) e faamatala ai ni mea sa tutupu i le tala faasolopito o le nuu o le Atua. I manatu o le au Suesue o le Tusi Paia, e tãua le va’ili’ili totoa o ia gagana faafa’atusa, ina ia malamalama gofie tagata faitau ma ia maua le aano moni o le feau o lo o momoli mai e le faisalamo po o le tusitala. I le tusi faitau o lenei aso, o lo o faamatala ai fanau o le tofi mai le Alii, o ē ua fanau mai o le taui lea mai ia te ia (Salamo 127:3). O le upu tofi (inheritance, property or possession) e uiga tutusa ma le upu ‘faasinomaga’ –f.t. fanua, suafa matai ma isi. O se meatotino e tãua ma aogã. E tatau ona tausī ma faapelepele ina ne’i gaoia pe ave faamalosi e se isi tagata. A o le upu taui e uiga tutusa ma le upu ‘totogi’ (wages). O se faamanuiaga e maua e le tagata galue ina ua faamalieina le loto o le tagata e ana le galuega i se faatinoga ua faia. O le vaai a le faisalamo, o fanau o se faamanuiaga mai le Atua mo ona tagata. E tatau ona tausī ma faapelepele i ai i latou ua maua fanau. E pei i latou o u-fanafana i lima o le toa. O *u-fanafana* o lo o ta’ua o āū (arrows) e fa’aaoga e le tagata tau/toa i taimi o taua. O aupega e faamoemoe i ai lona saogalemu. O

lona uiga e tatau ona faaiila ma faamaai u-fanafana a o le'i oo mai le taua. E tatau foi ona tele u-fanafana ma ia tumu ai lana utu (*o le 'ato e tu'u ai u-fanafana - quiver*). Auā a tele ū-fanafana e tapenaina, o le mautinoa foi lea o le manumalo ma le saogalemu o lona ola. Lea lava e molimau le faisalamo, *e amuia le tagata e tumu ai lana utu* (Salamo 127: 5). Peitai, e leai foi se aogā e tumu ai le utu i u-fanafana a'o āū matatupa ma āū elea, e lē oti ai se tagata. O lona uiga, e le gata ia tumu le utu, o le faailoga o le lava tapena ma sauniuni i taimi uma ae ia mautinoa foi, ia tumu i ū-fanafana ma'amā'ai. A tuu mai la i fanau, e peiseai o lea ua faapea mai le faisalamo, e manuia matua, aiga, nuu, Ekalesia ma le atunuu pe a a'oa'oina lelei fanau. Ia a'oa'oina i le poto masani o aso uma faapea foi i le iloa faaleagaga. E pei lava ona a'oa'o mai le Tusi Paia, a ola matata'u fanau i le Atua, o le faatuputeleina foi lea o le poto ma le malamalama e mafai ai ona latou fetu'utu'unai faaiuga e manuia ai. A fetaia'i foi ma faafitauli po o faaosoosoga o le ola nei, e tele lava le avanoa e mafai ona manumalo ai fanau, ina ua latou ola matatau i le Atua. O ū fanafana maamaai na, e maua ai le faaeaina. E maua ai e matua le fīafia ma le olioli ae lē o le faamāina. A o le sili o ia mea, o le viiga o le Atua, ina ua ola faapaiaina fanau, o meaalofo na ia aumai mo le manuia o tagata uma. Fai mai le mataupu o lenei aso, **“O Fanau o le meaalofo mai le Atua.”** O le upu meaalofo (gift), e mafai ona faamatalaina o se foa'i e faia mo se isi tagata i le loto malie. E faia i le manatu ia faafiafia le loto o le tagata o lo o ave i ai lea meaalofo. O le ala foi lea e fai meaalofo ai i se oloa e aupito sili ona lelei ma matagofie po o se oloa foi e taugata ma anagata. O lona uiga, tamaiti, e lē itiiti le faamoemoe o le Atua mo i tatou le fanau. O i tatou o se faamanuiaga mo matua, aiga, nuu, Ekalesia ma le atunuu. Peitai, e lē mafai ona manuia o tatou faamoemoea pe afai tatou te lē savavali i ala o le Atua. Ia tatou fiafia e auai i Aoga Aso Sa, Autalavou, Aufaipese ma isi faapotopotoga e mafai ona a'oa'oina ai i tatou i ala o le Atua. 'Aua nei ō tatou manatu ifo ua tatou matutua, ua maua le poto ma le atamai ona peiseai lea ua tatou faamasino le faaiuga a matua. Ia tatou faalogo ma usita'i i matua tatou te manuia ai. Ma ia manatua le fanau e, e le o tuulafoa'iina i tatou e le Atua. O i tatou o meaalofo ua ia aumai. O lona

uiga, o ā mea tatou te vaivai pe moomia ai se fesoasoani, ia tatou tatalo i le Atua e maua ai le tali.

GALUEGA FAATINO: Tusigasolo

1. Fai ni tusigasolo e faatatau i le tāua o fanau i totonu o aiga, nuu, Ekalesia ma le atunuu. (4 laina i le fuaiupu ae tailua fuaiupu i le solo). Ia atagia i ia tusigasolo le alofa o le Atua i fanau.
2. Ia tauloto le Salamo 127, ma ia faamanatu pea e lau Susuga i le Faiaoga.

PESE:

- | | | | |
|------------------|--|------------------|--|
| <u>1.</u> | O Iesu na fetalai.
O tamaiti ia tuu mai (*2)
Ua Ia faatusalia
I e ua sao i le manuia. | <u>2.</u> | Ia avea pei o tamaiti
O se olaga e mama (*2)
Ua sao a latou amio
I luma o lana silafaga |
|------------------|--|------------------|--|

Tali: Matua se'i tu'u mai
Le fanau ia o mai (*2)
Ia Iesu le Keriso e ola ai
Ia Iesu le Keriso e ola ai.

AOAOGA:

1. Ia savavali i ala o le Atua.
2. Faalogo ma usita'i i fautuaga a matua, e maua ai le manuia.
3. Ia faamaoni i le valaauina, po o fea lava o i ai: aoga, faigaluega, pe tausi aiga, ia galue ma le mautinoa e i ai faamanuiaga a le Atua i lou olaga.

.....

ASO SA: 30 OKETOPA, 2016

MATAUPU: **O Ā’OGA A LE ATUA MO FANAU**
(God’s school for the children)

SINI: Ia malamalama fanau, e tatau ona ō faatasi le
poto masani o aso uma ma le iloa faaleagaga.

TUSI FAITAU: Luka 2: 41-52

FESOASOANI MO FAIAOGA:

E lē fesiligia le tāua o le ola a’oa’oina i so o se ā’oga i nei aso pe afai e fa’aaoga tatau e fanau le avanoa e a’oa’oina ai i so o se mataupu ua su’esu’eina. O le soifuaga foi lenei tatou te i ai, a lelei ma i’u manuia a’oa’oga, ua manuia le agai atu i le lumanai. Ae a faatamala i le ola a’oa’oina i le taimi nei, e taumate foi i le ete pe tua i ni ā le lumanai. Peitai, o le a’oa’o mai o le Tusi Paia, afai e maua le poto ae leai se faautauta i le Atua, ua leai foi se aogā. O lona uiga e tatau lava ona ō faatasi le a’oa’oina i le poto masani o aso uma ma le a’oa’oina i mataupu tau le ola faale-Agaga. O le mafuaaga foi lea o le naunau pea o matua ia fiafia ā latou fanau e ō i le lotu. Ia ō i le Aoga Aso Sa, auai i le Autalavou ma ia fiafia e faalogologo i tala tau le soifuaga o Iesu Keriso. O le faamoemoe, ia a’oa’oina fanau i ala o le Atua.

O le tusi faitau o lenei aso o lo o faamauina ai le faateia o Maria ma Iosefa i le oo atu e saili Iesu o lo o i ai o ia faatasi ma a’oa’o o le lotu. Fai mai le fesili a Maria: “*Lau tama e, se a le mea ua e faapea mai ai i a i mā’ua? Faauta, o i mā’ua ma lou tama sa ma saili lava ia te oe ma le tiga*” (Luka 2: 48). O le upu tiga pe a faaliliuina mai le gagana Eleni, o lagona o le popole ma le lē mautonu ona o le alofa. O upu ua atagia ai le alofa faapelepele o matua i fanau. Peitai, e ese foi le finagalo o Iesu ia, fai mai a ia: “*Se a ea le mea na oulua saili mai ai ia te au? Lua te lē iloa ea e tatau ona ou i le fale o lo’u Tama?*” (Luka 2: 49). Tamaiti, e lē faapea ua lē fiafia Iesu i ona matua, leai. Peitai, o lea ua faamanino e Iesu i ona matua ma tagata uma sa i lea mea lona faasinomaga: o le malumalu o le Atua. O lo o tā’ua tausaga o Iesu e sefululua (12) – Luka 2: 42. I le talitonuga faa-Iutaia, o tausaga ia e tapena ai o so o se talavou

Iutaia, e tauave nisi o tofiga i totonu o le lotu Iutaia. O le mafuaaga lea o le ave e Maria ma Iosefa o Iesu e molimau i le tausamiga o le paseka i lea tausaga. O le tausamiga o le paseka, o se tasi lea o aso tāua mo Iutaia, e faamanatu ai pea le alofa lavea’i o le Atua, mai lava i Aikupito seia oo mai i le taimi nei. Peitai, ina ua toe foi le malaga, e le’i alu ai Iesu ae ua nofo o ia i le malumalu, ua faalogologo i a’oa’oga a a’oa’o o le lotu. I lona tulaga faatagata soifua, e tataua lava ona a’oa’oina o ia i tulafono ma ona tiute o le a feagai ai. Peitai, o le molimau a Luka, na tauaifo tagata uma sa i lea mea, i ana tali ma ona manatu. O le faailoga mamaututu lena, tatou te iloa ai, e leai lava se isi poto e sili atu i lo Iesu. O le talitonuga foi faa-Iutaia, o le malumalu e faia ai tapuaiga masani ma tolaulauina ai tulafono a le Atua na tuuina mai ia Mose e fai ma taitaitama i tagata uma. Peitai, o le Afio mai o Iesu, o Ia lava o le atoaga o le tulafono. Ai lava se tasi e talia o Ia ma faatuatua ia te Ia, o le talia lava lea o le tulafono a le Atua. Fai mai le mataupu o lenei aso, “O ā’oga a le Atua”. Tamaiti, o A’oga a le Atua, o a’oa’oga ia tatou te maua ai le ola e faavavau. O a’oa’oga lelei ma aogā, e maua ai e i tatou le manuia. E tele ma anoanoa’i auala e mafai ai ona maua o ia a’oa’oga lelei a le Atua mo i tatou. E amata mai lava i totonu o ō tatou aiga. Ia tatou faalogo ma usiusita’i i matua ma i latou uma o lo o fautuaina i tatou i mea lelei. E maua foi i totonu o le faleā’oga, o falefaigaluega ma so o se mea, pe afai lava tatou te fiafia e faasoa ma talatalanoa i le alofa o le Atua. Ia fiafia e faitau le Tusi Paia ma ia toaga e ō i le Aoga Aso Sa, Autalavou, Aufaipese ma isi vaega tāua o le ekalesia e maua ai le malosi faaleagaga.

Ua faamanatu foi le tala o lenei Aso Sa, ia tatou fiafia e ō i le Malumalu o le Atua. ‘Aua nei faaseseina i tatou i le faapea ifo, e tutusa le nofo i le fale ma le alu i le lotu. Tamaiti, e sese lea mau tauave. A moni le agaga e te alu ai i le falesa, e te tapuai ma faalogologo e fia maua se feau tāua mo lou ola faaleagaga, e faapena foi ona e lagona le oo ifo o le feau a le Atua i lou loto. Ae afai lava e te alu ona o le vaaiga a tagata, o le faafitauli lena, ma e tataua ona tuu, ‘aua le toe faia. O lenei vaitau, ua tele ma ua ala eseese faaososoga a le fili. E moomia lava lo tatou mafuta i le Atua i taimi uma e maua ai lo tatou malosi i le tino, mafaufau ma le agaga tatou te tali atu ai i ia faaososoga pe a oo mai. I

le faaiuga o le tusi faitau, o lo o tā'ua ai e Luka, le faatuputeleina o le potou o Iesu ina ua ia te ia le Atua. A o le isi lea feau tāua o lenei aso, e alofagia i tatou e le Atua ma faatuputeleina lo tatou potou pe afai tatou te fiafia e o i le fale o le Atua. O Iesu Keriso, i lona soifua a'oa'o mai ia i tatou, o le Aoga Sili lea ua aumai e le Atua, ina ia tatou iloa lona finagalo alofa. Peitai, na valetuulima e le tagata lea avanoa tāua. Pau o lea, ia tatou faatuatua ia te ia ma ia fa'aa'oa'o i ona ala uma tatou te maua ai le ola e faavavau.

GALUEGA FAATINO: Fa'aali Manatu

1. Ia fefa'asoaai le vasega po o ā ni aafiaga o le potou faatekenalosia (technology) i nei aso i luga o le ola faaleagaga o fanau, ma ia fetufaa'i le vasega po o ā ni fofo faaleagaga e mafai ai ona foia ia faafitauli.

PESE: *Faitau le Tusi ma tatalo i aso uma.....*

AOAOGA:

1. Toaga i le Lotu, Aoga Aso Sa, Autalavou, ma le Aufaipese ina ia tele le taimi e mafuta ai ma tagata o le Ekalesia ma saga faamalosi ai pea le ola faaleagaga.
2. Tatalo i le Atua e maua ai le potou ma ia fesoasoani pea lona Agaga Paia e tautoalua i tatou i taimi uma.
3. Faitau le Tusi Paia ma tatalo i aso uma.

.....

ASO SA: **6 NOVEMA 2016**

MATAUPU: **O LE TAULAGA MA LE ATUA**
(The offering and God)

SINI: Ia a'oa'oina fanau i le tāua o le ola faitaulaga mo le Atua ma lona finagalo. Ia iloa e fanau, e

finagalo le Atua ina ia faia le taulaga ma le amiotonu.

TUSI FAITAU: Mika 6:6-8

FESOASOANI MO FAIAOGA:

I le talafaasolopito o Isaraelu, o lo o faamauina ai le tele o taulaga eseese e masani ona ofoina e Isaraelu mo le Atua. E aofia ai taulaga mu - *burnt offering*, taulaga faafetai – *a thank offering*, taulaga mo le faamagaloga -*sin offering*, *trespass offering* ma isi taulaga na osia e le nuu mo le Atua. Peitai, o ia taulaga eseese, e molimau le au Suesue o le Tusi Paia, e tolu (3) lava mafuaaga tetele e mafua ai ona faia e le Isaraelu le taulaga. (1) Ia maua le faamagaloga mai le Atua ma toe faaleleia le mafutaga ua leaga ona o le agasala (Levitiko 4: 3, Iopu 1:5) (2) O le taulaga faafetai i le Atua ona o lona alofa mai. (Kenese 8:20, 1 Tupu 3: 15). (3) O le taulaga i le Atua ina ia fesoasoani mai i le taua o le a faia (1 Samuelu 13: 9).

O le finagalo o le Atua, ia faia le taulaga ma le amiotonu. O lona uiga, e atoatoa le taulaga ma faafogaina e le Atua pe a faia ma le amiotonu. Peitai, o le faafitauli lea ua lofia ai le nuu o le Atua, e pei ona tatou faitauina i lenei taeao, ua faia le taulaga ma le amiolētonu i luma o le Atua. Ua faia tau o se mea e maua ai se faamagaloga, ae ua lē faia ma le amiotonu. Lea e sa’i ai le perofeta ma faapea ifo, “....*ou te alu ea i luma o le Atua ma ni taulaga mu, o tamai povi e tasi o latou tausaga. E fiafia ea le Atua i le afe o mamoe poa a manomano o alia o tafe suauu....ou te tuuina atu ea lau ulumatua e su’i ai lau agasala a lo’u agaga?*” Faauta tatou, o mea lelei mea ia i le manatu o le tagata faitaulaga, lea ua oo a i fanau ua ofoina e saili ai se faamagaloga. Peitai, e lē o le finagalo lena o le Atua. E finagalo le Atua i le amio ia lelei ma ia suia o latou olaga e ala i le salamō faamaoni. O se faafitauli lea ua feagai nei ma Mika a o i ai i lana galuega faaperofeta. E tusa ai ma faamaumauga o le talafaasolopito, na tulai mai Mika i le vaitau o le nofoaiga a Iotama, ma Aasa ma Esekia pe tusa lea o le tausaga 742-68 TLM (Mika 1:1). O vaitau ia ua faofale tu ma aga faapaupau a nuu tuaoi ae ua i tuāpa le ola talitonu o Isaraelu ma Iuta i le Atua. Lea lava e tā’ua e Mika, ua ifo i

tupua tagata uma, ua fiafia i le mulilua ma le faitaaga. Ua leai se amiotonu i taitai o le nuu i ana faaiuga fai mo tagata uma. Ua faasili le tagata mauoa ma le tagata malosia ae ua faatuatua nai le tagata mativa ma le tagata lē taualoa. Ua faatupulaia foi tagata ua faia perofetaga pepelo ma faasese le talitonuga o tagata i le Atua. I le vaai a le perofeta, ua leai se amiotonu i le faiga o taulaga i le Atua. Ua faia tau o se mea ua masani ai, ae ua le faia e tusa o le finagalo o le Atua. O le ala lea o le sa'i o le perofeta ma fautua atu i le nuu o le Atua ina ia toe foi i ala o le Atua. I le aotelega o ia perofetaga, o lo o mapuepue ai le toasa o le Atua o le a oo mai pe afai e faaauau pea ona faia e tagata le amioleaga i luma o le Atua, peitai o lo o i ai foi le avanoa e faatuai ai lea toasa o le Atua. O le avanoa e maua ina ua lagona e tagata le loto salamō ma toe foi atu i le Atua. O le upu 'salamō' o lo o faamatalaina o le liliu atoatoa (360 tikeri) o le olaga tuai e avea ma olaga fou. O le suiga fou o le olaga e amata i le taimi nei e oo i le faavavau. O le finagalo lea o le Atua, mo ona tagata, e lē o le taulaga, e lē o le tele o le tamaoiga, ae ia maua le loto salamō. Ia suia ō latou loto ma tia'i le ifo i tupua ma isi uiga mataga ae ia maua le amiotonu, alofa i so o se tagata, lotomauualalo ma ia mafuta i le Atua i aso uma. Lea lava e pese ai le perofeta o Mika, *"...ia fai le amioitonu, ia naunau i le alofa ma ia feooai ma lou Atua ma le loto faamalulalo."* (Mika 6:8)

Tamaiti, e tāua le ola faitaulaga mo le Atua. Ae ia faia le taulaga ma le amiotonu. E le na o le taulaga, e finagalo i ai le Atua. Ae finagalo le Atua i lau taulaga ma lou loto ua salamō faamaoni mai mea leaga sa e faia. Ia tatou fai taulaga ma le amio e mama. Ia faia ma le loto e lelei ona faafogaina lea e le Atua o ā tatou faigataulaga. O Iesu Keriso, o ia lava o le ositaulaga, o le taulaga foi na saunia e le Atua mo le togiolaina o i tatou le fanau ma le lalolagi atoa.

GALUEGA FAATINO: Fa'aaliga Manatu

1. Fefaasoaai le vasega po o le a se vaai faatupulaga talavou i le soifua foai o matua ma tagata lotu o le tatou ekalesia. Ia atagia i tali a le fanau, le ola talitonu ma le lē talitonu i le soifua foa'i po o le soifua faitaulaga mo le Atua ma lana galuega. Ia tapena foi lau Susuga e tali i ni fesili a le fanau.

PESE: Pese & Viiga - 157**AOAOGA:**

1. Fai le taulaga ma le amiotonu.
 2. Ia fai le taulaga ma le loto talitonu i faamanuiaga a le Atua.
 3. Ave lou ola e te fai taulaga ai i le Atua.
-

ASO SA: 13 NOVEMA 2016**MATAUPU: O LE LOTO FUATIAIFO (The free will)**

SINI: Ia a’oa’oina fanau i le eseese o le foa’i e faia ma le loto fuatiaifo e lelei ma le foa’i e faatauanauna.

TUSI FAITAU: 2 Korinito 9**FESOASOANI MO FAIAOGA:**

O le ‘loto fuatiaifo’ i se isi faaupuga, ‘ia usita’i i le mea e fai mai ai le loto.’ ‘Aua le faia ona o le vaaiga a tagata po o le fefe i le tulafono ua uma ona faataoto. ‘Aua foi le faia ona o se mea ua masani ai. Ae ia faia i le loto malie, faia ma le loto fiafia, faia i le mea e manatu e lelei ma matagofie. A o le sili o ia mea uma, ia faia mo se viiga o le Atua.

O lo o manino i le fuaiupu e fitu le talosaga atu a Paulo i le Ekalesia i Korinito. *“Ia taitoatasi ma foa’i e pei ona filifili i lona loto, aua ma le tiga, aua foi ma le faatauanauna, aua e alofa le Atua i lē ua foa’i ma le loto malie.” (2 Korinito 9:7).* O lo o fa’aaogaina e le Aposetolo le faitau lea: *filifili ma le loto, aua ma le tiga, aua foi ma le faatauanauna...*” e faamanino atili ai lona naunau mai mo le foa’i. O le upu ‘loto’ o lo o faamatalaina o le tagata lilo (inner person). O le ogatotonugalemu lea o faiga filifiliga a le tagata soifua. A o le talitonuga o le au Kerisiano e faavae i a’oa’oga a le Tusi Paia, a lē aiaina e le Agaga o le Atua le loto o le tagata, e lē maua ni filifiliga sa’o

ma le manuia. O le faamoemoe lea o Paulo, ia aiaina e le Atua loto o tagata Kerisiano i Korinito ina ia lagona le tāua o le foa'i o le a faia mo le au Kerisiano ua mafatia i Ierusalema. Auā e i ai lava le talitonuga, ua loa ona silafia e Paulo le faafitauli lea e tupu i totonu o le Ekalesia i Korinito, ua leva ona tapena le foa'i, ae le mafai ona atoatoa ma tino mai e pei ona faia e ekalesia i Maketonia (Filipi, Tesalonia ma Perea) ona o le eseese o loto ma faiga filifiliga a tagata lotu. Lea lava e tā'ua e le Aposetolo, 'aia ne'i faia lau foai ona o le matapeapea ae faia e pei o se meaalofo (2 Kori 9:5). O lona uiga, 'aia nei manatu se isi e maua ai se faasiliga. 'Aia ma le tiga 'aia ma le faatauanaui (2 Kori 9:7) ina ne'i avea le foai ma ala o le taapape o le ekalesia. Ae ia faia ma le faalologo i le musumusuga a le Agaga o le Atua ona mautinoa lea ua taunuu manuia lea faamoemoe. O le Agaga lena na te aumaia mafaufauga e lelei, ma faatupu le faatuatua e faia le foai ma le lē masalosalo i faamanuiaga a le Atua ua ia folafola mai. O lo o fa'aogaina e le Aposetolo le ata faatusa o le seleselegasaito e faamatala ai manuia o le Atua e pei ona tā'ua. O le tagata e tele lana saito e lulu, e tele foi lana saito e selesele pe a oo i le vaitau o le seleselega. O le tagata e tele lana foai, e tele foi lona manuia e maua. E tele lava ni mafuaaga o lo o faamauina, e afua ai ona naunau le Aposetolo e faia o lea foai. Peitai, o lo o laualuga i mafaufauga o le au Suesue, o le naunau o Paulo ia tino mai lea foai ma ave i Ierusalema, o se pine faamau lea o le ola talitonu o tagata o nuu ese i le Atua o Isaraelu. Manatua foi o Ekalesia ia i Maketonia (Filipi, Tesalonia, Perea) ma Korinito, e aafia i Ekalesia o nuu ese. Ae afai latou te faataunuuina lea foai e fesoasoani ai i tagata matitiva i totonu o Ierusalema, o se faailoga lea e iloa ai, ua tupu le galuega i nuu ese. E le gata e fai ma pine faamau o le ola talitonu o tagata i le Atua, ae o le a faateleina ai foi le viiga o le Atua. O le viiga ma le faafetai i le Atua, e lagiina e le tagata puapuagatia ina ua papai ma faasafua atu le alofa o le Atua mo i latou. Tamaiti, ia tatou fiafia e faia le foai ma le loto malie. Ua a'oa'o mai lenei tala, e tele manuia o le Atua mo le tagata e foa'i ma le loto malie.

E tele foi le viiga o le Atua pe afai tatou te auauna ma le loto fuatiaifo e lelei i lana Talalelei. O lo o tā'ua e Paulo i le faaiuga o le mataupu le foa'i fua e le faamatalaina sa saunia e le Atua mo i tatou uma. O le

faataitaiga sili, o le ola foai mo le Atua ma lana talalelei. E le'i faia e le Atua lea foa'i ona o so tatou lelei, po o se tausi i ana tulafono ua tele, leai. Na faia lava e le Atua, i lona alofa tunoa ina ia ola i tatou uma. Foai ma le loto fuatiaifo mo le Atua ma lana talalelei.

GALUEGA FAATINO: Fa'aaliga Manatu

1. Fesiligia le vasega po o ā ni ō latou manatu i le ola foai o tagata o le tatou Ekalesia. O faia ea ma le loto fuatiaifo e lelei, po o faia ea ona o le faatauanau?

PESE: *Pese ma Viiga - 158*

AOAOGA:

1. Ia faia le foa'i ma le loto fuatiaifo e lelei. 'Aua ma le faatauanau, 'aua foi ona o se faiga ua masani ai.
2. E tele manuia o le Atua pe afai tatou te foa'i ma le loto fiafia mo ia ma lana galuega.
3. Fai le foa'i i le mea e silisili ona lelei mo se viiga o le Atua.

.....

ASO SA: **20 NOVEMA 2016**

MATAUPU: **O LE TULAFONO MA LE ALOFA**
(The law and love)

SINI: Ia a'oa'oina le fanau ina ia faamuamua le alofa i so o se mea. Tusa lava po o tulafono ma aiaiga ua uma ona faataoto, ia faamuamua le alofa.

TUSI FAITAU: Luka 10: 25-37

FESOASOANI MO FAIAOGA

O le tala sa faitauina mai le Feagaiga Fou, o le faataoto (parable) i le Samaria agalelei e pei ona iloa ai. O ‘faataoto’ (parables), o tala fatu. O tala fatu e faamatala ina ia malamalama gofie le tagata faalogologo i se mataupu o lo o fia malamalama i ai. O le uiga foi lea o le fa’aaogaina e Iesu o le tala lea i le Samaria agalelei e pei ona faitauina. Fai mai ua fesili tofotofo le tasi a’oa’o ia Iesu pe faapefea ona maua le ola e faavavau. Peitai, ua toe fesili Iesu i le a’oa’o po o le a sona iloa auā o ia o le a’oa’o o le tulafono. Ona tali lea o le a’oa’o ma tau ane nisi o tulafono o le feagaiga tuai: faapea ifo: (1) Ia e alofa i le Atua ma lou loto atoa, lou agaga atoa, lou malosi ma lou manatu atoa (Teuterenome 6:5). (2) Ia e alofa atu i lē lua te tuaoi ia pei o oe lava ia te oe (Levitiko 19:18). I le finagalo o Iesu, “ua tonu lau tali; ia e faapea ona fai, e te ola ai.” (Luka 10:28) E peiseai o lea ua faapea atu Iesu, alu loa e faatino le tulafono ona e maua lea o le ola e faavavau. Peitai, ua toe fesili faafiatonu le taulealea i a Iesu. Ua faapea atu, “*o ai foi le tagata ma te tuaoi?*” O se fesili e foliga e faigofie lona faaupuga, ae ese foi le loloto o lona faamatalaina. Auā o lea ua atagia manino ii, o le tasi lea o vaivaiga o le tulafono faalutaia, ‘ua na o i latou lava ma le Atua’. E lē tuaoi le Isaraelu ma se tagata o nuu ese. I le talitonuga, o tagata o nuu ese, latou te lē iloa le Atua. Peitai, ua le faapena le iuga o le faataoto lea i le Samaria agalelei, e pei ona faamatalaina e Iesu.

Fai mai ua alu le faigamalana a le tasi tagata mai Ierusalema agai atu i Ieriko. O le vavamamao o ia nofoaga pe tusa lea o le 17 maila le umi. O se auala e ui atu i ala toafa ma ala maugā, e toatele foi tagata faomea e lalafi ai ma faatalitali e faoa meatotino a tagata faimalaga. Lea foi ua fasia ai ma le taulealea lea, na malaga mai i Ierusalema agai atu i Ieriko, ua faoesea ana meatotino, ua taatia i le ala a tali oti. Mulimuli ane ua ui ane isi tagata malaga e toatolu. **(1) O le ositaulaga.** Peitai, ua ui mamao ese o ia, e le’i pa’i i le tagata manu’a. **(2) Ua sau le sã Lēvi.** Ua vaai mamao atu ona alu lea ua matamata i ona manu’a. Ae le’i papa’i foi i ai. Ua manatu nisi o le au Suesue o le Tusi Paia, o le le pai atu o le osi taulaga ma le sa Levi i le tagata manua, e mafua mai ona o le tulafono e fesootai ma laua galuega o lo o i ai. O le tulafono faafeagaiga tuai, o le osi taulaga ma le sã Levi, e sã ona papa’i atu i ni mea e lē faamamaina. O le vaai foi faafeagaiga tuai i le tagata e manua i le ala, o le tagata ua

tatau i ai le sala, o lona uiga o se tagata agasala. O le mafuaaga lea o le lē fesoasoani o le osi taulaga ma le sã Levi i le tagata ua manua ma sauaina i le ala. I le talitonuga, o le tagata le faamāmāina. Ina ne'i pa'i atu i laua, ona afaina ai lea o lo laua valaauina. Ae ia manatua, o galuega ia, o le osi taulaga ma le sã Levi, o galuega ua na o suli moni o Arona latou te faatinoina. O galuega foi e a'oa'oina lelei i tulafono a le Atua. E galulue foi i totonu o le malumalu o le Atua. O lo o taua foi e Luka le tagata manua lea, o le tagata na malaga mai Ierusalemaga agai atu i Ieriko. O lona uiga, o se tagata lutaia ma sa tatau lava ona fesoasoani i ai le osi taulaga ma le sã Levi. Peitai, ua leai.

(3) Ua oo ane le tagata Samaria. O le tagata e talitonu lutaia o tagata o nuu ese, e lē o ni suli moni o Aperaamo. Ae fai mai Iesu, “*ua mutimutivale lona alofa....*,”ua punou ane ua faia le galuega laveai. Ua fusifusi i ona manua, ua liligi foi i ai le suau'u ma le uaina. O le suauu (olive oil) ma le uaina (wine), o ni oloa taugata i lea foi vaitau. E le maua gofie, peitai, na liligi (pour on) – o le faailoga o le lē manumanu o le Samaria agalelei ina ia tuutiitia tiga o le tagata a tãli oti. Ua uma ona fusifusi i manua, ona ia faatietie lea ia te ia i lana lava manu ua taitai i le fale talimalo, ma tausi ia te ia. A fua i le tala lea e aumai, o lona uiga, na savali le Samaria ae faatietie le tagata manua. E le o taua le mamao o le ala, na pau le mea lea ua manino na tietie le tagata manua ae savali le Samaria. Taunuu atu i o i le fale talimalo, ua ia poloai foi i le pule o le faletalimalo, “a i ai nisi pili e fia totogi, faatali ou te toe sau totogi faauma atu.”

Tamaiti, e ese foi le tele o le alofa o le Samaria i lenei tagata manua. E le gata ua mutimutivale lona alofa, ae ua faatino foi lea alofa. Auā o le toatele o tatou, e fai mai e alofa ae leai se faatinoga e faia. Fai mai, “talofa e isi tama”, ae la e osooso mamao ane i o. Ia tatou faapei o lenei tagata Samaria. E pei ona taua i luga, e i ai lava mafuaaga na mafua ai ona lē tagofia e le osi taulaga ma le sã Levi le tagata manua lea. Ao le fesili tele lea mo i tatou. O lē fea e sili? E faasili ia te oe le tulafono ma lau galuega, nai lo o le alofa atu i le ua moomia le fesoasoani? Fai mai le mataupu o lenei Aso Sa, **O LE ALOFA MA LE TULAFONO.** E tãua tulafono e limataitaiina ai le soifua manuia o aso uma. O lona uiga, **Tamaiti, ia ō faatasi le alofa ma le tulafono.** Auā, o le a le aoga tatou

te tausi ai i tulafono ae mulimuli ane ua maumau le ola o se isi ona o ia tulafono? Ia faavae i le alofa lou iloa o le tulafono. I le faaiuga o le tala, e toe fesili atu Iesu i le a’oa’o po o ai la te tuaoi ae sau le tali, ua lē Samaria, ae ***o lē na alofa atu ia te ia***. Tamaiti, aua ne’i faailoga lou alofa atu i le ua moomia lau fesoasoani. O le lu’i mo i tatou uma, e faapefea ona lagona e le Samaria o le tagata o nuu ese le alofa, ae tatou te lē lagona le alofa i le Atua, a o i tatou o tagata Kerisiano? Ma ia tatou fesili ifo i tatou ia i tatou lava po o ai ea o fai i tatou ma latou tuaoi? O e iloa ea lou tuaoi pe leai?

GALUEGA FAATINO: Faatinoga

1. E lelei ae faatino le tala i luma o le Aoga Aso Sa atoa. E puupuu toe faigofie. O le faamoemoe, ia vaavaai fanau i le eseesea o amioga a le osi taulaga, le sã Levi ma le Samaria agalelei ina ua tau ane i le tagata manua i le ala. Ia manino ia latou faaupuga mafuaaga o le le tagofia o le tagata manu’a. Fai se fesili po o ai e fia pei o le osi taulaga, le sã Levi ma le Samaria agalelei.

PESE: *Le alofa o le Atua, pei o se li’o tele.....*

AOAOGA:

1. Alofa i so o se tagata. ‘Aua le faailoga tagata lou alofa iē ua moomia lau fesoasoani.
2. Alofa i le Atua e ala i le tausi i ana poloaiga.

.....

ASO SA: **27 NOVEMA 2016 Aso Sa Ateveni/Afio A’e**

MATAUPU: **MAMALU O LE ATUA** (The glory of God.)

SINI: Ia malamalama le fanau, o Iesu Keriso o Ia lava o le Mamalu o le Atua. O lona uiga, ia faalogo ma usiusitai tagata uma ia Iesu.

TUSI FAITAU: Mareko 9: 2-8**FESOASOANI MO FAIAOGA:**

O le tala sa faitauina mai le Feagaiga Fou, o le tala i le liua (transfiguration) o Iesu ai luma o Peteru, Iakopo ma Ioane. O se vaaiga na faateia ai le au so'o e pei ona tā'ua e Mareko. Peitai o le molimau a le au Suesue o le Tusi Paia, o le vaaiga lea i luga o le mauga, ua faamautinoa ai i loto ma mafaufau o le au so'o le tulaga Atua o Iesu ao le'i faatinoina nisi o vavega ma faamalologa i lana galuega na afio mai ai i le lalolagi. O i lea ua faaalua ai le itu Atua o Iesu Keriso, e moni e tino mai e pei o se tagata, ae o Ia lava o Alo o le Atua. O Ia lava o le Mamalu o le Atua ua liutino tagata mo le faaolaina o le lalolagi. Ua afio mai o Ia ma le silisili ese, o le mamalu ma le pule aoao o mea uma o i le lagi ma le lalolagi. O le mea lea e tatau ai ona faalologo ma usiusita'i tagata uma ia te Ia. Lea ua fetalai mai le lagi, "*O lo'u Atalii pele lena, ina faalogo ia outou ia te ia*". O se faatonuga ua lē gata e talafeagai mo le au so'o ae faapea foi ona aoga mo le motu o tagata. Aua o lea atagia i le Mareko 8: 27-30, e lē o talitonu tagata o Iesu o le Alo o le Atua lea na ia fagaina le fa afe (4,000) o tagata i areto e fitu ma nai ia lauiti. E fesili atu Iesu i le au so'o po o le a se tala a tagata ia te ia, ae sau le tali, fai mai o oe o Ioane le papatiso, o oe o Elia, o oe o se tasi o le au perofeta. Faauta i le lē malamalama o tagata. A'o lea faatoa mavae atu isi faamalologa ma isi vavega e tele. I le talitonuga o tagata, e mafaia e Ioane le papatiso ona faia o ia mea, e mafaia e Elia ma isi o le au perofeta. Ao Iesu ua leai. Atonu ua manatu nisi, o Iesu o le atalii o le kamuta, e le mafai ona ia faia o ia mea. E faasisi fua i tagata, ae mautinoa o lo o faapea foi mafaufauga o le au so'o. Ai foi o le ala lea na ave ai na o i latou: Peteru, Iakopo ma Ioane. Auā o i latou ia na muai valaaauina e Iesu e mulimuli mai ia te Ia – Mareko 1: 16-20/Mataio 4:18-22. Ua silafia e Iesu, o lea lava e mulimuli ma le lē talitonu nei tagata ia te Ia. E le o ta'ua uma le au so'o, ae ua lava i latou ia latou te talai atu lea vaaiga ina ia talitonu ai le isi au so'o. Fai mai Mareko (9:3): "ua pupula ona ofu ua matuā pa'epa'e lava..." O le upu Eleni e uiga tutusa ma le matuā pa'epa'e lava e mafai foi ona faauigaina - o le malamalama uiga ese e lē mafai e se tagata ona vaai totoa i ai. O se

malamalama tulaga ese lona pupula ma le matagofie. Lea ua liua ai laei o Iesu, ae fai mai Mareko, “....e leai se tagata taofu o lenei lalolagi e mafai ona ia faasinasina faapena.” O lona uiga, e leai lava sei tagata e mafai ona ia faasinasina se ofu faapea, seia vagana le Atua. Ua iloa foi e le au soo o Elia ma Mose o lo o fetautalatalaai faatasi ma Iesu i lea mea. O Elia ma Mose, o taitai iloga ia o le nuu o le Atua i le Feagaiga Tuai. E tauta’ua Mose, i lona tulai mai e aumai le nuu o le Atua mai Aikupito i le mea sa nofo pologa ai seia oo lava ina iloa atu o le nuu folafolaina. O Elia na ia faatoilalo perofeta a Paala i le vaitau o le nofoaiga a Aapo ma lona toalua o Iesepela (1 Tupu 19). O nisi foi ia o taitai o Isaraelu, na faailoa i ai le Atua i luga o le mauga. Na fa’aali le Atua ia Mose ina ua mavae aso e ono i luga o le mauga o Sinai (Esoto 24:15-18) ma tuuina i ai papa maa o tulafono e sefulu. Na faaali foi ia Elia i luga o le mauga ina ua sola ese mai le matamaita o Iesepela ia te ia (1 Tupu 19). A o lea foi ua faaali faatasi mai Iesu i luma o le au soo. Na pau lona eseese, e le’i i ai lava se siufofoga mai le lagi ua faapea ifo ia Elia ma Mose, “*o lou atalii pele lena, ia outou faalogo ia te ia*”.

O le pine faamau lea o le tulaga ese o le galuega a Iesu ma le valaauina o Elia ma Mose. O i foi ua faamanino ai le tulaga tutusa o Iesu ma lona Tama o i le lagi. O Iesu, ua i ai le pule ma le malosi uma lava mai le Atua e faia ai lana galuega faaola i le lalolagi. O ia lava o le Alo o le Atua, o ia foi o le Atua. O le Ia lea o le mamalu fa’aalia o le Atua i le lalolagi nei. E tatau ai ona faalologo tagata uma ma usiusita’i ia te Ia. Tamaiti, ua a’oa’o mai le mataupu o lenei Aso Sa, ina ia tatou tutumau pea i le faatuatua, o Iesu o le Alo o le Atua. O Iesu o le Mamalu silisili ese lea o le Atua ua liutino tagata ona o le alofa mo i tatou uma. E tãua lenei mataupu, ona o le tele o talaiga i nei aso ua faapea mai o Iesu e le o se Mesia, e le o se Alo o le Atua. Peitai, ua a’oa’o mai lenei tala, na o Iesu lava e mafai ona ia faia o vavega e tele ma faamalologa o so o se ma’i. Ua fetalai manino foi le Atua: **‘O lo’u atalii pele lena, ia outou faalogo ia te Ia’.**

GALUEGA FAATINO: Fa’aaliga Manatu

1. E i ai le talitonuga o nisi o tapuaiga, **O Iesu e le o se Alo o le Atua, e le o se Atua foi.** E talitonu i latou o Iesu o se tagata e pei o Elia ma Mose. Ia fetufaa'i le vasega ma fa'aali manatu po o o le ā le tali a le fanau i lea talitonuga.
2. Ia tapena lau Susuga i le Faiaoga e tali i fesili ma ia atagia le sini o lenei aso, o Iesu o ia o le Mamalu o le Atua. O ia o le Atua ua liutino tagata.

PESE: *Avatu i le tupu viiga e tatau.....Pese ma Viiga 82.*

AOAOGA:

1. O Iesu, o ia lava o le mamalu o le Atua, ua fa'aalia i le lalolagi nei.
2. E le faatusaina le galuega a Iesu na afio mai ai i le lalolagi nei i galuega a le tagata soifua.
3. Ia tatou faamoemoe pea i le Agaga o le Atua e faamanino ma saga faamalosi lo tatou faatuatua ina ia 'aia lava ne'i lualuagia lo tatou talitonu ia Iesu Keriso ona o le tele o a'oa'oga sese i nei aso.

.....

ASO SA: **4 TESEMA 2016**

MATAUPU: **O FOLIGA O LE ALO O LE ATUA**
(The image of the Son of God)

SINI: Ia avea le soifua a'oa'o mai o Iesu Keriso e fai ma faaitaiga sili o le ola talitonu i le Atua.

TUSI FAITAU: Filipi 2: 5-7

FESOASOANI MO FAIAOGA:

O le Ekalesia i Filipi na faatuina e Paulo i lana malaga faamisionare lona lua pe tusa o le TLM 50 (Galuega 16: 12-40). O le tusi i Filipi o lo

o faamauina na tusia lava e Paulo, a o i ai o ia i le falepuipui. O nisi e manatu sa falepuipui Paulo ma tusia le tusi lenei i Efeso -TLM 53-55, o nisi ua finau mai sa falepuipui i Kaisereia - TLM 57-59. Peitai o le toatele lava o lo o finauina le nofo sala ai o Paulo i Roma - TLM 61 e talia ai lona faasalaga faafalepuipui (Galuega 28: 16, 30-31). O iina lea e manatu nisi, sa mafai lava ona fesootai ai Paulo ma tagata asiasi atu ia te ia e ui o lo o i ai leoleo o le malo Roma. E tele nisi mafuaaga o le tusi lenei i Filipi, peitai, o le aotelega lava o lo o faamauina ai le agaga fiafia o le Aposetolo ona o tala fiafia o le galuega a le Atua i Filipi ua oo ane ia te ia. E ui ua feagai o ia ma puapuaga peitai, o lo o molimauina pea le tutumau o le au Kerisiano i Filipi i le Talalelei a le Atua. O lo o faamauina foi i le tusi lava lenei le faafetai a le Aposetolo ona o le foa'i a tagata Filipi ma le fesoasoani mo ia a o feagai ma noanoataga o le Talalelei. Lea e faapea le tele o tusitusiga na faaoo ane e Epaferoti (Filipi 2: 25-30) o se toa o le Talalelei na galulue faatasi ma Paulo. O le auga lava ma le faamoemoe o Paulo ia faatuputeleina le malosi faale-Agaga o le au Kerisiano e tutumau ai pea i le galuega a le Atua. 'Aua nei avea le saisaitia o ia ma nisi o le au faigaluega ona o le Talalelei ma ala e faavaivaia ai le ola faatuatua o tagata i le Atua. O le ala foi lea o le aumai e Paulo o le ata o le galuega a Iesu i le lalolagi nei e taula i ai lana faamalosi lea i tagata faatuatua a o le faata'imuaga lea o le ola auauna o le tagata i le Atua. Fai mai a ia, *Ia ia te outou foi lenei manatu o ia Keriso Iesu (Filipi 2: 5)*. O le tala lava ua tatou iloa ma masani ai le galuega a Iesu i le lalolagi nei, e le o se galuega e faigofie. O le soifua sasaa atoatoa mai o Iesu Keriso mo le faaolaina o le lalolagi o se faatinoga lava ua faia ma le atoatoa. O le Atua, mamalu ma le Silisili ese, ua tuua lona nofoalii ae ua liutinotagata e ala ia Iesu Keriso. Na afio mai i se auala inosia ma le tauemua i manatu o le lalolagi. Ua soifua faatasi ma tagata. Na militino ma aai faatasi ma e ua ta'u agasalaina i le vaai a tagata. Ua papai atu i e mama'i ma faamalolo ia i latou ua ta'u lē faamāmāina i le tulafono. Na sauaina ma tigaina ona o lana amiotonu. Ua faalupe o ia o le pagota ona o galuega lelei ma le alofa na ia faia. Na oo lava i le satauro, o le faailoga o le faamāina ma le faalumaina, ae ua leai lava se tala, na o le faamanuia, "*Lou tama e, ia e faamagaloina atu ia te i latou, aua ua latou lē iloa le mea ua latou*

faia” (Luka 23:34). Na oo a i le tuugamau lona faamaualaloina o Ia lava, ua toe soifua manumalo o Ia, ae leai lava se tauimasui, na o le alofa i le lalolagi lē malamalama. O foliga na o le Alo o le Atua lea e manatu Paulo e tatau ona atagia i le soifua talitonu o tagata Filipi i le Atua. Ua silafia lelei e Paulo, e i ai taimi e lofia ai le tagata i lagona o le musuā ona o le fefe ma le vaai atu, na o le falepuipui ma le oti le iuga o le talitonu ia Iesu. Peitai, afai e loto gatasitasi tagata uma, ma tulaia pea le vaai i le soifua galue o Iesu Keriso, ua mautinoa ua tupu pea le ola faatuatua i le Atua. ‘Aua nei avea tofiga, o le poto, o le tamaoaiga ma nisi lava mea e fai ma faava’atuia o le ola auauna i le Atua. Ae ia manatu tagata uma, e tutusa tagata uma. O i latou o pologa mo le talalelei a Iesu Keriso. O le pologa e tatau ona tigaina ma fai le auaunaga i le atoatoa e gata ai ina ia faafiafiaina lona matai. O le auaunaga tusa lava pe feagai ma puapuaga e lē solomuli i se mea e tasi.

O le faamoemoe lea o Paulo mo Filipi, poo a lava faafitauli e oo atu ia i latou ona o le Talalelei, ia manatua e lē tuulafoaina i latou e le Atua e pei ona ia faia ia Iesu Keriso. Tamaiti, o le mataupu o lenei Aso, O foliga o le Alo o le Atua. O lea ua aumai e Paulo le galuega a Iesu e fai ma taiala o le ola galulue o tagata o Filipi. O se faataitaiga foi lea mo i tatou uma. Auā o le galuega a Iesu i le lalolagi, o lo o atagia ai foliga vaaia o le Atua lē vaaia. O lo o atagia ai le loto mauualalo, o le alofa lē faatuaoia, faamaoni, onosai ma faapalepale. O le Atua tuuavanoa, lē tauimasui, faatuatua, lototele ma isi lava uiga lelei ua tatou iloa ma aoaoina mai le soifuaga o Iesu Keriso. O le auga ma le faamoemoe, ia tatou fa’aa’oa’o i ia foliga vaaia o le Alo o le Atua, ina ia tatou maua le ola e faavavau. O le manumalo o Iesu i le tuugamau ma le oti, o le manumalo foi lea o le tagata faatuatua e tutumau ia te ia ma le loto faamaoni.

GALUEGA FAATINO: Fa’aaliga Manatu

1. Tau mai e le tamaititi aoga, se uiga se tasi ua ia maua mai le galuega a Iesu i le lalolagi. Ia faamatala i le vasega se vavega po o se faamalologa na faia e Iesu o lo o atagia ai lea foliga o le Alo o le Atua. (*f.t. loto mauualalo – E tele lava tala e faatatau i le loto*)

maualalo o Iesu. Peitai, o le taimi lava o le faamasinoga ma le aga atu i Korokota, o iina lava ua a'oa'oina ai au, i le loto maualalo a faatinoina e Iesu. Tiga lava ona feanu, po ma sasaa e tagata ae leai lava se tala)

PESE: I have decided to follow Jesus.....
Ua ou filifili e mulimuli ia Iesu.....

AOAOGA:

1. Ia tatou fa'aa'oa'o i uiga o Iesu e pei ona tatou vaaia i lana galuega talai i le lalolagi nei.
2. Ia faamaoni lo tatou ola auauna i le Atua, ma ia fai Iesu ma faataitaiga o lea auaunaga.
3. Tumau i le tatalo ma le ola faatuatua i le Atua tusa lava po o a faafitauli o le ola e oo mai. Ia tatou talia foi faafitauli o le soifua auauna o ni luitau mo le agai i luma.

.....

ASO SA: 11 TESEMA 2016

MATAUPU: O MEAALOF A LE AU MAKOI
(The gifts of the wise men)

SINI: Ia a'oa'oina fanau i le tāua o le fai meaalofo i le Atua i se mea e silisili ona lelei ma matagofie ia te oe.

TUSI FAITAU: Mataio 2: 9-11

FESOASOANI MO FAIAOGA:

O lenei vaitau o le tausaga, o le vaitau lava o faigameaalofa. E eseese foi faiga ma auala o faiga meaalofo i nei aso. A o le auga lava ma le faamoemoe ia faafiafiaina le loto o le tagata o lo o i ai lea meaalofo. O le tala sa faitauina o le tala i le malaga mai o Makoi mai sasae e saili le

nofoaga o fanau ai le tupu o tagata Iutaia (Mataio 2:2). O Makoi (wise men) e pei ona taua, o tagata e i ai le poto faapitoa latou te sutesueina ma faauiga le so’otaga o vaaiga i le vanimonimo ma le fogaeleele po o **astrologists** i le faaperetania. O le malaga na taitaina e le fetu, ae mulimuli ane ua iloa e Herota le tupu ona ia aami lea o ona tagata ma fesili atu i ai po o fea le nofoaga lea e saili e Makoi. Ae sau le tali “*O Peteleema i Iutaia*” Mataio 2: 5. E leai ma se tasi na te iloa tonu le nofoaga, ao mea ia o lo o tutupu i lo latou lotoifale. Na iu lava i lona aami o le au Makoi ma matuā su’esu’e ia i latou, ae leai lava se tali mautu na ia maua. Ona ia faamatuu lea o le au Makoi e o, ma le poloaiga, a maua le pepe ia toe foi mai ia te ia e fia alu atu foi e ave sana meaalofo mo le tupu. Peitai, o lo o taua i le fuaiupu e 12, ua faailoa i le au Makoi e ala i le miti le atoaga o le manao o Herota, ona latou le toe foi ai lea ia te ia.

O le tala ua masani ai, peitai, a toe to manatu i le faataotoga o le tala lea a Mataio e ese foi le taua. E lē o taua lava e Mataio, po o le a le mamao i sasae na omai ai ia Makoi. Na pau le mea lea ua manino, na iloa loa le fetu, tulai loa ma omai e sue le nofoaga o fanau ai Iesu. A o tagata mai sasae, lea e manatu nisi o le au Suesue e lē o ni tagata e talitonu atoatoa i le Atua. Ona tupu lea o se fesili e faapea: e faapefea ona ta’ita’iina e lea fetu mamao i luga, le faigamalaga a nei tagata atatamai? E tele lava tali e mafai ona tatou maua. Ae i ai le talitonuga, o le malaga a le au Makoi, o le malaga a tagata faatuatua. E ui o tagata mai sasae, peitai, o lea ua molimau Mataio, na taitaiina e le fetu mai sasae faatasi ai ma le Agaga o le Atua lenei faigamalaga. E i ai faailoga e mafai ai ona faamalosi lea mau mo i tatou le fanau. **(1)** E mafai ona tatou faapea ifo, o le Agaga o le Atua na ia aveese mafaufauga o auauna a Herota e tau atu le nofoaga tonu o lo o fanau ai Iesu. E faapena foi i le au Makoi, e le’i mafai e le au Makoi ona latou tali atu e tusa o le manao o Herota. **(2)** Na faailoa e le Agaga o le Atua i le au Makoi e ala i le miti le atoaga o le manao o Herota ma le taunuu ai lana togafiti ua fai. **(3).** O le Agaga foi lea o le Atua na mafai ai ona ulufale atu i le fale o fanau ai Iesu, ua faapauu ma ma ofoina atu ai le tapuaiga faatasi ma meaalofo o maa taua ua uma ona saunia mo le tupu o tagata Iutaia: auro, pulu lipano ma le pulu muro. O le tele o faamaumauga i nei meaalofo, o le aotelega lava

o lo o manino ai o ni oloa taugata ma le anagata ia i le itu i sasae, lea ua fai meaalofo ai le au Makoi mo Iesu. Ae faapefea i tatou le fanau e, e faamata e mafai ona tatou mulimuli i se taitaiga a se fetu? Faamata e mafai ona tatou tutulai i luma o se tupu ua matua suesue ia i tatou? Ae a pe afai e alu atu le tatou malaga ae faafuasei ona tatou iloa le fetu ua tu i luga o le fale o manu, faamata tatou te talia lea nofoaga e fanau ai se tupu o tagata uma? E pule lava le tagata ia. Ae ua a'oa'o mai lenei tala i le au makoi, ina ia tatou saili ia Iesu ma le faatuatua. Aua e leai lava se aoga tatou te tapena ai meaalofo taugata ma le anagata pe afai tatou te le saili ia Iesu ma le faatuatua. Faauta foi i le au Makoi, o le mamao ia o le ala na malaga mai ai ma ia meaalofo ae semanu e le ofoina mo Iesu, pe ana latou le saili ma le faatuatua i le taitaiga a le fetu mai sasae. O le a sau meaalofo mo Iesu i lenei tausaga?

GALUEGA FAATINO: Faatinoga

1. Faatino le tala i luma o le Aoga Aso Sa, ina ia saga faamanino pea i fanau le taua o le ola faimealofo mo Iesu i lenei foi tausaga. Ia atagia foi i faaupuga a le au Makoi, lo latou faatuatua. Ia faavaivai nisi ae faamalosi pea nisi e o saili Iesu nei maumau a latou meaalofo.

PESE: *Ave lou ola ia aogā..... (Pese ma Viiga 157)*

AOAOGA:

1. Ia ofoina lou ola e fai meaalofo ai mo le Atua
2. Ia tatou saili ma le faatuatua i le Atua, ona mafai lea ona ofoina a tatou meaalofo mo Ia.
3. O Iesu Keriso, o le meaalofo sili lea ua foa'iina mai e le Atua mo le faaolaina o i tatou uma.

.....

Ia manuia le Kerisimasi & Tausaga Fou 2017

